


CIDIKÀ

 Myoyi yènù ayi mu dindà emu, balunda bàànyì. Ndyèsè dyà kwikala cyàkàbìdì kaaba aka mu dindà emu. Nènku mvwa. . . mbangambile ne bàvwa benze cisangilu cyà pabwàci, ne benze ndambù wa milubù mifùnda. Nènku bavwa bajinga bwa mèmè kulwa kuteeleja miine milubù ayi, yà cìvwa. . . bwà ne ní mvwaku ne cintu kampànda cyà kwamba ntwà ku cyàyì anyì mbèngangana naayi, pa bìdì bitàngilà, bàmba ne kùvwa cintu kampànda pa bìdì bitàngilà miyiiki yà bàbìdì, bàvwa bapete lutàtu kampànda. Ngeela meeji ne aci ncilenga cyà dikèma, mùshindù awu. Mèmè ndi ngiitaba aci's. Aci cìdì cimpeeshaku mpùngà dìbà adi, bwà ngàpetakù mùshindù. . .

² Bàdikù bùngì cyanààna, ngeela meeji bàdikù bìipacila nkàmà yisambòmbò pa dibeji dyà mènà à bàdì ne cyà kwindila, mpindyewu mene, nwamònu's, yà miyiiki yà bàbìdì yà pabwàyì. Ne mèmè bwà pa bìdì bitàngilà nsòmbelu mulenga ntu muswikìibwe ku díyì dyànyì, bwà kushààla ne muntu yònsò too ne patùdì tuumvwa díyì dyà kùdì Nzambì, bwà mwine muntu awu, nwamònu's. Ne dìbà adi wèwè wenza nànkù, udi mufwàànyine kwikala ne muntu ùmwèpelè ànu piine pa dibeji dyà mènà a bàdì ne cyà kwindila apu, anyì pàmwàpa ne mwine muntu ùmwèpelè awu, twindile mbingu yìbìdì anyì yisàtù bwà mwine muntu ùmwèpelè awu, nwamònu's, too ne patùdì cyà bushùwà tuumvwa díyì dyà kùdì Nzambì; tutwilangana, tusambila pàmwè; twalukila, tushiyàngana; twalukila pàmwè, tusambila pàmwè, too ne patùdì tupeta EMU MMUDI MUKALENGE WÀMBA bwa mwine muntu awu. Ee, mu ciine cikondo aci, nwamònu's, bikwàbò bintu ebi.

³ Mpindyewu mùshindù ewu, mùshindù wùndì ncyùm vwa mèmè, bìmpè, ngwà muntu ne muntu ùfùnda malòmba èndè, nànsha miikàle a bìshi, nènku ùdìmpeesha. Nènku nganji mèmè ànu kudyangata, ne pashìishe nsambila pa dilòmba adi, pashìishe ndi mwà kubìikidìla bantu abu mu mwaba wa. . . Awu ki wùwà—awu ki mùshindù wùwàbì anyì? [Mwaneetu Neville udi wamba ne: “Amen.”—Muf.] Mpindyewu, aci, aci ncìmpè. Nwamònu's, nènku pashìishe pàmwàpa pàncìdì mwindile ne mwine muntu ùmwèpelè awu apa, ndi mufwànyine kupeta bantu lukàmà, nkàmà yìbìdì, ànu mu kasùmbu aka, kàmwèpelè aka, pàncìdì mwindile ùmwèpelè apu. Bwalu mùshindù awu, nebìmpèèsheku dìbà adi mpùngà wa kufika ku kumòna bantu bapite apu. Ndi—ndi cyà bushùwà munange aci. Mwine udi mukapetè pende mmwènenu awu ní nganyì, ee, mèmè ndi ngiitabuuja ne bivwa bìmpè menemene. Abi mbìmpè.

4 Ne pa nàнку, mpindyewu, elu lumingu lùvwа mu mùshindù kampànda lumingu lulenga lwà dikèma bwànyì mèmè, ndambù wa mbingu mishààle eyi. Mvwa—mvwa mupàtùke muyè kumpàla kwà Mukalenge wètù, bu munùdi bamanyè.

5 Kadi, ndi ngeela meeji ne, kumpàla kwà twètù kubanga disangisha, ndi ngeela meeji ne ndi. . . Kùdi umwe ùndi mumanyè, ndi ne mwikùlwànyì wa balùme mwaba kampànda mu nzùbu emu, ne pàmwàpa. . . Pìikalàye Branham kampànda, mmwena cimvundù, wènda ùnyeemakanangana eku ne eku mwaba kampànda, pàmwàpa, pa nàнку yèyè kì—yèyè ki udi ukèngela kwangata dileeja dyà njila edi, pa nàнку ùdi ùsanganyiibwa mwaba kampànda kaaba aka. Ngeela meeji ne kùdi mudimu wa dilàmbula dyà bânà, ne bwà baamamù bakwàbò bàdi ne bânà bààbò bakesè. Mona’s, Mwanèètù Teddy, ngeela meeji ne nyèyè, bu yèyè mwà kulwaku ku piàno eku, nenku netwikalè mwà kwimba musambu wètù wa ciibidilu wà dilàmbula, dyà bânà, wà *Bwelàayi Naabò* awu.

6 Mpindyewu, bantu bààbùngì, mu èkèleeziyà yàbùngì, bàtu bamyamina bânà bàà mu mabòko màyi. Kadi twètù tutu tuteeta kulonda ànu mùyaaya Bible, kuMulonda ne mwànyì pàànyì mwònsò mùndiku mumanye amu. Mpindyewu, kakwènakù kaaba nànsha kàmwè mu Bible kàkaadìbo bamyamine muntu mukùlumpè màyi to, bwà mwànà wa mu dibòko katùbwambi. Ne mwaba nànsha wùmwè kacya Nzambì kàtu mutumeku dīyì bwà kumyaminangana màyi nànsha, ní mbwà mwànà wa mu dibòko ní mbwà muntu mukùlumpè.

7 Kadi kùdikù, mu Bible, mwaba wàkalwàbo ne bânà bakesè kùdi Yesù, ki kwelaYe byanza Byèndè muulu ne kubìtentekela bânà bakesè abu, ne kubàbènesha, kwamba ne: “Lekèlaayi bânà bakesè bálwe kùNdi.” Mpindyewu ki wètù—wètù mùshindù wà dicyènza mwaba ewu ngwòwò awu. Nènku mpindyewu, twètù bu basadidi Bèndè, tudì ànu tuya naabo kumpàla—kumpàla kwà Nzambì, mu disambila; nènku kwòkò kwikàle ní nganyì ní nganyì mwab’ewu udi ne mwanèndè wa mu dibòko udi kàyi mwanji kulàmbùdiibwa. . .

8 Twètù katùtu twitabuujà dibatiiza, ní ndya mushindu kaayi wònsò, dyà bânà bakesè bàà mu mabòko abu to. Bwalu, bòbò kabèna ne mpèkaatù nànsha umwe to. “Mbalela mu mpèkaatù, bafwimba mu bubì, balwè pa buloba bàmba mashimi,” kàdi kabèna ne kantu nànsha kàmwè kàà kunyingaleelabò to. Ne dibatiiza diine dùtu mbwà kanyinganyinga ne dilekelediibwa dyà mpèkaatù. Pa nàнку, mwanààbo mulela wa mu dibòko awu kèna ne kantu nànsha kàmwè kàà kunyingaleelayè to; nènku pààkafwà Yesù pa nkuruse, Yèyè wàkakezula mpèkaatù yònsò. Nenku mpindyewu patùdi tukola tufika mu cipimu cikùmbàne cyà tumanya ne bìdi bikèngela bwà twètù kunyingalala bwà bitùdi benze, dībà adi tudì tunyingalala, mpatùdi tujungulula ne Kìlistò, Yèyè wàkatufwila awu. . . Mwànà mutekète wa mu

dibòko awu kèna yèyè mwà kujingulula aci to, cyà ne Kilitò wàkamufwila aci. Kadi patukaadi bakole bafike mu cipimu cikumbane cyà tujingulula ne Kilitò wàkatufwila, nènku dîbà adi tudi—tudi tubatijiibwa mu lufù Lwèndè ne bajuudiibwe mu dibiishiibwa Dyèndè dyà ku lufù. Bu Mukalenge mwà kwanyisha, mu dyàlumingu dilwalwà nèmfikè ku cyôci aci, bu Mukalenge. . . bu Nzambi mwà kwanyisha.

⁹ Mpindyewu, ki bwà cinyi, tudi tulwa nàabò ne tubàlambula. Baamamù kanà bwònsò, èkèleeziyà kanà yònsò, twìtabàayi kanà yònsò, diikala kanà dyònsò, cintu cikwàbò kanà cyònsò, twètù tudi tulàmbula bânà bakesè bònsò kùdi Mukalenge Yesù Kilitò.

¹⁰ Mpindyewu, Mwanèètù Teddy, bu wèwè mwà kutwimbisha kwòkò eci ne: *Bwelàayi Naabò*, bu wèwè mwà kwanyisha. Eyo, tuyaayaaku twètù bònsò mpindyewu tũng.

Bwelàayi naabò, bwelàayi. . . mu,
 Bwelàayi naabò. . .
 Bwelàayi naabò, bwelàayi naabò. . .

¹¹ Mu cikeena-kumòna cîmvwà mumòne, ànu paanyimà menemene pàa lufù lwà maamù wanyì apu, ki wòwò awu wûmvwà ntuma, musambu awu, ngwà ne *Bwelàayi Naabò*, pàvwà bânà bakesè, pàvwàbo balwa naabò.

Udiku mwà kulwa anyi, Mwanèètù Neville?

¹² Ndi mumanye mwànà wa balùme ewu. Billy udi wàmba ne: “Wàmanya kùlu kumupònesha’s.” Yèyè. . . Ewu’s ng’William Branham, s’tudi bàsàtù biimane pàmwè kaaba aka, ba-William Branham, nkongo yisàtù, ménà àsàtù. Nyewu ùmbandila’s, mu dindà emu. Kùdi cintu kampànda cidiye naaci, ndutangilu lwà mùshindù kampànda lwà mwànà wa balùme udi kayi mwenze bwalu. Kàdi, yèyè’s ng’William Paul Mwànà. Ne pa nanku tudi ne kusakidila, mèmè ngudi naaku mu dindà emu, bwà kupèèsha Mukalenge Yesù, ngùmusha mu mabòko a tatwèndè (mwanàayi wa balùme), mwikùlwànyi wa balùme ewu, bwà nsòmbelu wa mudimu; mabènèsha pambidi pàa taatù ne maamù.

Twinyikaayi mitù yètù.

¹³ Taatù wetù wa Ngàsà wa mu Dyulu, ndi mumanyè ne nkaadi muyè kule be mu njila, pàndi mwambule mwikùlwànyi wa balùme ewu mu cyanza cyànyi apa.

¹⁴ Kadi ndi mvùluka Yakòbò, pàakatwàlaye biikùlu bèndè mu mantàntà a binù byèndè, pàakaavwàye muntu mununu, Efàlàyimà ne Maanàsè; kubènèshayè bânà abu, ne kubaabanyinaye mabènèsha àà nyumà àdi mashààle too ne ku ditùkù edi. Mùshindù wàkacyàmàkajayè byanza byèndè kuumusha kùdi ewu, kutùma kùdi mukwàbò, mwikàle ùmusha mabènèsha kùdi beena Yuda ùàtùma kùdi bàà Bisàmba byà bèndè, mu nkuruse awu. Nzambi wa mu Dyulu àsemeneku pabwipi apa mpindyewu.

15 Mwikùlwànyì wa balùme ùdì Wèwè mumpèèshe ewu, Mukalenge, mumumpèèshile ku mwanàànyì wa balùme ne mukaj'a mwanàànyì. Ndi mvuluka mùvwàye nkumba, kayiku ne mùshindù wà kukolesha bânà to, kadi ùpweka ùfùmina ditùkù adi ku Yakima, Washington, pàvwàye udila mwadi, wàmba ne: "Ndi njinga bwà ngâpetakù mwânà."

16 Nyumà Wèbè e kubwelayè mu kàshinyi amu, ne mwômò amu mêmè kwamba ne: "Neùmupete." Neku leelu ewu nyewu ndi mwambule mwânà mukeseè wa balùme mulenga ewu mu cyanza cyànyì: Dìyì Dyèbè dyakula, mulayi Wèbè.

17 Mpindyewu, Mukalenge, mu bupwekèle bwà byenzedi byètù, nyewu tutèeka mwânà wa mu dibòko ewu, ku diitabuuja, mu byanza byà Mukalenge Yesù; bwa ne Yèyè, mwikàle kaaba aka mu mmwèkelu wa Nyumà Mwîmpè, àngatè mwânà wa mu dibòko ewu mu byanza Byèndè ne mu bukùbi Bwèndè, ne amulombole mu nsòmbelu wèndè mujimà. Mupèèshèku bukole bwà mubidi ne dikàndà, mwoyi wa matùkù àbùngì, bu Wèwè mwà kunènga. Ne swàku bwà mwânà ewu àngaciibwe ku mudimu bwà butùmbì Bwèbè. Swàku bwà Bukole bwà Nzambì udi ne mwoyi bwikàle pambidi pàà mwânà ewu. Bu yèyè mwà kushààla ne mwoyi too ne ku muntu mukolè, ne bu Yesù mwà kunènga, swàku bwà ayiishe Èvànjeeliyò. Bukole bwà Nzambì bùdì bumufile kùdì mamwèndè ne tatwèndè abu, swàku bwà kaBumuumukukù to.

18 Bèshaku papa wende ne maman wende. Swàku bwà bôbò kukoleshiibwa, ewu. . . Swàku bwà yèyè àkoleshè mwânà ewu mu cyuyüya cyà bwena Kilistò. Bwà ne, dilongesha dyònsò dya buntu didìbo pààbò mwà kufila adi, mwânà ewu àdìpetè.

19 Mpindyewu, wèwè Billy Paul Branham Mwânà, nyewu nkufila kùdì Nzambì wa Bukole bwònsò, mu dikulambula, mu Dîna dya Yesù Kilistò. Amen.

20 Kùdì cintu kampànda cìdì naaci bânà bakesè bàà mu mabòko, cìdì, ngeela meeji, ciikàle cyà kalolo kàà dikèma!

21 Ndi mvuluka Loyce, wakadila mwadi ne kudikama byanza bikole. Yèyè ùtu ùbìnduluka be. Loyce mmupìcile mu makènga a makolè, mucikàle ànu mwânà mukeseè wa bakàjì wa cyena Kentucky uvwa ne lutàtu lukolè mu nsòmbelu wèndè. Kadi yèyè. . . Bufùkù kampànda, Yesù e kumumwènèkela, mwimane mu mashika. Ki kulwaye, wenda unyeema lubilu mutangile kwànyì ku nzùbu, pabwìpì ne dîbà mundankulu, yèyè ne Billy, paanyimà pàà bamane kusèlangana. Ki bôbò. . . Iwà ku luseke Iwà nkwasà wa muleepa wa mu cisòmbedi aku, mêmè kumwela dibòko ku nshìngù ne kumulombola kùdì Mukalenge Yesù.

22 Yèyè uvwa ujinga bânà wàmba kufwà. Bàvwa basèlàngane kùkaavwa bidimu byàbùngì. Kadi pàvwàye ùfùmina ku Yakima dîngà ditùkù, ùvwa bu uvwa udila mwadi. Cìvwa. . . Nyuma Mwîmpè kubwela e kumwambila bwà disaamà dya bânà

bakàji divwàye mupetè, divwà ditwàl- . . . civwà cyenze ne yéyè kapeciku mûshindù wà kupetayè bânà to. Pashiishe Nyumà Mwîmpè kulwaYè cyàkàbìdì, ne kwelaYè disaamà dyà bânà bakàji adi mulawu ne kumupèèshaYè dibènesha adi. Nyewu mfuma ku dimulàmbula mpindyewu. Kùvwà . . .

²³ Ndi ne ndambù wa tuntu tukesè tufùnda mwab'ewu, tùndi muswè kwanji kwamba dyàmbedi, kumpàla kwà twètù kubala bidì bifùnda. Dyàmbedi, mmasangisha àcilwalwà, ngàndi mufùnde aa. Aci mmu dyàlumingu dilwalwà edi, bu Mukalenge mwà kwanyisha. Ndi mumanyè ne nkubange kwikala mabwe à mashika ne kubi mu njila.

²⁴ Ne tudi ne bantu mwab'ewu; bàdì bafùmine ku Géorgie, ne ku Alabama, ne ku Floride, ne ku Ohio, ne ku Illinois. Ne—ne kasumbu kakesè aka nkenza ne bantu bàà ku myaba yònsò.

²⁵ Bàmwè bantu bàtu bàngambila, bàmba ne: “Nkaadikù mupicilepicile lwà ku èkèleeziyà webà aku, Billy, mu maadindà kampànda kuntwaku. Kùtu bitaata byà mashingi mwab'ewu a mafùmine ku nseka yònsò yà ditùnga.”

Mémè ne: “Eyowa's.”

²⁶ Umwe *apa* ne umwe *pààpa*, ki mùndi ngeela meeji ne ki mwikalà Mukàji-musela nàнку. “Bàbìdì mu budimi; nèngàngatè umwe, nshiyè umwe,” ne bikwàbò.

Nenku mémè—mémè ncìtu munange bwà bantu kwikalabò bèndesha mashingi mu njila yà mabwe a mashika ayi to.

²⁷ Ne ndi mumanyè ne, nànsha mémè pàanyi, ne ànu paanyimà pàà Noël apu mpindyewu, nèngiikalè—nèngiikalè ne cyà kuumuka, kuya mu budimi bwà bwambi, bu Mukalenge mwà kwanyisha. Ndi ne masangisha matwè ku dikumi ne àtaanu àdì malongolola patùdì twakulangana apa.

²⁸ Nenku ndi njinga kumanyisha bwà ne, mu dyàlumingu dilwalwà edi, bu Mukalenge mwà kwanyisha, ndi muswè kulongesha pa Diiyiisha didì ditàmbe kwikala dyà pabwàdì, bwànyi mémè. Ndi munkacì mwà kulonga, lumingu elu ne lumingu lùvwà ludyànjiile alu, pa maalu malonda à Bible. Nènku ndi njinga kwakula pa cyena-bwalu cyà *Bwena Kilistò Bubèngangana Nè Bumpàngaanù*, pa nàнку, anyi, *Dikuukwila Dyà Mpìngù*; mu dyàlumingu dilwalwà edi.

²⁹ Ne pashiishe dyàlumingu didì dilondà edi ndyà Mulàadilu wa Noël, dyàlumingu didì dilondà edi; nènku mu dyàlumingu, lumingu lukwàbò lwàlwa, ki dindì njinga kwamba, numfwileku luse. Dyàlumingu, lumingu lukwàbò lwàlwa, ndyà Mulàadilu wà Noël. Mpindyewu mémè mulaye Diiyiisha kampànda, kadi bóbò, bàmwè bàà ku balunda bàanyi bàdì bafùminà ku Alabama ne ku Mississippi ne ku Géorgie, ne ku nseke aku mûshindù awu abu, bânà batekète's ncyà bushùwà ne nebàtekeshiibwè mu mabòko bufùkù bwà Noël abu. Kadi bu Mukalenge mwà

kutèèka pa mwoyi wàanyi bwà kutwàdila èkèleeziyà Diiyisha dyà Noël, nënditwàlè dībà adi, bu Nzambi mwà kwanyisha, ndi ndaya ewu yònsò udi pambèlu pàà cimenga awu, nwamònu's, nènnùtùminè mèmè mwine mukàbà wà mèyi, nwamònu's. Pa nàнку kabyàkukèngela bwà nwènu kushiya bānà bèènu balela nkàyabò kumbèlu bufùkù bwà Noël abu to, bufùkù bwà Mulàādilu wà Noël abu. Nènku dībà adi mèmè—mèmè nènnùtùminè mukàbà wà mèyi awu, ku mfranga yànyi mèmè, nwamònu's, bwà disangisha. Nenku ikalaayi ànu bavùlùke bwalu abu.

³⁰ Cikwàbò cintu, nudi bamanyè's, kwèna—kwèna mwà kuteèkemena ne bantu bwònsò biitabuuje byònsò byùdì wamba to. Kabyèna ànu—kabyèna ànu bikùmbana mùshindù awu to.

³¹ Ndi mupwè mwoyi mu dindà emu, mujuuke lukasalukasa ngènda ndiipata, bwà kufika kaaba aka. Mbyenzeke ne ngambule mèsù. . . Mwanèètù Wood ngudi mulwè ne mukàjàanyi ne bwònsò abu. Mèmè—mèmè kutangila, nènku dībà dikaavwa ànu pawìpi ne kukùmbana dyà kubanga disangisha kaaba aka, bwà mèmè kubwela. Ki kungambilabò, Billy ùvwa mumbiikile makèlèlè dilòlò awu, wamba ne bàvwa bàjinga bwà ngiikalè kaaba aka mu dindà emu, bwà kutèeleja kubala kwà mulubu mufùnda wà disangisha dishààle ewu.

³² Mvwa ne cyà kulwa ne bwalu bulonda kampànda, ànu bwà kuteetaku kulongolola cintu kampànda cìmvwà mwàmbe. Nànsha wèwè muteete kucitòokeshà mùshindù kaayi, kùdi ànu muntu kampànda udi yèyè kayi ùcyùmvwa to. Mbwà byoshelu mu èkèleeziyà. Nwamònu anyi? Muntu kampànda uvwa wamba ne: “Mwanèètù Branham kàtu yèyè witabuujà cyoshelu mu èkèleeziyà to.” S'ncyà bushùwà ne mèmè ntu ngiitabuujà cyoshelu mu èkèleeziyà. Nwamònu anyi? Kadi byoshelu kabìvwa mwaba wùvwà bantu bàlwa bwà kusambidilaku to. Kacya kakùvwakù dibìikilangana dyà ku cyoshelu nànsha dimwè dyènzeka to, mu cikondo nànsha cìmwè, mu Bible. Cintu bu nàнку kacitukù to.

³³ Nènku ndi muswè kunùtwàdila, mu dyàlumingu dilwalwà mmungàànùtwàdilà, mu bwalu bulonda bwà èkèleeziyà wa ku cibangidilu, cìvwà cyenze ne kakwikadi byoshelu mu èkèleeziyà. Mbwalu, kupona mikookwela ku cyoshelu mmùshindù wa dikuukwila wa bampangaanu, ne kì mmwènu wa bwena Kilistò to nànsha kakesè. Mpindyewu, nèngàakulè kàbidì, pa bwalu abu, mu dyàlumingu dilwalwà edi. Kadi kakùvwakù byoshelu mu èkèleezi wa ku cibangidilu to, bwà kwenza mabiikila a ku cyoshelu miine awu. Kakùvwa cintu nànsha cìmwè to ànu cibambalu munda mutupù. Kwàjiki. Kakùvwa nì nnkuruse, nì ncinyi, kakùvwa cintu nànsha cìmwè to ànu panshì palàndàkàne. Bantu bàvwa ng'Èkèleeziyà wa—wa mpenta mu matùkù a ku cibangidilu awu, mungàànùtwàdilà maalù a bafùndi bàà maalù malonda bashiileshiilàngane, mu

dyaalumingu dilwalwà edi, bu Mukalenge mwà kwanyisha. Ne ndi muswè kunùtwàdilaci cyangata mu mukanda wa Èkèleeziyà *Wa Beena Lwendu Bàà Ku Cibangidilu* wà Ironside, ne mu mukànda wà *Baabùlònà Yibidì* wà Hislop, mu *Baataatù Bàà Kumpàlà Kwà Nicée, Nsangilu wa Nicée*, kaa, bìdi búngì cyanaànà, mifùndu yà Hazeltine yà èkèleeziyà wa ku cibangidilu, ne ya bakwàbò bashiileshiiàngane, nudi numòna's. Bwà kunùleeja ne mwaba nànsha wùmwe. . .

³⁴ Nànsha mene mu Irlande, mùndi muyè kamòna amu, mu èkèleeziyà udi beena Katolikè bàmubiikila ne mmusantu wa Katolikè amu, Patrick Munsantu, kadi kakwenaku nànsha kasùnsùkila kamwè kàà bwalu bulonda kaaba nànsha kàmwe kàdi kàmba aci to. Mwine Patrick Munsantu awu uvwa ànu mutontolodi cyanaànà wa èkèleeziyà wa cyena Loomo. Kakwènakù kaaba nànsha kàmwe to. Muntu nànsha umwe kèna mwà kutwàlakù bwalu bulonda nànsha bùmwe bwikalà mwà kuleejà ne—ne yèyè úvwa mwena Katolikè to. Yèyè, byèndè yèyè, bilongelu byèndè byònsò bivwa bisanganyibwa mu Irlande wa ku Nord. Pashiishe pàakalwà mukalenge wa bumfùmù bwalàbàle wa cyena Katolikè ewu kubwela mu Angleterre, ki kushipaye beena ku cya Patrick Munsantu binunu dikumi. Ne èkèleeziyà awu ùcidi ànu usanganyibwa mwaba awu leelu ewu, bilongelu byèndè abi, byònsò mu Irlande wa ku Nord.

³⁵ Ne myaba yinùdi nuumvwa bàmba ne: “Patrick Munsantu wàkiipata nyoka yònsò mu Irlande ayi”, nudi bamanyè ne ciwva ncinyi anyi, bulelèlà bwà mu maalu malonda abi pa bwine bwalu abu? Yèyè uvwa mwitabuuje Mpenta, uvwa ne bukolè bwà kukwàta nyòka ne byanza awu, kukwàta nyòka ne byanza. Nènku ki bwà cinyi mbàmbe nànkù, bwalu paabu kubangila ànu apu.

³⁶ Ne cyà ne Peetelo wakapoopediibwa pa nkuruse, mutù mutùma panshi, mu Loomo, aci kaciyènakù mu maalu àà dishipa dyà bàakafwilà diitabuuja to. Nènku ndi mukenkète muntu ne muntu, myaba yònsò, ne mubale bafùndi bàà maalu malonda, byònsò bìndikù paàanyi mèmè ewu mumanyè abi, kadi kakwènakù Mufùndu nànsha wùmwe mwambe ne ní m'Pòlò ní m'Peetelo wàkashipiibwa mu Loomo to. Awu mmèyi maswika. Byàkabangiibwa ànu kùdi èkèleeziyà wa mbangilu wa cyena Loomo awu, kadi kí m'Bulelèlà to. Nwamònu anyi? Bidikù ntùnda ne ngenene. Nèmbwelè mu cyòci aci mu dyalumingu dilwalwà edi.

³⁷ Pashiishe cikwàbò cintu cínkaadi muumvùmvwè bikolè, bàtàmba kucyàmbe, muntu kampànda mmungambile, muyiishi munène wa mutàmbe kumanyika, kwambayè ne: “Mwanèètù Branham, bwà cinyi kwèna ulekelaku bakaji abu mu ditalala?” Yèyè ne: “Udi mumanyè's, bantu's bàtu bàkwangata wèwè ewu bu mupròfetà. Bwà cinyi kuyiku ubàlongesha bintu bitùmbùke byà Nyumà?” Muntu awu udi mwà kwikala musòmbe kaaba

aka. Yéyepù, ndi muswè bwà wèwè kuumvwa eci nùnkù, mwanèètù. “Bwà cinyi kuyikù ùbàlongesha bintu bitùmbùke byà Nyumà, mùtù wèwè ùbànda amu, kadi kubafikisha pààbò, ku dibàndamù, pamutù pàà kwikala kubàmbila byà dibènga kukòsa nsukì yàbò, ne byà mshindù yà nkanzu yà divwàla abi?”

³⁸ Wèwè kaaba aka, anyi uteeleja mukàbà waà mèyi ewu, mwanèètù, piikalàbi ne ncyèna mpeta mùshindù wà kubàpàtula mu kàlaasà kàà bânà banjelo, nèmbàlongeshè makumi makolè mùshindù kaayi? Bòbò nyawuù kabàyi banji kupeta nsòmbelu wètù wa kaneemu ewu ne maalu mîmpè a mu nsòmbelu wabò bóbò, bwà kulekelaku nànsha nsukì yàbò bwà kuleepayi, ne kuvwàlaku nkanzu bu bainàbànza, nèubalongeshe maalu a Nyumà mùshindù kaayi? Nwamònu anyi? Cyà bushùwà. Kabàyi bamanyè byà ntwàdijilu, kabàyi bamanyè ABC miine. Kadi kuteeta bwà kubàlongesha cintu kampànda cyà citùmbùke, kubàpeesha dilongesha dyà cilongelu citùmbùke, pàdibo kabayi bamanyè ABC? Dyàmbedi bânji bàyiilè ABC, nènku pashiishe netù—netùtùngunuke tuye too ne ku biine abi.

³⁹ Mpindyewu, lumingu lushààle nuvwa bapetè muntu mu—munène mu cyambilu emu, bwà kwangatayi kaaba kaanyi. Úvwa m’Mwanèètù William Booth-Clibborn, udi mumanyike, munkaci mwà bayiishi bwònsò ne, yèyè ki mfùmù wa bayiishi; muntu munene, muyiishi munène, munène wa menemene. Bwà kwamba menemene, yèyè ng’umwe wa ku bàà batàmbe bwîmpè bàdiku mu matùnga, ní mpenyi ní mpenyi. Mulumyana awu ùdi mwà kuyiisha Èvànjeeliyò mu myakulu mishìilàngàne kî mmîngì kî mmîngì mwandamutekète, pa nànkù nudi mwà kudifwànyàkijila anu cidìye ciine. Ne yèyè mmuyiishi wa Èvànjeeliyò mu kaabujimà.

⁴⁰ Yèyè ki wàkashààla naanyi mu muyiiki wa dikòkàngana awu, wà ne bayiishi mwandamutekète bàà Église de Christ abu musangu awu. Kadi ní kùvwakù bantu bângàakumvwilà luse, bàvwa mbantu abu paanyimà pàà yèyè mumane kujikijangana naabò. Kacyakacya ncitukù—ncitukù mwanji kuumvwa byà nàka to kacya bândela. Kujuukabò ne dijuuka kadi kubangabo dyaasa lwendu bwà kuumuka’s. Yèyè kuya katwilangana naabò ku mushiku wa mbelu, kwambaye ne: “Pàanyi’s mwà ngeela meeji ne nuvwa baswè kwakula pa dyondopa dyà kùdi Nzambi.”

⁴¹ Kàdi yèyè ùtu ne mèyi mashile be, nànsha nànkù, ànu ne mèyi mashile à dikèma. Ki kubàtwayè ànu mènà ònsò àvwàye mumòne mwà kubàtwa awu, too ne ku “binyònga” ne bikwàbò byònsò, nudi bamanyè’s. Pa nànkù, yèyè, yèyè ùtu ne mèyi mashile à dikèma, nènku aci ki cintu cimwèpelè cidì kùdiye. Bu ne úvwaku mwà kutwisha diine dimanya adi mukèlè ne ndambù wa dinanga, nùnkù’s mbishìilànganekù, nudi numòna’s. Nènku yèyè—yèyè ùdi mwà kwikala kaaba aka. Eyowa’s, kadi cìndì—cìndì muswè kwamba ncyòci aci, nudi bamanyè’s, mùshindù awu, bu yèyè mwà kwikalakù ànu ne kalolo kààbùngi pa bwalu

abu. Kadi, kaa, ekèlekèle, yèyè's ng'Anglais, ne yèyè mwine's udi mwà kwanji ànu kubinduluka eyo.

⁴² Kadi kuya katwilanganaye naabo mu mushikù wà mbèlu, kadi kubafunkunaye munu mumpàla, wàmba ne: “Nwènu badidinge ànu bamuyòbòle kàbìdì,” uvwa mmémè awu, yèyè ne, “nènnwèlè patòòke kumpàla kwà bantu, kadi nnuvwije cyà bushùwà kasùmbù kàà mpundà yà menemene,” mwàkambàye. Uh-huh. Kacya kubangila ànu piine apu ncitu muumvwe bateediibwakweee, nwamònu's. Eyowa's, ncyèna mbadyula bóbò to. Nànsha mèmè pàànyì, mvwa mufwànyine ànu kwikala muditòle. Uh-huh. Eyowa's, bwalu kwàdyàkupeta mùshindù wà kwambaku dyèbè pèèbè díyì to, mwaba wùdì Mwanèètù Booth awu.

⁴³ Muiishi wa nkemenu's, muntu wa maalu malenga, mwena Kilstò mwìmpè, mukezuke, muntu wa nsòmbelu mulenga, bwà cyònsò cìntùku pàànyì mumumanyine, ne ndi mumumanyè kùkaadi bidimu. Ndi mufike ku ditèèlejaku mukàbà wèndè wà mèyì, bìdiye munùyishe abi, pa bìdì bitàngilà mùshindù wùvwà Nzambi wa cijila ne mutùmbùke, ne mutùvwà twètù balediibwe mu mpèkaatù; ne cìvwà muntu mufwànyineku kwenza cìvwà cìfwànyine kutwàla, cìvwà cìfwànyine kwambila Nzambi cyà dyenza. Nwamònu anyì? Nenku aci's cìvwa cilenga cyà bushùwà.

⁴⁴ Mpindyewu, cìvwà cyenze ne ngùikalè muyè pa díbà edi, mvwa mupetè lumingu lwà kujilaku byàkudyà ne kusambila, cìvwà cìnsàkekù ku dyangata dipangadika kampànda.

⁴⁵ Nenku ndi ne mbota mukesè kaaba aka, udi ne cyà kwikala kaaba kampànda, udi ukòsa—udi ukòsa bìmvwà nciyì muswè. Kaa, s'nyèyè ewu. Ki yèyè ewu. Bìndì muswè pa mukaba wa mèyì, ne byùdì kùyì muswè pa mukàbà wà mèyì. Pa nàнку, nwènu bânà bèètù, pùikalà mukàbà wèbè wa mèyì munyanguke ndambù, ee, kwikadi. . . Udi mwà kukòsa kuumusha citùpà aci. Mpindyewu, kadi mwòmò amu, mùshindù awu, bààbùngì biikàle munkaci mwà kukwàta, pàvwàbi ne Mwanèètù Mercier ne bakwàbò nkààyaabù ki bàvwà mwa, bafwànyine kukwàta mikàbà yà mèyì, mòna's, nùнку's mvwa mbàmbila bwà kukosapu bitùpà bivwà kabiyi bikèngediibwa kumpàla kwà mèmè kuyilekela yìpàtuka yiya's. Kàdi mu eci, muntu kanà yònsò ùdì mwà kuyìkwàta mpindyewu, nudi numòna's, muntu kanà yònsò udi muswè kuyìkwàta awu ùdì mwà kuyìkwàta. Pa nàнку bìdì bikèngela mèmè—mèmè ndikoselebi mèmè mwine, ngènzela ku mbota ewu apa mene, bìndì nciyì muswè kwamba abi, anyì, kubilekela bìya pa mikàbà yà mèyì ayi.

⁴⁶ Bwalu, kùdì bìmwè bintu bìndì mèmè mwà kunwàmbila nwènu kaaba aka, bìndì mu bushùwà bwà bwalu nciyìku muswè bwà bantu kupàtuka naabi to. Bwalu, bàlekèlaayi. Mpofò yèyè ùlombola mpofò nendè, nànsha byà munyì, bònsò nebàkapòne mu mùkidì, nudi numòna's. Pa nàнку, kanwikadikù

nwabàlèndwisha to. Bu mwà kambà Yesù ne: “Kanùlèndwishi Bafaalèsà abu to.” Yèyè ne: “Bòbò bàkèba—bòbò bàkèba mfranga yà citàdi, pwekà nda ukeele ndobo mu mbù, nènku ùkwatè mushipa wà kumpàla awu, nènku ùpàtule cinjanja cyà mfranga cìdi mukana mwàwù aci, ùye ùbàfutè.” Yèyè ne: “Kanwikadi—kanwikadi nwabàlèndwisha to, nùbàlekèle ànu cyanààna.”

⁴⁷ Kàdi mu nsòmbelu wanyì mujimà, kacya ànu pàncìvwà mwànà mutekète, ntu . . . Mukalenge ukaadi mumpèeshèpèeshe bikèèna—kumòna misangu yònsò, bitùdi bamanyè mwab’ewu mu èkèleeziyà emu ne, ndi mutwishiiibwe, mu ditunga-mwikalà kàbìdi mikàbà yà mèyi eyi ne cyà kupa, bwà bikèèna-kumòna. Kàbìdi ne Bible ewu mubuulula kumpàla kwànyi, ne kumpàla kwà Nzambì Mwena kumpàla kùndi mwimàne, kacya ncìtukù mumanyè nànsha cimwè cyà ku byòbì cikaadiku cipangile to. Bitu misangu yònsò ànu bipwàngane.

⁴⁸ Nènku ndi mupete cikèèna—kumòna kukaadi ndambù wa mbingu, mbingu mitwè bu ku yisàtù nànkù awu, mpindyewu, mu diibìdi dishàa— . . . dilwalwà edi, cyòci aci kuntùma ku binù, ne ku dipàtuka kuya mu mwaba wa cipèèla, bwà kujila byàkudyà ne kusambila. Ki mèmè kuvwala (bu mùvwàku mashika) bilàmbà byà mwinshì byà bujitu byà kabìyi bìpìcisha mashika to, bwà ngaamòna mwà . . . byà kuvwàla mu ngendu yà bulembi, bwà ncìikadi ngàlwà kufwà ne mashika, lwà mu nyongolo wanyì amu ne mu meetù. Nènku mèmè kuyaku, kabìyi . . .

⁴⁹ Muntu kampànda kwambayè ne: “Èè, Mwanèètù Branham, uvwa muyèku bwà kakeba anyi? Bivwa bikèngela bwà wèwè kwikala muyè kakèba cikèèna—kumòna cyà kùdi Mukalenge’s.”

⁵⁰ Mèmè ne: “To, kwèna uya . . . Kwèna ucyènza mùshindù awu to. Kwèna mwà kukòka cintu kùdi Nzambì ku bukòle to.”

⁵¹ Nwamònu’s, ki bwà cinyì bantu bàtu ànu batùngùnùke ne kwamba, dìbà dyà miyiiki yà bàbìdi, bamba ne: “Konkàku Mukalenge. Shààlakù wèwè ànu ne bwalu abu! Shààlakù wèwè ànu ne bwalu abu!”

⁵² Ngàkapeta Dìyi dyà kùdi Mukalenge bwà kutwàdila Mwanèètù Neville, pa bìdi bitàngilà bipròfetà bitùye wenzela bantu bònsò bàtù balwa ku cyoshelu eku. Nzambì kumwambila, kumutàndisha bikolè bwà bwalu abu, nwamònu’s. Kanwikadi nwenza nànkù to, nenùmusàkè ku dibyènza mu musunya ne dìbà adi nenwikalè ne mupròfetà wa mashimi. Nwamònu anyi? Nwamònu’s, numulekelaayi ikalè wènza ànu mùdi Nyumà umulombola mwà kwenza amu. Nwamònu anyi?

⁵³ Kanwikadi—kanwikadi nuteeta kukòka cintu nànsha cimwè kùdi Nzambì ku bukòle to, bwalu kanwènakù mwà kucyènza to. Yèyè neàkulè ànu . . . Bu Baalàmà, mupròfetà wa difutu awu, wàkamba ne: “Ndi mwà kwamba aànu cìdi Nzambì

ùteeka mukana mwànyì aci. Bwà cyanààná, ncyéna mwà kucyàmbakù to.”

⁵⁴ Nènku ncintu cyôci cimwecimwe aci, mêmè ndi munange ndongolwelu udibò nendè mpindyewu ewu, bwà ngaamòna mwà kujandula ne bwalu bùdi cinyì, ànu cidì Mukalenge mufwànyine kwamba bwà kwenza aci. Aci’s ncimpè be.

⁵⁵ Kadi Yesù wàkaya mu cipèèlà, bwà kujila byàkudya, paanyimà pàà Nyumà Mwímpè mumanè kulwa pambidi Pèndè. “Yone wàkafila bujaadiki, pàakamònàye Nyumà wa Nzambi ùlwa pambidi Pèndè.” Nènku Yéyè wakuujiibwa tètè ne Bukolè bwà Nzambi, Nzambi munda Mwèndè, ne pashiishe Yéyè kuya mu cipèèlà bwà kujila byàkudya, paanyimà. Kì nkumpàla to, bwà ne Nyumà Mwímpè alwe pambidi Pèndè, kadi Yéyè wàkayamù ne wakajila byàkudya *paanyimà* pàà Nyumà Mwímpè mumanè kulwa pambidi Pèndè. Nwamònu anyi?

⁵⁶ Nènku mpindyewu, mu cikeena-kumòna aci, ndi mufwànyine kwamba nùnkù. Nkaadikù muciteelè musangu ùmwè. Nkaavwa muswè kucikosa pa mukàbà wà méyì, kadi ngeela meeji ne nèncilekèlè ànupù. Ndi. . .

⁵⁷ Tuvwa bu pa dîbà isàtù nànkù awu wa bufùkù, ngeela meeji. Mvwa mujuuke, ne mêmè kutangila mwab’awu, kumpàla kwànyì aku, nènku mvwa ngènda mpweka mutàngile ku Yadènè. Bivwa bimweka ànu bu ne mvwa mwimane pa karta kàà Palestine, ne mwikàle ngènda mpweka mutàngile ku Yadènè. Nènku kumwèkabi ànu bu ne mvwa ngùmva musamba wa ne, *Ndi Mpweka Mutàngile Ku Yadènè* awu, muntu kampànda mwikàle ùwimba. Kàdi pàngàakaseemenà pabwìpi ne musùlù awu, dyà ntangila paanyimà e kumòna njila wùmvwà muvwile, kadi nkàavwa mwenze byàbisàtù bìbìdì byà njila bwà kafikakù, ku Yadènè aku. Nènku ntùpula mèsù ntàngila dyàmwàmwa dyà Yadènè, ki mêmè kwamba ne: “Kaa, Nzambi àtumbè, ànu dyàmwàmwa menemene’s ki mùdì milayi yònsò yisanganyiibwa! Mulayi ne mulayi wònsò wùdì wùsanganyiibwa mu Buloba bulaya abu.”

⁵⁸ Ki dîbà adi mêmè kwalukila mu mêmè. Ki mêmè kudyàmbidila mundamunda ne: “Bìdikù mwà kwikala byenzèke bwà mêmè kwikala. . . bìdikù mwà kwikala byenzèke ne mêmè ngìikalè ndoota anyi, bu mùdìbi ne tudì mèbà a bufùkù?” Nwamònu’s, cikeena-kumòna ncintu cyùdi umòna ne mèsù èbè awu matàbàle, ànu mùdì cilòòtà amu, wèwè mwikàle ucitàngila buludi, ne wèwè mwikàle—wèwè mwikàle mumanyè ne udi mwimàne bu mùdì pa cibumbà cyà ku cyambilu apa, ne mwikàle—mwikàle mwimàne kaaba aka, kadi nànsha nànkù mwikàle umwèka bu udi mu cilòòtà. Kùdi. . . Kwèna mwà kucyùmvwija to, kakwèna mùshindà wa kucyùmvwija to. Nwamònu’s, mbyenzedi byà Nzambi. Ne njila yà Nzambi

kayitu mwà kuumvwijiibwa to. Bìdi bìkèngela ànu kuyìtaba ku diitabuuja.

⁵⁹ Pashiishe pâmvwà mwanji kusòmba mwaba awu ndambù, ku luseke lwà nkwasu ewu, pashiishe, dyàkàmwè, ki cyòci cidi cyàlukila cyàkàbìdi eci. Nènku ki mèmè kumanya dībà adi ne cìvwa ncikeena-kumòna. Nènku dībà adi pàngààbwedì cyàkàbìdi mu cikeena-kumòna, kumwèkabi bu ne mvwa mutùntùmùnyìibwe kuulu ne musòmbe mu—mu cibeeba kampànda, cibeeba cibùmbàkane, ne mwanèètù wa balùme kampànda. Ncìvwàku mumanyè ne mwine mwanèètù wa balùme awu ùvwa nganyì to. Mèmè kukènzàkana. Mèmè kwamba ne: “Mpindyewu ngátwishii bu ne ngaamanyì ne eci ncikeena-kumòna, Mukalenge Nzambi ùdi kaaba aka.” Ki kumwèkabi ànu bu ne bantu bwònsò bàvwa ne bwòwà’s. Mèmè ne: “Bantu bwònsò bàdi ne bwòwà nùnkù bwà cinyì?”

⁶⁰ Ki dīyī kampànda kulwadi ne kwambadi ne: “Kùdi njuwu ya dikèma mu matùkù aa. Kùdi cintu kampànda cyà cibi be cidi ciikàle lufù pààkutuutàci.”

⁶¹ Ki mèmè kuumvwa bisoosà binyunga bu byendelapu, ne dyà ntàngila nùnkù, kàdi ki kamàngàlà wa nyòka munenaanenaale ewu wènda ùdikòka mu bisoosa amu. Mèmè kwamba mundamunda ne: “Mpindyewu, bu mùdìbi ne eci ncikeena-kumòna, nènku nèmmonèbi cidi nyama ewu—ewu anyì nyama wa lwonji ewu.” Ki yèyè kudikoka too ne mu cibeeba amu. Nènku ndi mwenzè ànu mmutwìshila mèsù, mèmè kumanya ne ùvwa nnyòka wa mambà. Mpindyewu, nyòka wa mambà ùtu nnyòka wa mu Afrike, utu usùme ne mènù a lulengu lwà lufù kutamba bintu byònsò bitùku ebi. Kakùtukù cintu nànsha cìmwè cyà lulengu bu mùdi nyòka wa mambà to. Nènku nyòka, mu bushùwà bwà bwalu, ùdi cimfwànyì cyà mpèkaatù, lufù. Nwamònu anyì? Nènku kùdi. . . Tutu mu ditùnga edi, ne nyòka wa nkànga, ne wa ntòòkà, ne wa lwàsà, yàbùngì yà ku nyòka ayì, yitù ne, wèwè kuyi ne bukolè bwà mubidi to ne umwe wayì mùkusùme, ncifwànyìne pàmwàpa kukushebeya, kadi ngwèwè kuyi mupete dyàkàmwè bwanga bwà mùshindù kampànda to.

⁶² Ne pashiishe—pashiishe patùdi tubwela mu Afrike ne mu Inde, tudì tusangana nyòka wa mpyapija. Kùtu mpyapija mufiike, awu ùtu nyòka mubì, ùtu pèndè yèyè awu ne mènù a lufù. Nènku kùtu mpyapija wa kalaabi, udi mumutambidile yèyè awu kule ne kule. Nènku mpyapija wa kàlaabi yèyè, muntu udiye musùme awu ùdi ufwà lufù lwà lwenza bwòwà, ùdi ùfwa bwà dipanga mwà kweyela. Ùdi—ùdi upacisha njila wa mweyelu. Nènku yèyè—yèyè kèna mwà kweyela to, ùdi ùshààla ànu mutubùle mukana ne ùkòka lupeepèle ne ùteeta bwà kweyela, kàdi ùfwa mùshindù awu. Ne nyòka wa mùshindù awu ngukààvwa ànu mwámbe kusuma Billy Paul, patwàkasanganà nyòka awu, mu Afrike.

⁶³ Ne pashiishe—pashiishe kùdi kùlwa mambà, yèyè ndufù. Ànu pàdiye. . . Yèyè udi lukasa lwà dikèma mu mùshindù wà kuyiku mwà kumumòna to. Ùdi ùlandala pamutù pàà bisoosà apu ne ùdikùpa ne lusongo lwà mukilà wèndè awu. Ànu ne, “huush,” mumbè muye! Yèyè udi ùkutàpila mu mpàla, pa ciibidilu. Ùdi wimana kuulu menemene kàdi ùtuuta bikolè. Nenku, pàdiye ùkusùma apu, wèwè udi weyela ànu misangu mikesè too ne pàdi bwèbè bwalu bùtùuka. Wèwè udi ukùdimuka bikolè. . . Kènà ànu ùkutèngùnuna cyanààna, ne lulengu lùbwèla mu musùlù wà mashi kwàjiki to, lùdi lùbwèla mu tujilujilu, mu byònsò, wèwè umbà ufwà ànu mu tusùnsùkila tukeseè twà kasunsa cyanààna. Nsongaalume yà kuntwaku, nsongaalume milombodi ayi, wèwè udi mwa kwamba ànu ne: “Mambà,” bôbô badi mwà kukùmakanangana mitù, kwela mikunda, bwalu cidi—cidi ndufù ànu mu tusùnsùkila twà kasunsa tukeseè cyanààna, nwamònu’s, pàdiye ùkusùma apu.

⁶⁴ Kadi ki yèyè uvwa mu cibeeba ewu. Mundamunda mèmè kwamba ne: “Ee, ki lwànyì lwàkùmbanyi elu.” Pa nàнку mèmè kumutàngila. Ki kuntàngilayè ne mèsù a lwonji, ne kudilakaye ne kaaludimi kèndè aku, nènku ki yèyè ulwàlwa ewu. Kadi mmwenze ànu ùfika pabwîpi naanyì menemene. . . Ùvwa ulwa lubilu, kadi pashiishe kubangaye kulwa fwèfwèfwè fwèfwèfwè, ne kuzakalala ànu nàka kadi kwimana, ne dîbà adi cintu kampànda cívwa cimwimànyikile mu ntàntà. Kàvwa ne mùshindù wà kunsùma to. Nenku ki kunyungulukilaye lwà ku luseke lukwàbò, kuteetayè bwà kuseemenena lwà ku elu luseke. Ki kwasaye dyalukila cyànyimà bwà kubangululaye, ne bwà kuvumaye ne kudyela mùndi, kubangaye kulwa fwèfwèfwè fwèfwèfwè, ne pashiishe kwimanaye, ne pashiishe kudinyukululaye mùshindù ewu kadi kwalukilaye cyànyimà. Kàakapeta mùshindù wà kunsùma to.

⁶⁵ Pashiishe kukùdimukayè e kutangilaye mulunda wanyì, nènku ki kudyèlayè mu dilumbatangana ne mulunda wanyì awu. Ki mèmè kumòna mulunda wanyì awu ùtùpika ùdyèla muulu mu lupèèpelè, pampàla pèndè ne pampàla pèndè ne pampàla pèndè, ùteeta, kadi cintu aci ciikàle cimutuuta. Mèmè kwamba mundamunda ne: “Kaa, cyòdi cididìnge ànu cimusùme, s’neciikalè lufù lwà cikòsò. Kabyèna bikèmesha to mùdi bantu bwònsò biikàle ne bwòwà bukolè, bwalu eci cintu cyòci cididìnge cikusùme ndufù lwà cikòsò.” Kadi—kadi cívwa ànu cimutuuta mùshindù ewu, ki mèmè kwela byanza muulu, kwamba ne: “Éyì Nzambi, ikàlàku ne luse kùdi mwanèètù wa balùme!” Mèmè ne: “Wàwa nyòka yèyè ànu mudidìnge mumusùme, s’neàmushipe.”

⁶⁶ Nènku ànu pa dîbà adi ki nyòka awu kukùdimukila kùndi pàngàakambà nàнку awu apu, ne kuntàngilayè cyàkàbìdì. Ki Dìyì kufuminadi kuulu kwànyì aku ne kwambadi ne: “Udi mupèèshìibwe bukòokeshi bwà kumuswika, yèyè udi mutàmbe bubu awu, anyì wa mùshindù kanà wònsò.”

Ki mêmè kwamba ne: “Èè, Nzambì, cîndi ne cyà kwenza ncinyi?”

⁶⁷ Yêyè ne: “Kùdi cintu cîmwèpelè cyûdì ne cyà kwenza: Udi ne cyà kutàmba kwikala ne meeji matòòke.” Nwamònu anyi? “Udi ne cyà kutàmba kwikala ne meeji matòòke.”

⁶⁸ Mêmè ne: “Ee, Nzambì, mfwilèku luse bwà dipanga dyànyì dyà kwikala ne meeji matòòke, kadi enzaku bwà ngiikalè ne meeji matòòke.” Nènku pângàakeelà cyàkàbìdì byanza byànyì muulu kùdìYe, kulwaku Cintu kampànda cyà cinène pa mêmè, ne kuntùntumunaci ànu naka, kumwèkabi ànu bu ne mubidi wànyì mujimà wùvwa muuja ne Cintu kampànda.

⁶⁹ Ki mêmè kutangila nyòka awu. Ki dîbà adi yêyè kwasa lwendu mutàngile kùndì, kadi kayi ànu mwà kucyenza to, nànsha nànkù. Ki mêmè kwamba ne: “Sataana, mu Dîna dyà Mukalenge Yesù Kilistò, ndi nkuswika.” Ki nyòka awu, mwîshì wa bleu kubangawu kubuuka wupatuka munda mwèndè, nenku yêyè kudyenza cikàtà mwenze cimanyinu aci cyenze bu S, dileetà dinène dyà S mukùdimane, cimanyinu cyà *ne* [&—Muf.] *Ne* mbwena kwamba ne “swika ewu nùnkù anyi cyònsò cidi cishààdile kùdiye aci,” bwalu yêyè nguvwa mutàmbe bubì. Mwîshì wa bleu kumatawu wupatukila munda mwèndè, ne mukilà wèndè ki kumwowawu ànu yêyè mwine too ne ku lufù mumujingile ku mutù, pààkenzàye S wèndè mukùdimane awu apu, cimanyinu cya *ne* aci (cyenze bu mutwangaji, nudi numòna’s) kumwowawu too ne ku lufù. Ki mwanèètù wa balùme awu kupàndukayè.

⁷⁰ Ki mêmè kuya kadi kumubozà’s. Mêmè kwamba ne: “Mpindyewu bikèngela njandule bwalu ebu, bwalu ncikeena-kumòna.” Kàdi ki mêmè kukùma bintu pa—pa cintu aci, ki kukùdimukaci mùshindù *ewu*, kumwekaci bu cikwàcìlu, pa cikwàcìlu cyà lumwènù pa mbìdikà, ne kucivwija cishile mùdì ntàlatalà. Ki mêmè kwamba ne: “Anji elàbi meeji ku cyòcì aci, mùdìci cyenzeke lùkàsà lwà dikèma! Mwîshì wa bleu awu wùvwa mmwoyi, ne bikwàbò byònsò, wàkamuumuka, bimwenji byònsò, ne bìlwe kwandamuka byà mmwènù.”

⁷¹ Ki ànu pa diine dîbà adi, Dìyì kulwa cyàkàbìdì dyàmba ne: “Wèwè’s udi mwà kumusuulula kàbìdì.”

⁷² Pa nànkù mêmè kwamba ne: “Nànkù, Sataana, bwà mêmè kumanya, ndi nkusuulula.” Nènku paakenzàye aci, kubangaye kwalukila cyàkàbìdì ku mwoyi, ùdìnyònda. Ki mêmè kwamba ne: “Ndi nkuswikulula, mu Dîna dyà Yesù Kilistò.” Nènku pààkenzèkà aci, mwîshì kupàtùkawù cyàkàbìdì munda mwèndè, nènku yêyè kudyòwa cyàkàbìdì ne kwandamukayè cyàkàbìdì ntàlatalà.

⁷³ Ne pashìshe pààkenzàye nànkù, Dìyì adi kwambadi ne: “Mpindyewu, udi ne cyà kwikala ne meeji matòòke kutàmba

aùdì naawu awu, bwà kwenza cyôci eci.” Dìbà adi cyôci kungumuka, ne mèmè mvwa mwimane mu cibambalu amu.

⁷⁴ Paanyimà pàà katanci kakesè, mèmè kuumvwa ngonga wudila, ne mukajàanyi ùkaavwa. . . munkaci mwà kujuuka ku tulù. Bânà, nutu ànu bamanyè mùtùbi amu, ngeela meeji, kwènù ku nzùbu aku, umwe wàmba ne: “Cíngàavwàlà leelù ncinyi’s, maman? Mikàndà yànyi yidi penyì—penyì’s? Ne cìndì mwenze ncinyi’s?” Nudi bamanyè. Wèwè, ànu mùdì dìkù kanà dyònsò edi, kùyìkù mwà kudyumvwa wèwè mwine paudi wela meeji to, bikolè be, bu mùdìbo bwònsò bàteeta bwà kudilongolola dyàkàmwè.

⁷⁵ Nènku—nènku ki mèmè kudifinda kubwela mu nzùbu wa mudimu, ki mèmè kutwà binù, ne kwamba ne: “Mukalenge Yesu, ncyèna mumanye bintu ebi to. Kàdi cìndì ne cyà kwenza ncinyi? Ne bânà pààbò nebàmbiikilè bwà kabàfila mu tùlaasà mu katanci kakesè emu. Cìndì ne cyà kwenza ncinyi?” Ki mèmè kukènzàkana, ne Bible wanyi ùvwa mutèeka mwaba awu, ki mèmè kwamba ne: “Mukalenge, bu Wèwè mwà kumfwà kwòkò luse. . .” Mèmè ncitu ngiitabuuja byà kubuulula ànu Mifùndu cyanààna, kàdi kwangata cintu kampànda mu Bible kàdi kucyàmba to, kàdi, kùtu ànu misangu kampànda yitù Nzambì mwà kukukankamikaku ne cintu cyà bu nàнку awu. Ki mèmè kwamba ne: “Mukalenge, mu bwalu bwà lùkàsàlùkàsà ebu mpindyewu mene, kumpàla kwà Nyumà Webè kungumukaYe, kadi mèmè—mèmè nciyi mumanyè cyà dyenza to, bânà nebànji kwikalapu munda mwà dìbà dijimà, kumpàla kwà kwikalabò bayè, Udiku mufwànyine kundeeja anyi? Pìikalàbi ne cyôci aci cìvwa ncintu kampànda cyùdì Wèwè uteeta bwà kungambila, Taatù wa mu Dyulu, nàнку ngambilàku.”

⁷⁶ Ki mèmè kwangata Bible ewu ne kumubuulula mùshindù ewu, ne cyàlà cyànyi cìvwa pa Kolintò wa Kumpàla, nshapità mwi5, mvensà wa 8, mùdì cintu kampànda cibadiibwa cintu kampànda nùнку ewu ne: “Panùdì nulwa. . .” Mèmè mvwa ndilongolola bwà kujila byàkudyà, bwà Mukalenge. Mvwa muMwambile ne mvwa mpàtuka bwà kuya kajila byàkudyà. Mbambe ne: “Panùdì nulwa ku difesto edi. . .” Bwalu, kujila kwà byàkudyà mu mubidi ewu ndifesto ne Mukalenge. Tudi bamanyè aci. “Pa nanku panùdì nulwa ku difesto edi, kanùlu ne lwevènyà lukulukulu anyi ne lwevènyà lwà budimù nànsha, ne bikwàbò; kadi nùlwe ne dyàmpà didì kadiyi dyela lwevènyà dyà meeji matòòke ne bulelèlà,” ànu menemene cìvwàYe mungambile mu cikeena-kumòna aci’s. “Nùlwe. . .” Nzambì m’Mulumbulwishi wanyi wa kakùyì tuseku to. “Nùlwe ne dyàmpà didì kadiyi dyela lwevènyà dyà meeji matòòke ne bulelèlà,” didì Dìyi.

⁷⁷ Dìbà adi mèmè kuumvwa cìvwàYe muswè kwamba aci, pàvwàbi ne Yèyè, kukaadi bidimu, pàngàakamòna Bible ùpweka, ndi naaci cìfùnda mwab’ewu mene, ùpweka, ne

cyanza kufùminaci mu Dyulu ne kufunkunaci mu Yoshuwa ne kubalaci mvensà citèemà yà ntwadijilu ayi, ne kwimanyinaci mwaba awu: Mbwena kwamba ne, Yoshuwa wakalwa mu cipeela, kàdi kàvwakù mwenze . . .yèyè ukaavwa mudilongolole bwà kucyeenza, pàakafikàye pabwìpi ne Yadènè, Nzambi wàkamubiikila ne dìyì dikolè, kwamba ne: “Ditùkù edi ndìndì Mémè mbanga kukutùmbisha kumpàla kwà cisàmbà.” Nènku pashiishe kusabwishayè bânà bàà Izaleela Yadènè, ne kubàbwejaye mu buloba bulaya mùvwà . . .kubàpèeshayè, kubààbanyinayè, buloba bulaya abu.

⁷⁸ Mémè kuya mu diitu, ne kusambila, kusambila ne kujila byàkudyà. Nènku, mpindyewu, mémè kwalukila ku mucu kùmvwà mutuutakeene, mwaba wùvwà nshìndì ayi yisanganyibwa awu, yinùkaadi bumvùmvwè mu Mayiisha makwàbò ayi, nwamònu’s, mwaba wùvwà nshìndì ayi yisanganyibwa awu. Nènku mémè mwimane mwab’awu, tukàävwa bu pa dîbà isàtù anyi inaayi wa bufùku jaajaaja nànkù awu, paanyimà pàà mémè mumane kuya ngenda ntetuka mu bisuku mwikàle ne bukènkè bùmvwàku mwà kumòna naabu abu, bwà kufika ku mwine mucu awu, mulwe pa bwebwebwe bu mùmvwà mulombòdìibwekù. Ki dîbà adi mémè kutuutakeena Nendè. Nzambi, wankwacishaku bwà mémè kwikala ne nsòmbelu wa lulamatu!

⁷⁹ Nèngìikalè mwa kubala Mifundu yànyì mpindyewu. Ndi mwangate kubala eku mu dindà emu, kufundìibwe apa mu mwaba kampànda, kaa, ncyòci eci, Yoshuwa, mu Mukàndà wà Yoshuwa, nshapità wa 10. Bwenu nwènù bìikalà mwà kubala nwenda nundonda, anyi, nshapità wa 10 ku mvensà wa 12. Kadi ndi ne dîbà ànu dimwèpelè cyanàànà.

⁸⁰ Ne pashiishe, ngeela meeji, ncyèna mutwìshìibwe to, kadi ndi ngeela meeji ne Billy mmwambe ne mmwabànye twarta twà disambila mu dindà emu. Mmwambe ne: “Katùvwa twàbùngì menemene to, kàdi ànu bàmwè bantu mbàdì baswè bwà bàbàsambidile.” Nènku bwònsò bàdì ne twarta twà disambila abu, elàayi byanza byènù muulu mpindyewu. Ee, abi mbìmpè. Kaa? Ee, eyo, mbilenga. Eyo.

Mpindyewu mvensà wa 12 wa nshapità wa 10 wa Yoshùwà.

⁸¹ Nènku mpindyewu, vùlukàayi mpindyewu ne, mu matùkù àlwalwà kumpàla, mu dyàlumingu dilwalwà edi ndi muswè kwakula pa *Bwena Kilistò Bùbèngangana Nè Dikuukwila Dyà Mpìngù*. Nènku dîbà adi nènzwàmbilè kubangila pa dîbà adi ne, Mukalenge mmundombòle bwà kuyiisha diyiisha dyà Noèl, anyi kî mmundombòle. Mbimwèke ànu bu ne ndi ne diyiisha pa mwoyi wànyì bwà bantu, mu Noèl. Nènku dîbà adi nènshiishe kunnwàmbila kubangila pôpò apu.

⁸² Mpindyewu tudì tubangila kubala ku mvensà wa 12 wa nshapità wa 10 wa Yoshuwa:

Pashùshe Yoshuwa wakaakula ne MUKALENGE mu ditùkù òwà MUKALENGE mufile beena Amòlà mu byanza byà bàrà Izaleela, ki kwambaye ku mèsù kwà Izaleela ne: Wèwè díbà, imana pa Gibèòrà; ne . . . Wèwè ngondo, mu cibandabanda cya Ayàlòrà.

Nènku díbà dyakiimana, ne ngondo wakashaala kaaba kàmwè, too ne paakadisombwela cisàmbà kùdi mwena lukuna waci. Eci kî ncifundùbweku mu mukàndà wà Yashèlèlà anyi? Pa nànkù díbà dyakiimana munkaci mwà dyulu, ne kadyàkalwijakaja bwà kuya kabwela to pabwipi ne ditùkù dijimà.

Tèèlejààyaaku mpindyewu:

Nènku kakwàkadiku ditùkù nànsha òmwè bu dyòdi adi to kumpàla . . . anyi paanyimà pàadi, díkaavwàku MUKALENGE mutèèlèje díyi dyà muntu: bwalu MUKALENGE wàkalwangeena Izaleela mvità.

Nènku Yoshuwa wàkaalukila, ne Izaleela mujimà pàmwè nendè, ku cituudilu ku Gilègàlà.

⁸³ Nzambi àswèku àsakidile mabènesha Èndè ku Díyi Dyèndè. Mpindyewu ndi njinga, cyòci ciikàle diswa dyà Mukalenge, bwà nwènu kushààlaayiku naanyi bwà ndambù wa tusunsa. Ndi muswè kwangata cyena-bwalu, cicolè bwà kucyùmwa, cyà pabwaci, pa kubala kwà Mufundu bu nànkù. Nènku ndi dijinga ne ntèmà yènu ne—ne disambila dyènu munda mwà díbà edi. Ndi muswè kwangata cyena-bwalu, cyà mwaku ùmwè ne: *Cidikà*.

⁸⁴ Kadi, kumpàla, ndi muswè pàmwàpa kuumvwija cidi cidikà ne ncinyi. Mu nkònga-myakù wa Webster, ùdi wàmba ne *cidika* mbwena kwamba ne “cintu kampànda cyà kabàyiku mwà kwitabuuja to, kàdi cilelèlà.” Ki cidikà ncyòci aci. Cintu kampànda cidi cyàmba kwikala cyònsò ànu pambèlu pàa ngeelelu mujaalame wa meeji, kaciyikù cifwànyine kwikala nànkù to kadi pàaci ciikàle nànkù; ki cidikà ncyòci aci. Mpindyewu ndi muswè kushààla ndambù wa tusunsa pa myaku eyi ne, cidikà.

⁸⁵ Mpindyewu tudi ne bintu byàbùngi bitùdi mwà kutèèla ne mbidikà. Cintu cìmwè cìndi muswè kutèèla, cidi ne, buloba ebu bwòbu bwine’s ncidikà. Mùshindù wùdìbu bwimàne’s ncidikà.

⁸⁶ Makèèlèlà dilòlò awu mvwa nyiikilangana ne mwanàanyi wa bakàji, Rebekah, udi mu cilongelu cibàndile awu. Ne mèmè mvwa munkaci mwà kulonga mu Mifundu kaaba aka, ne—ne mvwa mmwambila pa kubala kwà ewu—ewu mvnsà kaaba aka. Ki yèye ne: “Papa, mu bushùwà bwà bwalu Yoshuwa’s wakiimanyika buloba, kî mmwòmò anyi?”

Mèmè ne: “Ncyèna mumanyè ne cyàkiimanyikàye ncinyi to. Yèye wakiimanyika díbà.”

87 Yèyè ne: “Yèyè kàvwa mwà kwimanyikaku dîbà to, bwalu dîbà kaditu dyènda nànsha.”

88 Mémè ne: “Nànsha nàнку, cimfwànyì cyàdì's cìtu cikosolola buloba, nenku cyòci aci's ki cyaàkiimanyikàye.”

Yèyè ne: “Ee, nàнку Nzambì wàkiimanyika buloba's.”

89 Mémè ne: “Dîbà adi, bwà muntu udi mupange kwitaba ne Nzambì ùdikù, cìdì cyènzekà ncinyi bu byòbì mwà kwenzeka ne buloba bwimanè ne bújimijè bukolè bwàbù bwà dikoka dyà bintu abu? S'mbufwànyìne kudyèla mu cibwàshibwàshì bu—bu mùdì mùtooto, ne missiles yàbù's mmifwànyìne kupòna too ne mu ntàntà wa nkàmà yà miliyaalà ya bidimu byà bukènkè mu cibwàshibwàshì.”

90 Kadi Bible mmwámbe ne: “Dîbà dyàkiimana, ne dyàkashàala pa kaaba kàadi munda mwà ditùkù dijimà.” Mémè ndi nciitabuuja. Mémè ndi nciitabuuja. Ncicimbè ne kaciyi cyà biitabuuja to, kadi m'Bulelela.

91 Nèнку ndi nnulomba nùngambìlaayi, lusongo lwà buloba ndwèpì, m'Pòle Nord anyì m'Pòle Sud? Nwámanyi munyi, pèènu mu cibwàshibwàshì? Nudi nwamba ne: “Pòle Sud ngudi kwinshì, mwinshì mwètù twètù.” Bòbò's badi bèela meeji ne Pòle Nord ngudi kwinshì, mwinshì mwàbò bòbò. Nwamònu anyì?

92 Bwòbù mbwimàne mu cibwàshibwàshì, mu kajèngù kakesè kàà kapeepà, pàdìbu bùyùnguluka mu lubilu kampànda lwà kilomeeta cinunu ne nkàmà yisambòmbò ne byà mu njila ku dîbà dimwè apu. Bwalu, kùdì kilomeeta binunu makumi àsàtù ne mwandamukùlù ne nkàmà yinaayi anyì binunu makumi ànaayi mibùyùngùlùkile, kadi bwikàle bùyùnguluka mu mèbà makumi àbìdì ne ànaayi, pa nàнку aci cìdì cyèzà ne bwikàlè bùyà lubilu lupite pa kilomeeta cinunu ne nkàmà yisambòmbò ku dîbà dimwè, mu lwendu lwàbù lwà dinyùnguluka amu. Ne bwòbù kabùtu bupangilaku to, bùdì bufika ànu pa dîbà jaajaaja. Pòpò—pòpò apu ki pàdìbu búsanganyiibwa pa équateur, kùdìbu bùyùngulukila, kabùyì búpangilaku kasunsa nànsha kàmwè to; bujaalàmijìibwe ànu pa dîbà jaajaaja, bwimàne mu lupeepà. Aci cyòci kaciyi cidikà to, mémè ngudi nciyi mumanyè ne cidikà ncinganyi to. Mùshindù wùdìbi byònsò biikàle ndongolwelu yà mu dyulu, mùshindù wùdìbi ànu bijaalamijìibwe pa dîbà jaajaaja, bipwàngàne ànu menemene; mu mùshindù wà ne, mu bidimu bìcìdì bilwa kumpàla, bidimu makumi àbìdì anyì makumi àsàtù kuumukila ku mpindyewu, beena maalu à mamanya badi mwà kumòna dilwa dyà lundimbà lwà dîbà ne ngondo, bìpitangana. Ne biikàle mwà kunwàmbila ne, mpa dîbà kampànda pààpitanganàbi, ne mpa dîbà kansanga dyàbangà lwine lundimbà alu.

93 Dîbà dyà ku dibòko ditùdì twètù naadi nànsha diikàle dilenga dyà bishi, dyà dyàmba dîbà dijaalame... Ndi naadi mwab'ewu òvwàbo bampèeshe mu Swisse, bu màtàpishi,

pâmvwâmu apu. Mushinga wàdi ngwà wipacila ndola nkàmà yisàtù, mu mfranga yà beena Amerike. Ndidibo bampèeshe. Kî nkwanji kupita lumingu lùdibi kabìyi bìkèngela bwà kwakajulula dîbà to; mèbà ònsò a ku cimanu aa, kakwènaku cintu nànsha cìmwè cidì muntu mwà kwenza cidì cipwàngàne mùshindù awu to. Dyòdi adi, mu bidimu bikesè cyanaànà, nedìikalè dikaadi disunsuke ne bwàdi butùùke. Padìdi dyènda dilàala matùkù, nedìikalè dyènda dibìipa dîbà dyònsò. Twamu netupeeluke. Mùshindù wàdi wa kwamba dîbà pa dyòdi awu newùdijikè. Kakwènaku cintu nànsha cìmwè cidì mwà kusongiibwa anyi kujaalamijiibwa kùdì muntu wètù ewu, anyi kunoonyiibwa kùdì muntu, cidì mwà kushàala cipwàngàne to.

⁹⁴ Kadi buloba ebu bùdi bushàala bupwàngàne! Ncinganyi cidì cibukontonona? Ee, wèwè udi wamba ne: “Ncyèna mumanye ne ncinyi cidì cibukontonona, cidì cibulama mu kaaba kaabu to.” Ncyà bushùwà ne ncidikà. Bùdi, kwèna mwa kuumvwija mùshindù wùdì Nzambì ùcyenza to, kadi Yèyè’s ùdi ùcyèna. Pa nàнку, cyòci aci ki cintu cidì cyà mushinga, cyà ne Yèyè ngudi ùcyèna. Ne twètù tudi bamanyè ne ki mudibi.

⁹⁵ Ncyà kabayi mwà kwitabuujaku to bwà mùshindù wùdì wèwè mwà kunyungulula ndundu mu lupeepà, kayiku mwà kunyunguluka pa yèyè mwine kaaba kàmwèkàmwè aku to.

⁹⁶ Mwya mwab’ewu ngeela meeji, kukaadi ntàntà, pâmvwà nsanganyiibwa mu cipèèlà. Nènku kàmwè kàà ku tuntùlu tukesè twà kale tùdì twòtù tukulamate lulengu lwàtù lùdì lukubwela buludi mu mashi èbè amu, kàmwè kàà ku tuntùtu atu kuntupikilaku. Ne kwèna mwà kukalamunaku to, bìkèngela bwà wèwè kwangata cintu kampànda ne kukakoona. Ne kòkò aku kadi ne tumpoopu tukesè pambidi apu. Nènku nànsha wèwè munooone kashingì bilenga mùshindù kaayi, kashingì nekàcipale ku lusongo aku; disongoloka dipwàngàne dyà kashingì nànsha dipwàngàne menemene mwebè mwònsò mùdikù pèèbè mwà kudyèna amu, nekìikalè kacipale, paùdi ukàfwànyikija ne kàmwè kàà ku tuntùlu tùdì tutupika atu. Kadi pààkù’s nkabeji, kòkò kiine, kiikàle kadivunge, bikolè ndendende. Mmunyi mùdì bufùki bufwànyine kuvùnga kabeji bikolè ndendende ne kukàvwija katwè bikolè, ku lusongo aku, kutàmba ne mùdì màshinyi malenga mwà kukàsongojola? Kadi, pààbì, ànu ku ndekeelu menemene kwà lusongo lwine alu kùdì tumpoopu tukesè twenze bu tundòbò twà dilòba naatù mishipa, mùshindù ewu, tumpoopu tukesè bwà kukàlama kòkò aku, ne bwà kudilamaku kòkò kiine muntwamu pàdiku kènda kaya apu. Kaa, cidikà’s we, cyà bushùwà’s, bwà maalu a mamanya. Ncyà kabayi mwà kwitabuujaku to, kadi ncilelèlà.

⁹⁷ Ndi muswè bwà muntu ùmvwijeku eci. Ncyèna mufwànyine kunwàmbila menemene bùngì bwà kilòmèètà, anyi ntàntà wa kilòmèètà yìdì maalu à mamanya àmba ne ngondo udi usanganyiibwa kule ne buloba to. Kadi ngondo mwine awu,

mùndi mufwànyine kwamba's, mmunyi mùdiye mwimànyine mu ntàntà wa miliyò ne miliyò yà kilomeeta kule ne buloba, kàdi pèndè mufwànyina kwikala ùkòntonona dibàndà ne dipweka dyà màyi à mbù adi? Ncinganyi cìdi cicyènzeja aci? Cìdi mene mwà kwenzeka mùshindù kaayi? Ncidikà, kadi pèètù's tudi tutàngila ne tumòna ne ncyenzèke. Cìdi cyènzeka. Ngondo ngutu ukòntonona dibàndà ne dipweka dyà màyi a mbù. Pàdi ngondo ùtwa kumpàla ùtwa paanyimà mùshindù ewu apu, ùya kule ne buloba, dibàndà ne dipweka dyà màyi a mbù adi didi dimulonda. Ne Nzambi mmuteeke ngondo kumutu kwà dibàndà ne dipweka dyà màyi a mbù, ne mutèèke mikàlù. Ne òwò kaènakù mwà kupita mukàlù wa mwaba wùdi Nzambi mutèèke mukàlu awu to, mwambe ne: "Wèwè mbù, udi mwà kusemena to ne *apa* nùnkù, kadi kwèna mwà kuya kangata cikwàbò citùpà aci to, bwalu Mémè ndi nkutèekela mulami kumutu kwèbè."

⁹⁸ Ngondo awu, mu ntàntà wa miliyò ya kilomeeta ne buloba, ùdi ubiikila mbù awu, ne mmumutèekele mikàlù mwikàle ùmukòntonona. Kaciya cyà biitabuujaku to! Ncinganyi cìdi pa ngondo apu? Pààbì's, ànu mu ntàntà wa kilomeeta mikesè cyanaàna ne buloba, dikòkiibwa dyònsò dya kùdi buloba, kapeepà kònsò, bintu bikwàbò byònsò, bìdi byùmuka, bìbwela mu cibwàshibwàshì mùdi kamuyi nànsha kapeepà to, too ne mu ntàntà wa miliyò ne miliyò kuvudija ku miliyò ya kilomeeta. Kadi, nànsha nànkù, ùdi ùbùkòntonona! Wamba ne: "Udi mwà kuya too ne mu ntàntà wà, kadi kwèna mwà kuya kule kupita apu to, bwalu mémè ndi mulami mutèeka kùdi Nzambi. Mémè ndi mukenkeci udi musòmbe mwab'ewu, ne wèwè kwèna mwa kupita mikàlù eyi to." Umvwijààyaaku aci tǔng. Aci's ncidikà, mùshindù wùdi Nzambi wenza ciine aci awu, kadi pààbì's Yéyè udi ùcyènza. Kabèèna mwà kucyùmvwijaku to.

⁹⁹ Tutu ne cikondo cyà movù wa mashika, nêjè pa buloba, bukwàte mashika, pashì pashàale dibwe dyà mashika. Kaadimiinu kakesè, ne munda mwà kiine kaadimiinu kakesè aku mùdi musanganyiibwa kaamùtòlokù kakesè kàà mwoyi, ne kiine kaadimiinu kakesè aku nekàkwatè mashika kàshaalè dibwe ne nekàkangukè, ne byàmunda nebiipatukèmu. Kàdi mùtòlokù wà mwoyi awu newùshaalè mu lupwishi, mu mushiki wà dibwe dyà mashika amu ùdi mufwànyine kushipa mwoyi kanà wònsò ewu. Mmunyi mùdiku kalamiibwe, ne pashiishe kalwa kupàtuka cyàkàbìdi mu movù wa bintu bitòloka? Katwènakù mwa kuumvwija aci to, s'mmwòmò's? Ncidikà.

¹⁰⁰ Patùdi twangata Ebelu, nshapità 11 ku mvensà mwi3, tudi tuumvwa mwab'awu ne Bible udi wàmba, Pòlò ngudi wakula, ne: "Buloba bwàkenjiibwa ne kubungakajiibwa ku Dìyi dyà Nzambi," cidikà, cyà ne Dì—Dìyi kampànda divwà mwà kwakula ne kuumukila ku Dìyi adi kùvwa mwà—mwà kudivùnga bintu byà mubidi, "mu mùshindù wà ne bintu bìdi bimwènaka byàkenjiibwa ku bintu bìdi kabiyi bimwènaka nànsha." Bintu

bitùdi tumòna, bìvwa n’Díyì dyakula dyà Nzambì. Buloba n’Díyì dyà Nzambì. Mici n’Díyì dyà Nzambì. Mbwà cinyi butùdi bafwànyìne kuciina bwà kweyemena Ewu udi mufile Díyì dyà mùshindù awu, diikàle ne Bukolè bwà dikèma ne bukòòkeshi? Mbwà cinyi butùdi bafwànyìne kuciina bwà kudyàngacila Díyì adi ne kuDìtèèka pa bìdi bitùtàngilà twètù biine? S’bidi bileeja ne mpenyi patùdi badishìndile, mu bupidyà. Díyì, Díyì dyà Nzambì, cidìka! Cidìka ànu cyètù cyà bushùwà eci, Díyì dyà Nzambì.

¹⁰¹ Kàbìdì, ndiku njinga kuleeja lùkàsàlùkàsà cidìka kampànda, ne ciine aci’s mpàakabiikilà Nzambì Abraham ne kumwambilaYè, pàkaavwàye ne bidimu lukàmà apu; ne Sarah ùkaavwa ne bidimu makumi citèèmà, bidimu makumi anaayi paanyimà pàà cikondo cyèndè cyà kutwà paanshì cimane kupita. Nàнку Abraham, mwena mwoyi wùkaavwà ànu mumane kufwà awu; ne Sarah, mwine uvwa nkumba ànu kwine kwònsò aku awu, ne matrice ende àkaavwà mamane kufwà awu. Kàdi pààbì Nzambì uvwa mwambe Yèyè ne, ku bòbò, nkùvwà mwànà mwà kulediibwa. Aci’s neidìkà. Konkaayi ngangabuka, mukàji wa bidimu lukàmà, ní mmufwànyìneku kukolesha mwànà, kulela mwànà. Kacyèna mwà kwenzeka to, kacyènakù cyà biitabuujaku to, kadi yèyè wakalela bwalu Nzambì wàkamba ne nealèlè.

¹⁰² Ncintu cyà kabàyi mwà kwitabuujaku to, bwà kwela meeji ne Muntu ùvwa mufwànyìne kwikala musòmbe ne nyimà Wendè mwela ku ntentà, Mwenyi mwikàle ne lupwishi ku bilàmbà Byèndè, ne kwambila mukaji, uvwa usanganyiibwa munda mwà ntentà lwà mu ndekeelu mwàmwa, bìvwaye wela meeji. Cidìkà, cyà kabàyi mwà kwitabuujaku to, kadi pààci cilelèlè.

¹⁰³ Cìvwa cyà kabàyi mwà kwitabuujaku to, pàakayà Abraham ne Izàkà ku lusongo lwà mukùnà, mwanèndè umwèpelè mulela, kadi kubàndayè nendè ku lusongo lwà mukùnà aku, bwà kumulàmbulayè bu mulàmbù wà mashi. Nenukù pàakafikàye ku lusongo lwà mukùnà aku, ne kulààdikayè Izaka pa nkunyi, yèyè mumane kudilongolola bwà kumushipa. Kadi pàkaavwàye ùpwekesha cyanza cyèndè, Cintu kampànda kumukwàtaCì ku cyanza! Nenukù kùvwà cimpàngà cyà mukooko cikàlámìne ku nsèngù, mu cipèèlè, pa lusongo lwà mukùnà apu. Cidìkà’s! Cimpàngà cyà mukooko aci cìvwa cifùmìne penyi? Mmunyi mùvwàci cifwànyìne kwikala mu ntàntà wa kilometa lukama ne makumi àsambòmbò kule ne bantu kabàyikù bacishipe? kùdi nyama yà ntambwe ne—ne mibwàbwà, ne mbwà yà diitu ne nyama yà lwonji, ne bikwàbò. Cìvwa cifùmìne penyi? Cìvwa cikafike kwine kuntwaku bishi, kwine ku lusongo lwà mukùnà kùvwà kakùyikù màyi aku? Bwà cinyi kacìvwakù pàvwàye wangula mabwe apu? Yèyè kwinyika mwaba awu dìnà ne *Yehowah-yilè*, “Mukalenge wàDìpetèdi Yèyè mwine mulàmbù wà mashi.” Kacyi cyà biitabuujaku to kàdi pààci ciikàle cilelèlè ànu cyà menemene eci, bwalu Yèyè, udi *Yehowah-yile*. Bintu bìdi

kabiyikù byà biitabuujà to ku dyètù dimanya ne ku maalù a mamanya, kadi pààbì biikàlè bilelèlè! Cidikà cinène's!

104 Cìvwa ncidikà, kabidi neciikàlè ànu cidikà, pàvwà Yesù, mu Maako 11:22, anyì, :23, pààkambàYe ne: “Wèwè mwambile mukùnà ewu ne: “Tentèmùkà,” ne kuyi wela mpatà mu mwoyi wèbè to, kàdi witabuujà ne cìwǎmbì aci necyènzekè, udi mwa kupeta cyùdì mwambe aci.” Ncyà kabàyi mwà kwitabuujaku to, kàdi's ncilelèlè. Ncidikà.

105 Swayi ngiimanèku mwab'ewu bwà kwamba ne, mu diitu mwàmwa, musòmbe ku luseke lwà mucì awu mu dindà amu, kakùyikù nshìndì mu diitu amu nànsha umwe to, kàdi pààkaakulà Dìyi kampànda dyamba ne: “Ambà mwaba wikalàyi mwà kwikala”!

106 Nènku mwaba awu, ndi ngàmbilamu, bu mèmè mwà kufwà kumpàla kwà mèmè kujikija diyiisha edi, mwikàlè mfunkuna munu ku dibwè dyà ngajì, dyà mukòmà, mèmè kwamba ne: “Neàsombelè ànu pààpa naka,” ne ki yèyè awu! Bwalu bwà dikema's, kàdi pààbu bulelèlè!

Yèyè kwamba ne: “Udi ulonda neikadilè penyi?”

107 Mèmè kwamba ne: “Lwà mu bikùtùkùtù byà bilùmyàna byàbya mwàmwa,” nènku nciyikù nànsha mwanji kupwekesha munu to kàdi ki yèyè awu mwaba awu!

“Udi ulonda neikadilè penyi?”

108 “Pa cikuuku cìdì mu budimi bwàbwa cyàcya.” Ne ki yèyè awu mwaba awu! S'ncyà kabàyikù mwà kwitabuujà's.

109 Mvwa nkonka mukàjàànyì, dindà kampànda. Mèmè ne: “Munanga wanyì, mèmè ewu ndi mujimije lungeenyi anyi? Ndi ngènda ndwa mupàle anyi? Cìdì kacìyi cyènda naanyì bìmpè ncinyi? Bwà cinyì ndi ngàmbe bintu bìndì ngàmbe ebi? Cìndì ngènzela bintu bìndì ngènzela ebi ncinyi? Cìdì cingenzejà ncinyi?” Mèmè ntu munange bantu, kàdi pàànyì mwikàlè ànu mbàvingila panshì's. Kàdi ntu njila byàkudyà ne nsambila bwà ncilekeleku; kadi pàndì ntàmbe kujila byà byàkudyà ne kusambila apu, kàdi ki kutàmbàbì kubiipa's. Kacìyi cyà biitabuujaku to, kàdi ncilelèlè's! Ncilelèlè.

110 Nyawu mfuma ku dimòna muntu mukàjì wèla cyanza muulu ànu pa dìbà adi, mundekeelu mwà nzùbu mwàmwa, ùtumbisha Mukalenge. Ùvwa ng'Hattie Wright, udi musòmbèlè lwà mwaba wàwa nàka wàwa. Piine apu, yèyè ùvwa ne bânà bàà balùme bàbidì, bu bóbò mwà kumfwilakù luse bwà pàndì ngàmbe bwalu ebu, nsongaalùme mipidyè diitabuujà, ya maalù a pa buloba. Mukàjì mukèsè awu musòmbe mwaba awu ditùkù adi, mukàjì mukàmbà. Ki mèmè kwamba ne: “Hattie, Mukalenge Nzambì. . . wèwè wambì cintu cijaalame. Yèyè nguwwa mufile nshìndì ayi. Yèyè udi Yehowah-yile.”

111 Kwambayè ne: “Aci kí ncíngà cintu to ànu Bulelèlà bwètù bwà Nzambì ebu!” Kaa, yéyè ùvwa mwambe cintu cijaalame! Bidì bimwèka byà kabàyìkù mwà kwitabuuja to bwà muntu wètù wa macì ne mèsù ewu mufwànyìne kwamba dìyì. . .

112 Ànu mwänwämbidì Mwanèètù Booth amu. Twètù aba ànu mutùdì ne manyaanù ne bàkooyike emu, Yéyè udi Nganyì udi musómbe dyàmwämwa dyà ngondo ne dyà mitooto, ne dyà cibwàshìbwàshì cyònsò ne cikondo ne Cyendèlèlè awu? Anu mwäcyämbì mene Booth amu, ne mèmè ndi mubale cintu cyòci cìmwècìmwè aci ditùkù adi, mbala Irénée ne, nànsha mene Banjelo bàdi ne manyaanu ku mèsù Kwèndè. Tudi banganyì's twètù?

113 Kadi muntu mukàjì kwamba cintu cijaalame cyàkalengà mwoyi wà Yehowah. . . wákamba ne: “Mukonke cidiye muswè, ne díbà adi wèwè ùmupèèsheci.” Amen. Kaciyi cyà bìitabuujuaku to, kàdi cilelèlà! Kaaba aka mene patùdì twakulangana apa ne kumpàla kwètù eku kùdi cileeji cyà cìmwèneke ne mèsù: kulombaye bwà misùukà yà bânà bèndè bàà balùme kwikalayi beena Kilistò. Nzambì kumupèèshaYè dijinga dyèndè. Kaciyi cyà bìitabuujuakù to! Aci's cìvwa ncìshimà citàmbe ne cyà dyondopa dyà mubèedi's. Aci's ndishintulula dyà nsòmbelu wa muntu, musùukà wèndè, mubidi, ne cyònsò cidiye. Cyàkashintulula mùshindù wùvwàye yéyè mwenjiibwe. Kaci'yikù cyà bìitabuuja to, kàdi cilelèlà! Cìvwa ncidikà. Tudi tucìmòna myaba yònsò.

114 Cidikà mu cikondo cyà Noa. Pendè, Noa awu, muntu's, muntu ànu wètù wa ciibidilu ewu, kushààlayè mupròfetà, anyì ùvwa mupròfetà wa Mukalenge, pàmwàpa mwikàle cidimè. Nzambì kumwambilaYè ne: “Dìlongòlòlè ku mvula wíkala mwà kufùmina mu dyulu,” pàvwàku kakùyikù mvula nànsha wa kànà to. Kacya kakùvwakù kwanji kulòka mvula nànsha wa kànà to. Kakùvwa mùshindù nànsha wùmwe wà kupeta mvula muulu mwàmwa to. Kacya kakùvwakù kwanji kulòka mvula pa buloba to. Kakùvwakù nì mmbù, kakùvwakù nì mmâyì to, kàdi pààbì Nzambì wàkamwambila bwà kwenzaye bwàtù bwà kusungila bàà mu nzubu mwèndè. Ki Nzambì kulòkeshaYè mvula pa buloba! S'cìvwa ncidikà. Kabìyi byà bìpetanganakù ne maalu a mamanya to, kaadi (cinyì?) cìvwa ncidikà, nànsha nànkù. Eyowa's.

115 Cìvwa ncidikà pàvwà bânà bàà beena Ebelu bàkangate dipàngadika dyà ne nebàshaale ne Díyì dyà Nzambì, nànsha cinyì cenzèke, mu mùshindù wa ne mfumu awu wakiibaka cikùtù cyà kapyà cyà cyòsha misangu mwandamutekète kupita mùvwàbo bàcìteemesha kacyà kwònsò aku, ne wàkakùpamù bantu abu. Díbà adi, lwonji lwà kapyà kàà—kàà cikùtù cyà kapyà aci lwàkashipa bantu bàvwà babànde naabo too ne pa mubàngùbangu, too ne ku mushikù wà mbèlu wa cikùtù cyà kapyà aci; bóbò abu kufwàbo. Kàdi nànsha nànkù bantu abu bàakabwela mu citùtù cyà kapyà aci

bènda bèndakanamu pàmwàpa munda mwà mèbà àsàtù majimà à Kabàmbà. Bìvwa bifwànyine kwikala byà kabàyi bashaalakù nànsha kapwishipwishi kèètù aka to, bwalu mwoyi wa buntu wùvwà munda mwabo awu nùnkù's mmubùtùke. Pùikalàbi ne kààkafikisha mwoyi wa buntu ùmwè ku dibùtuka, bwà diseemena pabwìpi naakù, ambààyaaku tǔng cìvwàku kafwànyine kwenzela mukwàbò mwoyi wà buntu? Kàdi bààkabàkùpa muntwamu, kadi twǎnjìbi kwamba ne mmunda mwà mèbà àsàtù majimà, s'cìvwa ànu cìfwànyine kwikala mèbà àtaanu.

116 Yèyè uvwa mufwanyine kwikala muyè kadyàku nshima, mwalùkile, ne mwambe ne: “Kangulààyiibi ciibi cyà cikùtù cyà kapyà aci. Kamwàkwikalaku mushààle nànsha kapwishipwishi kàà balùmyànà abu to!” Kàdi mmwenze ànu ùkàngula ciibi anyi, ki bòbò abu muntwamu, bwalu bubì nànsha bùmwe kabùyikù bubènzèkèle to, bènda bèndakana mu mudilu amu. Kaciyi cyà biitabuujakù to, kadi cilelèlà! Bwa cinyi? Yèyè kwamba ne: “Nuvwa babèlè bàngà muntwemu?”

Bòbò ne: “S'tuvwa babèlèmu bàsàtù.”

117 Yèyè ne: “S'nyewu mbamòna bànaayi.” Ki cyàkenzà cidikà ncyòci aci. “Ne Wàwa nàka udi ne mmwènekèlu wa mwànà wa tunzambi.” Kàvwa mwànà wa tunzambi to; Yèyè ùvwa Mwànà wa Nzambi! Bòbò bàvwa bampàngaanù. Kaa, Nzambi mu Dìyì Dyèndè dinène's we!

118 Kwàkalwa cikondo cìvwà cilwilu cyà Nzambi cishààle citulùmùkàngane ne ciikàle ne bwòwà bwà muntu kampànda, ne mwine awu mwimanyine ku luseke lwà kakùnà. Pààkenzàbo ne muntu ùmwèpelè uvwa ne bule misangu yisàtù kupita yònsò wa kùdìbo, ikalè mwimàne ku luseke lwà kakùnà, wàmba ne: “Mpindyewu nwènù's nudi beeyèmène Nzambi mulelèlà kampànda, munùdi nwamba. Èè, umwe wa kunùdi aku àpàtukè bwà kulwàngana naanyi, nènku katwà—katwàkufwishisha bantu bònsò to.” Mwena lukunà wa Nzambi ùkaavwa mumanè kucìncimikila èkèleeziyà wa Nzambi ku luseke lwà kakùnà aku, ne bàvwa munkaci mwà kuciitaba's! Bàvwa ne bwòwà. Bàvwa bintu bitulùmùke.

119 Ki mu citùdilu amu kulwamù kalùmyànà kàà kanyìikanyì wa muncyòci, kadijingìle ciseba cyà mùkòòkò mu cìfùka, cinkutu cyà mulami wa mìkòòkò's; muntu wa mutàmbe bukesè mu cilwilu cijimà aci, wa bwalu kayi nànsha disàlaayi to. Kàdi cìvwa ncidikà's, pààkangatà Nzambi muntu ùmwèpelè awu, muntu mukèsè ùmwèpelè uvwa bwalu kabùyikù nànsha butàngile to. Bible mmwambe ne yèyè ùvwa mukùnzùbile. Muntu mukèsè ùmwèpelè awu kadi kuyiishaye cilwilu cijima cya mwena lukuna aci bimpàmbàmba! Aci's cìvwa ncidikà. Mbyenze ànu bu ne, Nzambi uvwa ànu mwà kwikala mupèèshe cilwilu cinène cìvwà cyènda dyàdyàdyà aci dikima dikumbàne

bwa kulwangana mvità. Bôbò ní bàvwà basadidi bàà Nzambi, kàdi mbwà cinyi kubènga kuya kalwangana mvità yà Nzambi? Awu mmwena lukuna wa Nzambi, kwataayi cintàkanyì aci! Mbyenze ànu bu ne Yèyè ùvwà ànu mufwànyine kwikala mubàpèeshe dikima. Kàdi Nzambi wàkangata muntu-nkaaya mukesè ùmwèpelè.

¹²⁰ Nènku vùlukàayi, cidika cikwàbò, yèyè kààkangatakù mwelè wà mvità to. Shawula wàkatèeta kumuvwàdika byèndè yèyè byà mvità, kuteetayè kumutèèka mwele wà mvità mu cianza. Mukwàcikwètù mukesè awu kàyikù ne mùshindù wà kuwùkwàta to. Kàdi yèyè wàkangata ndundu wa nyuunyi, kandundu kakesè anyi kaacisèba kakesè, kiikàle ne tutùpà túbìdi twà milemu tuswikilakù. Ki yèyè kucimuna cilwilu cijimà cyà mwena lukuna aci, ne kubayiishaye bimpàmbàmba. Cìvwa ncidika, mùshindù wùvwà mwànà wa balùme mukesè awu mwà kwela cilwilu cyètù eci lùbilu.

¹²¹ S'ncidikà. Bushùwà's. Nzambi ùtu ùcyènza. Yèyè's mmùle ànu naabi tètè. Bushùwà, Yèyè mmùle naabi tètè. Ki citùYe wènza. Ki Weèndè mùshindù wà dibyènza. Eyowa's, mukalenge. Cìvwa ncidikà.

¹²² Pàvwà Ejipitu ne cilwilu bunèneci mùvwàbo naaci amu, buloba bujimà bùvwa bukwàcìlbe ku bukòokeshi. Bàvwa ne ditùnga ne ditùnga dyònsò mu byanza byàbò bôbò. Kadi pààkangatà Nzambi dipàngàdika dyà kubùtula ciine cilwilu aci, kubùtula ditùnga adi, byàkamwèka ànu bu ne Yèyè uvwa ànu mufwànyine kwikala mujuule cilwilu cyà beena Amòlà, anyi cilwilu kampànda cyà cinène mwaba kampànda, ne mubàtùme muntwamu ne byà mvità byà bitàmbe bwìmpè; anyi mwènze nsangilu wa màngumba wònsò masanga ntete, bwà kuyamu ne kulwangana mvità, cyàpàmwè, bwà Wàmónakù mwà kupeta dimwela dyà mu dibòko mu kaabujimà. Kàdi, Nzambi wàkawkwàta mudimu ne cidikà! Wàkangata muntu mukulàkàjì, wa bidimu makumi mwandamukùlù, ne kààkateekaku mwele wà mvità mu cianza cyèndè to, ànu dikombo dyà kale dikònyàngàle, dyàkatùkijà Ejipitu mwinshì mwà mbù mufwè adi. Kaciyi cyà biitabuujakù to, ciine cidì Nzambi mwà kwenza aci, kadi mùshindù awu ki wùdìYe ùcyènza. Yèyè ùtu ùkwàta mudimu ne cidikà bwà kucyènza. Nwamónu's, Yèyè ùtu ùya naaci too ne ku cidikà, citùpà cyà mucì cikònyàngàle cyà mulami wa mìkooko pamutù pàà cilwilu cyà cyènda tàràkàtàràkà, bwaà kucimuna di—ditùnga òvwà dikòokeshà buloba bujimà adi.

¹²³ Kaa, cintu cìmwèpelè cidì Nzambi mwindile mpindyewu's, ngeela meeji. Russie kèna ne cidiye ùmvwija bwà Nzambi to. Yèyè mmuswè kupeta muntu ùmwèpelè. Kabyèna bikèngela kwikalaYè ne malongolodi manène to. Kabyèna bikèngela bwà kwikalaYè ne màngumba manène to. Yèyè mmuswè kupeta muntu umwèpelè udiYè mwà kuvùngila Nyumà Wendè munda

mwèndè! Aci necyàmbè bikwàbò byàlondà, nekwikalè cikwàbò cidikà; too ne pààpetàYe muntu kampànda udi mudilàmbùle yêyè yònsò, wíkala mwà kwenza cyôci aci. Mùshindù awu ki wùtù Nzambi wènza Wèndè mudimu, Yêyè ùtu ùkwàta mudimu ne bidikà.

¹²⁴ Cìvwa ncidikà pàvwà disàlaayi dinène kampànda dyà . . . dyà Nzambi, dìnà dyèndè Yehoshafata, diimàne mu biibi, mwikàle ne muntu mutwè cìmpingà dìnà dyèndè Aakaba, ne kwambayè ne: “Kumpàla kwà twètù kuya ku mvità eyi, kî ncintu cìmpè bu twètù mwà kukonkakù Mukalenge anyi?” Mpindyewu, piikalà mwoyi wà muntu awu ne nzala, yà kumanya diswa dyà Nzambi, s’kùdi ne cyà kwikala diswa kampànda dyà Nzambi mu mwaba kampànda.

¹²⁵ Kabitu misangu yònsò ànu ne mu bùngi bwà mibelu mmùdi dikùbiibwa to. Aakaba wàkamba ne: “Mémè’s ndi ne bambi bàanyi bwònsò. Bwònsò mbaprófetà. Nèmbàbiikidishè kaaba aka. Kàbidì udi mumanyè’s, mémè mupatwishe baprófetà nkàmà yinaayi, netùpetè Dìyì dyà Mukalenge.” Kí mmisangu yònsò yùdi ànu udipeta to, kî mmisangu yònsò nànsha.

¹²⁶ Cyôci kaciyi ne Dìyì to, apu kaayi ùseemenè kule naaci. Nànsha bàdimù biikàle bùngi kaayi. Shaala wèwè ne Dìyì adi! Nzambi kèna mwà kushintululakù Dìyì adi to.

¹²⁷ Mpindyewu, kubàpatwishaye bònsò mwab’awu, ki kwambabò ciprófetà bònsò ne dìyì dimwè ne, Mukalenge ùvwa naabò: “Ndàaku!”

¹²⁸ Kàdi nànsha nànkù kùvwa cintu kampànda cìvwà kaciyi cijaalame to. Nènku mulùme wa Nzambi awu ùvwa mumanyè ne kacìvwa cijaalame to. Kwambaye ne: “Kwènàku ne mukwàbò anyi? Ànu mukwàbò umwe cyanàànà, mwaba kampànda anyi?”

“Kaa,” mwàkambàye, “tudi nendè’s, kadi mémè ntu mumukine.”

Yêyè ne: “Mfùmù kàmbikù nànkù to.”

¹²⁹ Nzambi ùvwa musungùle nsongàalùme umwèpelè uvwa kàyì mumanyè mukànda to, ntombòji mukesè bwà ditùnga adi, mudyombola ne mubèngùbwe, bwà kutwàdìlayè aba bàvwa ne nzala mu myoyi yàbò mukenji Wèndè. Pamutù pàà . . . màngumba wònsò pàmwè àvwà àkula ne dìyì dimwè awu, Nzambi kutwàlaYe muntu umwèpelè. Cidikà’s, kadi muntu awu yêyè nguvwa ne Bulelèlà. Ne cyàkajaadikiibwa ne m’Bulelèlà, bwalu yêyè ùvwa ne Dìyì. Cìvwa ncidikà, menemene.

¹³⁰ Mpindyewu wèwè udi wamba ne: “Udi muswè kwamba ne, udi wèwè ubèngàngana ne *bikampànda* byònsò ne *bikansanga*, ne *bikankenga* ebi anyi?” Byòbi kabiyi Dìyì to, mémè ndi mbèngàngana naabi. Ncyà bushùwà. Dìyì dyà Nzambi kadyàdyakupangilakù to.

131 Pâmvwà nyiikilangana ne nsaserdòsè kampànda, àbìdì àdì panshì aa, kwambaye ne: “Mukalenge Branham, wêwè udi ukeba kwikala ukòkàngana pa bwalu kampànda mwimànyìne pa Bible.” Yèyè ne: “Twètù tudi twitabuuja èkèleeziyà, katwèna bwalu ne aci to. Twètù tudi twitabuuja èkèleeziyà, cidi èkèleeziyà wàmba aci. Nzambì ùdi mu èkèleeziyà Wèndè.”

132 Mémè kwamba ne: “Nzambì udi mu Dìyì Dyèndè. Ne Yèyè udi Dìyì.” Aci’s ncyà bushùwà, Dìyì!

133 Ki bwà cinyì Miikà wàkangata Dìyì. Nènku Nzambì wàkawkàta mudimu ne cidikà kampànda bwà kufwisha dīgumba ne dīgumba dyònsò bundù, ne wàkenza ne Dìyì dyà musadidi Wèndè dyènzekè; muntu ùmwèpelè, mudyombola, mubèngiibwe, mukinyiibwe! Cinyì? Mukinyiibwe kùdì cisàmbà cyèndè. Mpindyewu, yèyè kàvwa communiste to, anyì kàvwa cintu kampànda cikwàbò to. Twànjààyi kwamba ne yèyè uvwa mwena Mpenta, kadi cisumbu cyà beena Mpenta cimukine. Kabavwaku bamunange to. Kabàvwakù nendè bwalu to. Kadi yèyè uvwa ne Dìyì dyà Nzambì. Nzambì wàkacivwija cidikà.

134 “Bwà cinyì Yèyè, pùikalàbi ne bantu bakwàbò aba bàvwa baprófetà ne bambi, ne bikwàbò, bwà cinyì, mu cisumbu cyònsò bunènci eci, kàyikù mwà kwangata dipàngadika dyà cintu kampànda cìmpè kutàmba cyà muntu ùmwèpelè? Mbimwènèke ne mbyà dipanga dyà lungènyi pàdì Nzambì mufwànyìne kuvwija ànu Dìyì dyà muntu ùmwèpelè ne ki dyà cyà bushùwà, kutàmba dyà bakwàbò bònsò.”

135 Bwalu, dìyì dyà muntu awu òvwa Dìyì dyà Nzambì. Ki bwà cinyì Nzambì wàkenza ne cintu aci cyènzekè, mbwalu muntu awu ùvwa ne Dìyì dyà Nzambì. Bakwàbò abu bàvwa bàmba biprófetà byà mashimi. Eyowa, civwa ncidikà pààkangatà Nzambì Dìyì dyà muntu mukeseè ùmwèpelè, ne kudivwijaYe dilelèlè, mbwalu òvwa Dìyì Dyèndè. Bìdì bikèngela bwà Nzambì imanè ku luseke lwà Dìyì Dyèndè, kí nku luseke lwà dìyì dyà nsangilu nànsha. Kadi, Dìyì dyà Nzambì, ki mwena ku luseke kùdìYe wimana.

136 Yèyè wàkangata Miikà pamutù pàà cilongelu cijimà cyà bambi balongesha bimpè, bantu bàà luumù. Ncyèna mémè naabò cilumbù to, bàvwa bantu banène. Bàvwa bantu bàvwa kabàyi biitàbuuje Nzambì mukwàbò to, bàvwa biitàbuuje Nzambì umwèumwè uvwa Miikà mwitàbuuje awu. Kadi benzè maalù ànu bu ne bàvwa baCiitàbuuja, kadi kabàyi baswè bwà kwangata Dìyì Dyèndè to. Bwalu, bàvwa baswè kwikala bamanyike. Bàvwa bajinga kwanyishiibwa kùdì mfùmù. Nènku bufofo bwàbò bwàkabàpangisha bwà kumònabò Dìyì dilelèlè dyà Nzambì. Mmunyi mùvwà Nzambì mwà kubènesha civwàYe mwele mulawu?

137 Ne nwènù bainàbànzà ne nwènù balùme, bwònsò, kanwikadiku nwela meeji ne ndi ngèza cyòci eci bwà kwikala

ne lwonji to. Ndi ncyènza bwà kwikalala ne meeji matòòke. Ki kabingila nkòkò aku. Mmunyi mündiku mwà kwamba ne: “Bìvwa bìkèngela bwà bakàji kwikalabò ne...eyo, bàkosè nsuki yàbò, ne bintu byà mùshindù awu; bàvwalè, bilàmbà byàbò abi, aci kacynakù ne dipetangana naaCi”? Dìyi dyà Nzambi's didi dyàmba ne cidi naadi! S'mbyà bundù ne dipangila dyà ngàsà bwà mukaji awu pàcidiye ànu ùcyènza apu, kadi Nzambi mwine kààkukwàtakù nendè mudimu to. Nànsha yèyè wàkula mu myakulu bishi, anyi ùtùpika anyi wèla mbila, yèyè, kèna ne kùdiye mwanji kufika ne Nzambi to. Aci's ki Dìyi dyà Mukalenge.

¹³⁸ Nwènu balume, nwènu bàdi kanùyi mwà kukòòkesha nzùbu yènu, kadi nukèba bwà kwikalala bambi ne balami, mmunyi mùdi mwà kukùmbana kwikalala muyiishi mu cyambilu, bwà kulombola Èkèleeziyà wa Nzambi udi ne mwoyi, ne kubààbanyina bumpyanyi bwàbò? Pàdibi ne, wèwè udi utùma èbè meeji ànu kwèbè kùdi udiila ne ku mulàmbù wùdi wùbwelà kutàmba mùdi wela meeji ku Dìyi dyà Nzambi, ne mwikàle umvwa bundù bwà kubyàmba kumpàla kwà bakàji, umvwa bwòwà ne nkwèpi kuwabenga kwikalala munangibwe, Nzambi ikalèku luse ne musuùkà wèbè mubi awu!

¹³⁹ Ambaayi Dìyi dyà Nzambi, mu Bulelèlà! Yone wàkamba ne: “Cisuyi ncitèèka ku muji wà mucì.” Ne cisuyi n'Dìyi dyà Nzambi. “Muci wònsò wùdi kawùyi wùkwàma mamuma à cyà bushùwà awu, bàwùpùlè ne bàwèlè mu mudilu.” Nzambi, tùtwàdilàku cidikà cikwàbò!

¹⁴⁰ Nzambi wàkangata Yone Mubàtiii bwà cinyi, mungàfumu ku dicyàmba, pamutù pàà baakwidi Bèndè balongesha bimpè baa ditùkù adi abu? Yèyè wàkangata muntu uvwa kàyikù mwanji kuya mu kàlaasa kacya bààmulela. Pa nàнку, tudi tuumvwa ne Yone wàkaya mu cipèèlà, pàcìvwàye ne bidimu citèèmà, ne mushààle nkàayèndè ne Nzambi.

¹⁴¹ Kùkaadi ndambù wa matùkù, pàmvwà mbala pa bìdi bitàngilà Nsangilu wa Nicée, aci cìvwa nntàntà mule paanyimà pàà lufù lwà mùpostòlò wa ndekeelu, Yone Munsantu. Pààkalwà bantu abu ku Nsangilu wa Nicée awu, bàmwè bàà ku bàna bèètù bàà kale abu bààkafwisha bakwàbò bwònsò abu bundù. Bààkalwa kuntwaku, bàvwàle bisèbà byà mikooko; mwaba wùvwà balombodi bàà makalenge maalabale bàà bàvwàle mìzàbì abu, bu mùdi Constantin ne bèèpiskòpò bàà Loomo abu. Bisèbà byà mikooko byà kale bidijingila mu cifùkà, ne bòbò bàvwa basòmbèle mu cipèèlà, biikàle bàdya bisoosa, kadi biikàle baprófetà bàà Mukalenge. Kaaèkèleeziyà kakesè aku, kàà luseke lwà cyena Ngelika aku, kààkatungunuka e kuya kumpàla; wa luseke lwà cyena Loomo yèyè wakaalukila cyànyimà. Kadi bìdi bileeja ne, pàudi udyà cibàngà, kwèna mwa kwikalakù musadidi wa Kilistò to.

142 Yone. Mu ditùkù adi, èkèleeziyà uvwa wa ngiitabuujuilu wa ku cibangidilu ànu wetù wa menemene ewu; bàvwa bòbò ne bansaserdòsè, bantu balongeshiibwe bímpè. Kadi Nzambì ùvwa musungule muntu uvwa kàyi ne kàlaasà kalonga nànsha kaa kànà to, ne ùvwa mumupàtwile mu cipèèlà, ne cisèbà cyà mukooko cidijingila mu cifùkà, ne myedi mikùnzùbile yònsò, ne nsukì mimulembelele ku nshingù. Kàyi ne cyambilu cyà kuyiishilayè, kàyi ne èkèleeziyà udikù mwà kumubiikila to, kàdi pàmwàpa ùvwa mwimànyine mu bitoci, byàmba kumufikila mu binù, ne kuyiishaye ne: “Bukalenge bwà Nzambì bukaadi pabwìpì!” Nzambì nguvwa musungule muntu awu.

143 Pààkambà Yesù ne: “Nuvwa baye kamòna nganyi, muntu udi mumanyè mwà kwakula mu bilongelu byònsò, muntu muvwale ne ku mènù, ne bikwàbò anyi?” Yèyè wàkamba ne: “Abu bàtu mu nzùbu ya bamfùmù.” Yèyè ne: “Cinùvwà bafwànyine kwikala bayè kamòna ncinyi, mupròfetà anyi?” Yèyè ne: “Mutàmbe ne mupròfetà. Ki yèyè uvwa mupròfetà mwambe ne neàlwe awu ne: ‘Ndi ntuma musànjeelà Wanyi kumpàla Kwànyi.’” Yèyè uvwa mwa—mwanjèlo wa cipungidi. Ùvwa mu—mudyanjididi munène.

144 Kadi, cívwa ncidikà’s, mùshindù wawalwaci. Bwà cinyi kàvwakù mutùlùkile ku cilongelu cinène ku Yelusalema kwàka? Bwà cinyi kàakavwilakù kùdì Kaayifa, mwakwidi munène awu? Bwà cinyi kàakalwakù kùdì bàmwè bàà ku bantu banène, balongeshiibwe abu, bàvwà balongeshiibwe ànu kacya ku bwànà abu, ne bààbò baatatwàbò badyànjile kulongeshiibwa kumpàla kwàbò, ne bààbò baatatwàbò kumpàla kwàbò, munda mwa lukongo ne lukongo ne lukongo, balongèshiiibwe ne babwejiibwe mu tùlaasà, balenga bàà dikèma, bapiluluja mu mùshindù mutùmbùke, bakolesha bímpè abu? Kàdi kwangata muntu wa kale mu cipèèlà uvwa kacya kàyikù mwanji kupeta dilongeshiibwa dyà kalaasa ditùkù nànsha òmwè to kacya pèndè bààmulela, kadi kumutèèka ku Yadènè kwàka, ne kwamba ne: “Ki—ki yèyè ewu.” Cidikà’s, cyà menemene. Kaciyi cya biitabuuajakù to, kàdi pààci’s cívwa cilelèlà. Nzambì ngwàkacyènza.

145 Dilediibwa dyà kùdì virgo dyà Mukalenge wetù adi, kadiyi dyà biitabuuajakù to, bwà mukàji kulelaye mwànà kàyikù yèyè mumanyangane ne mulùme to. Nzambi ngwàkacyènza. Nzambi ngwàkacyènza. Nwamònu’s, ncidikà. Yèyè kwangata mukàji mukesè wa kale kuntu kwàka, nsongàakàji mukesè wa kale, mubangila kùdì muntu kampànda wa bidimu bitwè ku makumi ànaayi ne bitaanu, wa bwalu yèyè mwine mwikàle ne bidimu bu dikumi ne bisambòmbò anyi dikumi ne mwandamukùlù nànkù awu, kàdi mubangila kùdì muntu ewu uvwa mulùme wa mu lufwilà, mwikàle ne bàna bànaayi. Ki dībà adi kwangataYe mukàji ewu ne kumubwikila ne mundidimbì wà Nyumà Mwimpè, nenku yèyè kwimita munda mwèndè amu

mubidi wàkasòmbelà Nzambi wa Bukolè bwónsò mu ntentà awu. Cidikà's!

¹⁴⁶ Mushindu mwine wùdi Dyulu kadiyi mwà kuMukùmbàna's we! Buloba nciitèekedi cyà makàsà Ende, Dyulu nnkwasa Wendè wa butùmbi, kadi pààbi mwikàle mwà kutwàla kaabujimà kàà Bunzambi mu ciikadilu cyà mubidi, kadi kuBùbweja mu mubidi munda mwà Muntu. Kaa! Pààdibi ne, wèwè mwa kufika ku cipidi cyà nkàmà yà miliyalà yà kilomeeta, ubwela ne mu mikùngùlù mileemile yà bikondo, kàdi kùyikù mwà kufika ku cipidi cyà Nzambi to; kàdi pààbi mwànà mukesè wa mu dibòko, mulàadika mu cidilù cyà nyama, wàkambula kaabujima kaa Mubidi Wèndè—Mubidi Wèndè. Yehowah! Cidikà! Nzambi munène awu, Yèyè udi musòmbè mwàmwa nàka awu, bwà kwikala ukòntonona mèbà a muulu aa miliyò lukàmà miikàle àkenkesha pa mabùlunga, Yèyè utu kacya kàyikuù ne ntwadijilu anyi ne ndekeelu awu, kadi mukùmbàne mwà kudibweja Yèyè mwine mu mubidi, mu cikùmbi cìvwà ne tùmvi twà nyama!

¹⁴⁷ Kadi twètù dībà adi tupàtuka tuya kajà maja ne tukanwà maala, ne tutùnguùnuka naabi, mu ditwà dyà cyanga! Kì ncyanga to; ndikuukwila! Tutu tutwila Noël cyanga. Mùshindu mwine wàkenzà Nzambi ciine aci's, bwà Wàmòna mwà kufwà, bwà kwangata kaaba kàà ngènzàmpèkààtù.

¹⁴⁸ Cìvwà ncidikà pàvwà nsongàalùme mukesè, wa nsuki mvwàngalà, kaamuntu kakesè kàà makaaya makòbàme, kàvwà pàmwàpa kakàyi nànsha bule bwà mètre umwe ne citupà to; kadi ùvwa ne bipya byà nsuki mwandamutekète bilembèlèle mu nyungulukilu wa mutu wèndè awu, kaacilùmaacikàji kakesè. Nenku yèyè uvwa wènda ùpweka ne njila, dīngà ditùkù, ùya bwà kumònangana ne mulunda wèndè wa bakàji, kadi nyama wa ntambwe kukungulaye ùkèba kumulwisha.

¹⁴⁹ Kùdikù muntu ukàadi muumvwe mùdi nyama wa ntambwe wètù wa cyà bushùwà ewu ùkungula anyi? Pàmwàpa nukàadi bayūmwè, mu nsanji eyi ne bikwàbò muneemu emu. Kadi ndi muswè nnwàmbilè's, yitu dībà adi yidila ànu nyawu-nyawu wa kampuusu awu. Bivwa bikèngela nwènù kuumvwa mùdi nyama wa ntambwe wa mu cisuku ukungula mukungulu wètù wà cyà bushùwà ewu. Mabwe's neàkuluke ku kakùnà, mu ntàntà wa mètres nkàmà mwandamukùlù; nsàkàlàbwà neyibange kupòngòloka kuulu kwa kakùnà, cidi cikankisha buloba bikolè be. Kùdi diine dikungula adi difùmina, ncyèna mmanya to.

¹⁵⁰ Kaa, ngàkamòna umwe dīngà ditùkù's, ùvwa mulembeleje mutù wèndè awu panshi, ntambwe munène mukolè wa musàalàlà wa kalaabi kukungwilaye wa mufiike, bwalu, wa musàalàlà mufiike awu, bwalu ùvwa mudyàpùle dipùndà dyà munyiinyi. Yèyè kudilekela e kushàaladi mwab'awu, nènku bivwa ànu bu mwambe ne: "Mpindyewu ùditàngilè ne mèsù

cyanààná, nyaaya bwà kwanji kabikulakù ndambù wa màyi.” Ki kuyaye bwà kulàka màyi. Pààkaalukilayè, wa musààlàlà mufiike ewu ukààvwà ùlàka dyòdi adi. Taatù mukolè awu kwimanayè, kupwekeshayè mutù wèndè, kàdi kushiyayè mukungulu’s we, nènku, ngàmba ne, mu mùshindù wà ne mabwe àkapulumuka pa kakùnà. Kaa, ekèlekèle! Yèyè’s mmufwànyine kunyukusha cimenga cijimà eci, bu yèyè mwà kukungula mùshindù awu mwab’ewu. Mukungulu wa nyama wa ntambwe, kaa, yèyè’s ùdi ne bukolè bwà njajama!

¹⁵¹ Nènku ki mukungulu awu kupàtùkawù bwà kulwisha kàmpimpinyàmà kàà nsuki mvwangala aka, mutùdiku twètù bafwànyine kukabiikila’s, dībà adi cintu kàdi kwenzeka’s. Kàmpimpinyàmà aka kuyakù tàmakàtàmakà e kumupyàku ku mbàngà aku, ne kutèèkakù cyanza cimwè mùshindù ewu ne cikwàbò mùshindù ewu, kabìyi byà mubindùlùkekù to, kàdi kumupandululaye ànu cyanààná e kumulààdikayè panshi mwab’awu. Aci’s ncidika. Cìvwà cyenze bwalu abu ncinyi? Bu nwènù mwà kumòna panùdi nubala ànu kumpàla kwà cyòci aci aku ne: “Ne,” mutwangaji awu, “Nyumà wa Mukalenge wàkamwikila.” Ki cyàkenzà dishiilàngana ncyòci aci. Ne yèyè wàkashipa nyama wa ntambwe awu.

¹⁵² Pashiishe ditùkù dikwàbò beena Pelèshète kulwàbò bènda bàdimbatangana nendè. Yèyè kàvwà ne byà mvità to. Bòbò bàvwà cinunu cijimà cyà Kabàmbà. Bàvwà ne mafùmà male ne ngabu minène, miine ayi myenze bu ciibi kumpàla kwèbè, mùshindù ewu, miine ngabu ayi. Anji elààyibì meeji ku ngabu munène, munène wa cyamù cyà mitàku mpindyewu, bakujiike nseke yònsò kumpàla kwèbè aku, bavwàlé bifulu byaà mvità byà cyamu cyà mitàku, binkutu binène byà cyamù cyà mitàku, ne cyàm-pàla cijimà cyà mikòlo yàbò aci ne bikwàbò byònsò, ànu bijika ne cyamù cyà mitàku; mafùmà manène, manène male, male ànu mùdi. . . akafika too ne ku dikunji didi kwaka dyàdya, pàmwàpa a bule bwà mètres ataanu anyi àsambòmbò. Nsongo minène yà cyamù cyà mitàku myasakù mùshindù awu, mitwè ànu mùdi kapaaya amu. Nènku kupetanganabò ne kàmpimpinyàmà kàà nsuki mvwangala aka kàpweka kàfùmina mu Palestine, bwà kukùmbùla mulunda wèndè kampànda wa bakàji muntwamu. Ki kwambabò ne: “Ki kalùmyààná aku nkòkò kaka. Tùyaayi tükàkwàtè!” Muntu umwèpelè ùvwà mwà kwikala mukàmbwile ànu ku lusongo lwà difùmà aku, kukàjuula ànu cyanààná kàdi kukànyùkulula ndambù, ne kòkò’s kàvwà mwà kupòna buludi kapweka too ne ku cyanza cyèndè, kwìnshì kwà cikwàcìlu cyà difùmà aku. Mona’s, yèyè’s uvwa ànu kalùmyààná kàà kakesè menemene kàà kale aka.

¹⁵³ Bàmwè bantu, bazodi’s, bàtu bàteeta kuzola Shimishòònà mwikàle ne—ne makaaya mu mùshindù wà kàyikù mufwànyine kukùmbana kubwela mu tabernacle emu to. Ee, aci kì ncifwànyineku kwikala bwalu bwà bùkèmesha to bwà yèyè. . .

muntu wa bunène abu. Shimishòònà ùvwa ànu kantu kakesè menemene kàà kale, kàdi Nyumà wa Mukalenge nguvwa munène. Nwamònu anyi? Yèyè ùtu wàngata... Aci—aci—aci's nkupeepeja kwà Mifùndu's, pa kwamba ne yèyè ùvwa muntu wa bunène abu.

¹⁵⁴ Nzambì ùtu misangu yònsò waàngata ànu bintu bicimbè ne byà bunyònga abi bwà... mùshindù awu, bwà kwenza naabi mudimu Wèndè, nudi numòna's. Yèyè ùtu wànganta cintu kampànda cidi cintu cyanàànà aci.

¹⁵⁵ Nenku kalùmyàànà kakesè aka kàvwa kiimane mwab'awu, dyàkamwè ki beena Peleshete aba kulwa e kumujiàngabò, bwà bòbò kumushebeya. Ki yèyè kwangata mufùbà wà lubàngà lwà kampundu lùvwa lùsanganyiibwà mwab'awu, kampundu kàà cisuku, lwà mpunda mukèsè, kubàkulayè mufùbà wà lubàngà lwà kampundu aku. Nènku Nyumà wa Mukalenge kumwikila. Nènku kwenzekakù cidikà's, mùshindù wàkatuutanganàye e kuzengejangana, ne mufùbà wà lubàngà lwà kampundu awu, kutubula ne bifulu byà mvità bìvwà ne mupimbu wà centimètre umwe ne ndambù pampàlà pàà mitù yàbò abi, ne mufùbà wà lubàngà lwà kampundu awu! Mona's, cyàkumpàla, mufùbà wà lubàngà lwà kampundu wùvwa wùsanganyiibwà mwab'awu awu, ànu dituuta dyà kumpàla dìvwàye mufwànyine kutuuta naawu adi, s'wùvwa mwà kwikala musunsulukangane tupese cinunu, pampàlà pàà cimwè cyà ku bifulu byà mvità abi anyi ngabu minène ayi. Piine apu, pàakamwicikidilà cinunu cijimà aci pambidi, kadi kubàtuutayè e kubashebeyaye bwònsò. Cidikà's! Apu mpàvwà Nyumà wa Nzambì mumwikile.

¹⁵⁶ Kaa, twètù aba twìkalapù nànsha mifùbà yà lubàngà mu cyanza cyà Nzambì's we, nunku's nkwenzèke cikwàbò cidikà. Eyowa's, cìvwa ncyòci.

¹⁵⁷ Cìvwa ncidikà pàakangatà Yesù, Mukalenge wetù, bisùkwita bitaanu ne tuumishipa tùbidì, kubìcìbulaYè, kudiisha bantu binunu bitaanu. Ne kwangatabò bisakà byùle ntèntè ne bìvwà bishààle, tupese tukèsè tùvwa bàmwè bàà kùdìbo kabàyi... Bàvwa mwa kutèeka mishipa yìnaayi anyi yìtaanu pa *aa* mèèsà, ne milungu yà màmpà yìnaayi anyi yìtaanu, ne pashìishe bàya *apa* ne bàtèeka milungu yà màmpà yìnaayi anyi yìtaanu. Ne bàmwè bàà kùdìbo kabàvwa nànsha mwà kubidya byònsò to, bàvwa babilekela bitèeka ànu mwab'awu. Ki kubyàngululabo, byùle bisaka ntèntè. Kaa! Nwamònu anyi? Yèyè wàkacyènza bishi? Ncyà kabàyi mwà kwitabuujaku to bwà Muntu wètù ewu mufwànyine kwangata bisùkwità bitaanu ne tuumishipa tukèsè tùbidì, kadi kudiisha bantu binunu bitaanu, ne kwangata bisaka mwandamutekète byùle ntèntè, bìdìbo bashìye. Ncyà kabàyi mwà kwitabuujaku to, kadi's Yèyè wàkacyènza. Bwà cinyi? Cìvwa n'Nzambì. Cìvwa ncidikà. Ncyà kabàyi mwà kwitabuujaku to, kadi Yèyè wàkacyènza.

158 Cìvwa cyà kabàyi mwà kwitabuujaku to, kacya ní nkumpàla ní mpaanyimà, pa mbù mutuuta kùdi cipeepèlè cicolè, ne mavwala mabànde muulu bikolè mu mùshindù wa ne cìkaavwa cìinyija ne bwâtù, pààkalwà Muntu wènda ùkòsolwela mu miine mavwala awu. Ndi mwà kumòna musangu wònsò wùvwà ànu— ànu divwala dinène divwà ne ntutu mitòoke adi dilwa pabwìpi Nendè, ataayika ànu cyanààna kàdi kupona panshi ditàngilè mwinshì mwà mâyi, ne Yèyè mutùngùnuke ànu ne kwenda, ànu bu ne Ùvwa wèndela pa mwaba mwela nshàamendà. Wèndela pa mbù, mu cikondo cyà cipeepèlè cicolè! Maalu a mamanya ànjibi kudifwànyikijila ciine aci tǔng. Ncinyi cìvwa ciMulame kuulu aku aci? Ncinyi cìvwa ciMulame pa mbù awu, pàdìbi ne mbù udi ne bwondòke bwà mètres nkàmà mwandamukùlù mijimà? Piine apu mpàvwà mavwala manène awu, bunène misangu yàbùngì kupita tabernacle ewu, àsàmpuka, mona's, mona's, kuujuwu kaabwàtù kakesè aku ne kukuujuwu ne mâyi. Kàkaavwa kabolè ne mâyi munda ne paanyima, ne kàkaavwa kàdiina, makunji àvwà miimane macibùke madishinde, ne nkapi yikaavwa miye, ne ditèkemena dyònsò dyà kusùngìdiibwa dikaavwa diyè. Kàdi ki Muntu kampànda ulwàlwa ewu wènda wèndela pa mâyi! Cidikà, bushùwà's, kacyi cyà biitabuujaku, kacyi cyà bumvwija to, kadi Yèyè wàkacyènta. Kaa, eyowa's, Yèyè wàkacyènta, mulwè wènda wèndela pa mâyi. Ncyà kacyi cyà biitabuujaku to ne Yèyè umwèumwè ewu. . .

Éyi Nzambi, ndi ntekemena ne eci cidi cìbàbwelakù!

159 Kacyi cyà biitabuujakù to, cidikà cyà menemene, cyà ne Yèyè umwèumwè ewu, Yesù wa ku Nazalèètà ewu, mufwànyine kusungula musumbà wa balobi bàà mishipa biikàle binyongà bwà Èkèleeziyà Wèndè, pamutù pàà baakwidi balongesha bìmpè ne màngumba a mu diine ditùkù adi. Mùshindù wùvwà Nzambi wa lungenyi lwònsò, uvwa mwà kwendela pa mâyi awu, uvwa mwà kwandamuna mâyi alwa mvinyò awu, uvwa mwà kwangata bisùkwità bitaanu kudiisha bantu binunu bitaanu, ne kwangulululabo bisaka byùle ntèntè ne bìvwà bishààle abi awu! Mùshindù wùvwà Yèyè umwèumwè awu, Nzambi udi musòmbèle mwàmwa mu Cyendèlèlè awu, udi ubàlakana bikolè mu mùshindù wà ne mèbà a muulu miine àsokoka mpàla yàwù kumpàla Kwèndè; dijiba diine dyà lungenyi ne bukezùke, ne dyumvwa ne dimanya, Wa kumutù kwà bàà kumutù awu! Kadi Yèyè mufwànyine kulwa mu mwaba wùdi bulongolodi bunène bwà maèkèleeziyà àvwà madisangishe pàmwè ne malongeshe bantu bààbò bwònsò, kadi Yèyè mupweke muye kangata musumbà wa balobi baa mishipa baa manyaanu ne banunka mupuuya mubolè, bàvwà kabàyiku nànsha bamanyè mwà kufunda dìnà dyàbò diine, kàdi kusungula bantu bàà mùshindù awu bwà kutèekabò Èkèleeziyà mu bulongàme bwà Mukaj'Èndè musèla. Cintu cyà cikèmesha be, kí mmwòmò anyi? Mbyenze ànu bu ne, bivwakù bikumbàne, bwà Yèyè kwikala

mwangàte muntu kampànda uvwa mulongèshiibwe.

¹⁶⁰ Yèyè's ki Mulongeshanganyi mwine. Yèyè's ki Udi ucyènza. Bidi bikèmesha be mùvwàYe mucyènzè. Pamutù pàà kwangata bantu bàà mu èkèleeziyà, Yèyè kwangata balòbi bàà mishipa bwà kucyènzabò bóbò. Cyà pabwàci be, kàdi mùshindù awu's ki wùdiYe ùcyènza. Ncyà bushùwà's. S'ncidikà ànu cyà menemene eci.

¹⁶¹ Pààkangata Nzambi musumbà wà binyonga apu, mutùdi bafwànyine kubàbiikila leelù ewu ne, “bansantu babunguluki bàà mu malaba,” balanda, mu bintu byà buloba ebu, ne kubiiikijila Nyumà Mwimpè, mu cibambalu cyà kuulu; pamutù pàà kuMwicikijila Nsangilu wa Tubàdi twà beena Yudà, mùvwà beena teoloji bònsò batuule bapùwe, mùvwà bantu bònsò banène basanganyibwa, mùvwà mfùmù wa maèkèleeziyà wònsò, mùvwà aba bàvwà balonge Mifundu, ne bajikije cilongelu cinène, balongeshiibwe bimpè, ne bindile Maasiya uvwa ulwa, ne bamanyè ne bóbò ki bàvwà mwà kwikala mwà kupatuka bwà kutuutakeena Nendè, ne kwamba ne: “Maasiya, Wèwè's watùluku byenze ànu bu pa mapwapwa a ndèkè, Udi mwikile apa pa bibandilu byà ntempelu, twàKumònu utùluka mu Dyulu, ùmùkila mu tujila twà ngòlò twà mu Dyulu atu. Mpindyewu twètù bònsò tukàadi balongeshiibwe ne badilongòlole bwà kuya ku mudimu. Tukàadi bamane kupeta dilongeshiibwa dyètù, tukàadi ne mapolome ètù à bu-Licencié, tukàadi ne mapolome ètù à Ph.D., LL.D., ne *bikampànda* byònsò. Tukàadi bwònsò balongeshiibwe. Ki twètù aba biimàne, binunu dikumi byà Kabàmbà. Tukàadi badilongòlole bwèbè Wèwè. Lwàkwaku! Nyewu tudi bindile, munkaci mwà kubiiikila ne: ‘Lwàkwaku!’”

¹⁶² Kàdi pamutù pàà aci, Yèyè ùdi ùpweka ne wàngata musumbà wà bantu bàvwà kabàyi bamanyèku ne cyanza cyà dyàbalume ncyèpi ne cyà dyàbakàji ncyèpi to. Aci's ncyà bushùwà. Kàdi kubatèeka mu cibambalu cyà kuulu, kadi kwicikijila Nyumà Wendè, Èyi Nzambi wa yàayà, pa musumbà wà bantu bàà nànu awu. Pamutù pàà kwangatakù Nsangilu wa Tubàdi twà beena Yudà, Yèyè kwangata balobi bàà mishipa. Kabyènakù bikèmesha mùvwàYe kàyi mukwàte mudimu ne malonga àbò à tulaasà awu anyi? Ki mwàkasànkishàbi Nzambi nànu.

¹⁶³ Mbimwènèke ne bìdi bisankisha Nzambi bwà kuvwija Èkèleeziyà Wendè Yèyè mwine cidikà. Cintu cimwècimwè aci ncidiYe munkaci mwà kwenza patùdi twakulangana apa, ùvwija Èkèleeziyà Wendè cidikà, mwikàle ùcinguluka byònsò byà binène byà tuyaayi tükamòne abi, ne bintàkanyi byònsò bidìbo bàbiikila ne ng'èkèleeziyà ebi. Ne Yèyè neikalè mwà. . . muntu kanà yònsò udiYe mwà kupetakaja mu cyanza Cyèndè awu, aci necitàbaje mèsù àbò bwà kumònabò cidi Bulelela, ne kuButèeta ku Dìyi dyà Nzambi mu cikondo citùdi ne mwoyi, ne kubàteeka mu Mubidi. Cidikà! Nzambi ùtu usungula wa nànu awu. Ùdi

uvwija Èkèleeziyà Wendè cidikà, bantu bàà pabwàbò, bantu bàà bàkèmeshangana.

164 Bwònsò bàvwà mu cibambalu cyà kuulu abu, bààkapàtukamù bènda bààkula mu mwakulu mwenyi, bènda bàtètuka bu bantu bakwàcike maala, bènda bàtètuka ne bàtùngùnuke nànkù. Bakàjì, mamw'Èndè muMuledi—muMuledi ne bònsò bàvwà mu cibambalu cyà kuulu abu, bààkapàtukamù, bènda bàkukumina cintu kampànda mu mùshindù wa muntu nànsha umwe kàyiku mwà kuumvwa cìvwàbo bènza to, kuntwadijilu aku. Bàvwa ne ndimi mipandùluke milwe kusòmba pamutu pààbò apu. *Mipanduluke* mbwena kwamba ne “myabùlùke.” Muntu nànsha umwe kààkumvwakù cìvwàbo bènza aci to. Bàvwa bènda bàkùkumina mwab'awu, ne bènza maalu byènze bu ne bàvwa bakwàcike maala.

165 Kàdi ki musùmbà wà bantu bàvwà balongèshìibwe mbòbò abu bàvwà biimàne mwab'awu, bamanyi bàà mabàlà bàà Èvànjeeliyò, beena tèòlòji, kàdi Nzambi wàkasungula (Nzambi) bwà kubàngata ne kubàshìya basòmbe mu dipanga dyàbò adi, ne meeji àbò matwè ne malonga àbò àà tùlaasà awu, ne wàkalwa apa e kwangata ewu musùmbà wà bantu bàvwà kabàyi bamanyè nànsha ABC to, ne kubùicikijila Nyumà Wendè, kubàvwija cidikà. Eyowa, Nzambi ùtu wènza aci, Yèyè ùtu wènza aci mu kiipàcilà Kèndè Yèyè mwine. Yèyè udi ùvwija Èkèleeziyà Wendè cidikà. Mémè ntu ngitabuujà bidikà. Ndi mbiitabuujà!

166 Ndi ngambilamu, Nzambi, ndi ngiitabuujà Dìyi! “Dìyi dyà muntu yònsò diikalè mashimi, kadi Edi diikalè Bulelèlà.” Cidì Dìyi edi dyàmba bwà kwenza aci, tucyènzaayi mùshindù wùdi Dìyi dyàmba bwà kucyènza awu; nànsha cyòci cimwèka cyà lukutukutu bìshi, ne nànsha wèwè ushààla wa mùshindù wa pabwàwù, anyi cintu kanà cyònsò cyà muùshindù awu, wèwè shààla ne Dìyi. Bòbò bàkubiikila ne udi wa cyena kale, bàkuubiikila *cikampànda*, *cikansanga*, anyi *cikankènga*, cyùdi ubicyùkila mene ncinyi's? Shààla wèwè ne Dìyi edi! Edi ki Dyòdi, Bulelèlà abu. Kwàngaci cidì muntu mukwàbò kampànda wamba to. Angatà cidì Dìyi dyàmbe.

167 Mwab'ewu àbidi àdi panshì aa, mwambi naanyi kampànda. . . Ndi mfùma ku dyumvwa bàmba cyòci eci. Ntu ncitabuujà. Mpingaja kampànda a dîbà dyà luuyà lukolè mu Géorgie mwàmwa, ùvwa muye kakùmbula mwenji kampànda wa . . . wa manga a lwòndapu. Mwenji wa manga a lwòndapu awu uvwa mwanèètù mwena Kilistò wa kale wa maalu mimpè, mùle tètè ne Nyumà wa Nzambi. Nenku yèyè kwamba ne: “Bwela ùsòmbelè panshì, nènku tunweku kaa—kaa'Coca Cola.” Bàvwa basòmbe mwab'awu, munkaci mwà kunwà Coca Cola wabò awu. Yèyè kwamba ne: “Ndi muswè nkulondeleku bwalu kampànda, kadi pàmwàpa kwàkwitabuujaku ciine eci to.”

“Ee, twǎnjì tùcyǔmwè’s, dyàmbedi,” mwàkambà mwambi awu.

168 Awu ne: “Mémè ntu nditácisha misangu yònsò bwà kwenza ne mwanyi mwònsò bwà Nzambi.” Yèyè uvwa mulami mu èkèleeziyà kampànda. Yèyè ne: “Ntu nditácisha misangu yònsò bwà kwikala ne mwoyi bwà dibìikidiibwa dyànyì, ne kwenza cidi cijaalame.” Yèyè ne: “Kacya ncitukù mwanji kwibila kùdi muntu nànsha umwe to. Ntu misangu yònsò ànu mfidila Mukalenge wanyi bujaadiki, myaba yònsò ne mwànyì mwònsò.” Ki yèyè ne: “Nkaadi, bwà . . . Manga àànyì à lwondapu aa,” yèyè ne, “ntu ànu muteetètèete bwà kwikala nààwù à mùshindù mutámbe kubàndila àdi àpetekà. Kacya ncitukù mwanji kutwila muntu nànsha umwe musinga mupitèpitè bukolè to. Ntu nditácisha ànu bwà kwenza kantu ne kantu kònsò kàdi kajaalame, kànkaadiku pàànyì mumanyè mwà kwenza aku, bwà kukwàcila Mukalenge mudimu.” Yèyè ne: “Ndi muswè nkwambilè cidi cyenzèke.”

169 Yèyè ne: “Mwanàànyì wa balùme, ùtu ùlonga bwà kushààlayè pèndè mwenji wa manga a lwòndapu awu, bwà kumfwànà mèmè, ùvwa ùsanganyiibwa kumpàla kwà nzùbu ewu kwàka dǐngà ditùkù.” Ki yèyè ne: “Mùvwa mmu cikondo cyà lukòta.” Yèyè ne: “Inǎbànzà mutekète kampànda e kubwelaye mu—mu ciibi amu,” ki yèyè ne, “mùvwa mùshindù wà kumòna civwà lutàtu lwèndè. Ne yèyè mwine ùvwa ne difù. Ne bàyèndè, bóbò biine bònsò bàbidi, bavwàle mvwàdilu ànu wa lutàtu ewu.” Yèyè ne: “Kufilabò kabèji kàà manga kùdi mwanàànyì wa balùme awu,” ki yèyè ne, “bwà kukàfidilabò manga, bu mùvwàbi ne mukàji awu bìvwa bìmukèngela cintu kampànda civwàbo bamufùndile kùdi ngàngàbuka. Ki yèyè ne, mwanàànyì kwambaye ne: ‘Eci neciikalè musinga kampànda, *cikampànda-ne-cikansanga*,’ pààkakonkà yèyè uvwa ne cyà kwikala tatwèndè wa kàdimùndà awu ne: ‘Neciikalè musinga kaayi?’ ‘Musinga *kampànda*.’ Yèyè ne: ‘Mukalenge, ncyàkukùmbajija kabèji kàà manga aku to, anyì kukàfidila manga,’ mwakambaye, ‘bwalu ncyèna ne mfranga to.’”

170 Ee, yèyè ne: “Mwanaanyi wa balume kwambaye ne: ‘Ndaayi nwenda nupweka balulàme ne mùsèèsù wawa, anu lwà pankaci pàà mpangu yibidi apu, anyì mpangu yibidi, ne nùkobè ku dyàbakàji, nènku nenùmonè mwaba—mwaba wùdìbo bàfila byà kàà pa luse. Nenku nuye ku commune kwaka, nenku pàmwàpa nebànùpe mfranga yà kwikala naayi, anyì dìyì ditùma, bwà bóbò bààmona mwà kufuta mfranga ya kabèji kàà manga aka, bwalu (kòkò kàdi) bìdi bìkèngela bwà inǎbànzà ewu àpetè bwà—bwà—bwanga ebu kakùyì dijànguluka to.’” Ki yèyè ne: “Kupàtùkayè mwaba awu, kwasayè lwendu.”

171 Ki kwambaye ne wàkatèèleja mwanèndè wa balùme awu. “Nènku cintu kampànda kwambaci ne: ‘Kaa, to, kwenji nànu to.’ Cyòci ne: ‘Mukàji wàwa udi dijinga ne cyòci aci.’” Yèyè

ne, kwenzekabi bwa afike ku dyela meeji ne: “Wàwa mulongo wà bantu bulewù too ne kuntu kwàka wàwa! Nyewu mbikolè bwa muntu mulùme ne mubidi tumatuma bwà kushààlaye kacya wimana mu mulongo amu, bwà maamù mu mùshindù wàwa katwàmbi to.”

172 Yèyè ne: “Mémè kwambila mwanàànyì wa balùme awu ne: ‘Ndaaku, ùbàbìikilè, ùbàmbilè bààlukilè.’” Yèyè ne: “Ki mémè kuya lubilu ku ciibi, kwamba ne: ‘Alùkilaayee! Alùkilaayee!’ Ki kwalukilabò. Nènku mémè kwambila mwanàànyì wa balùme awu ne: ‘Fila manga àdì mafunda pa kabeji aku. Kàkwèna byà difucisha to.’”

173 Ki yèyè kwamba ne: “Mwanàànyì wa balùme kumpèèshayè kabèji kàà manga aku, mémè kuya e kufila manga àvwà mafùndapù, mémè kufila manga àvwà mafùndapù ne mwànyì mwònsò mùmvwà mwà kuuja amu. Nènku mémè kupàtùka naakù bwà kukàpeesha inàbànzà awu, ne bwà kumwambila ne kakùvwa byà difuta bwà cyòci eci to. Aci cìvwa cikùmbàne, bwalu yèyè uvwa naaci dijinga dyà menemene, ne—ne mémè mvwa mufwànyine ànu kwikala muyilekèle mene, nànkù, mfranga miine yà cyòci aci ayi.”

174 Pa nànkù yèyè kwamba ne: “Ncìvwa ànu mbanga bwà kuteeka bwanga abu mu cyanza cyà inàbànzà awu. Kàdi, ndi mwenze ànu mmutèèkabu mu cyanza, mémè kutàngila cyanza aci. Cìvwa ne cibangu.” Yèyè ne: “Mémè kwambulula mpàla, kàdi mùmvwà ntèèka bwanga mùvwa mmu cyanza cyà Yesù.” Yèyè ne: “Mémè kuyiila díbà adi, Mifùndu, cìvwàci cyùmvwija ne: ‘Misangu yònsò yinùdì benzèle bàdì batàmbe bukesè bàà ku bòbò aba, bàà ku bânà Bàànyì aba.’”

175 Kwambaye ne: “Wèwè udi witabuuja aci anyi?” mwàkangambilà muntu awu. Mòna’s, bushùwà, mémè’s ndi ngìtabuuja cyòci aci.

Cìvwa ncidikà, kaciyi cya bìtabuujakù to, kadi ncilelèlè.

176 Kadi bìshi bwà Martin Munsantu munène, wa ku Tours awu, mu France: Yèyè, mwikàle mùsàlaayi, ùvwa wènda ùpweka ne mùsèèsù bufùkù kampànda bwà mashika, mwikàle mîdimà, ne kùvwa. . . Mu mwine mùsèèsù mùvwà mashika ne mîdimà emu, mùvwà musanganyibwa mulalakanyi mukwàbò, mulààle mu mùsèèsù amu, ùminyina ne mashika. Mashi ende akaavwa àmuuminyina mu mijilu. Ki Martin, kayi nànsha mwanji kwikala mwena Kilistò to. Kadi muntu kanà yònsò ukààdikù mubale maalu malonda àà Bible, mmumanyè Martin Munsantu. Mufùndi wa maalu malonda awu ditùkù adi pàvwàye ùteeta bwà kupeta karta kèndè, ki yèyè awu ùndì mémè mwangàte bwà—bwà cikondo ciisàtù cyà èkèleeziyà, Martin Munsantu, bwalu yèyè ùvwa ne bimanyinu bimufila. Ki Martin Munsantu kutàngilayè pànshì kumpàla. . . yèyè uvwa mùsàlaayi, nènku ki mukùlàkàjì kampànda ewu mulààle pànshì apu, mulààdile

mu mùsèèsù, ùminyina ne mashika. Ki kutàngilayè, kàdi ùvwa ne cinkutu ànu cimwèpelè; yèyè kayi ne cinkutu aci to, ùvwa mufwànyine kuuminyina ne mashika. Kwangataye keele kèndè e kupandululayè cinkutu aci pankaci, ne kucijingilayè mulalakanyi awu. Kudijingilayè pèndè yèyè mwine cikwàbò cipese aci, kadi kutùngunukayè ne diya.

¹⁷⁷ Bufùkù abu, pààkabwelàye mu cibambalu cyèndè, ne yèyè mumane kusòmbela panshi, kuumvwaye Muntu kampànda ubwela mu cibambalu amu. Kutangilaye, ki Yesù udi ulwa ewu, mujingila mu cyòci cipese cyà cinkutu aci. Aci, ki cyàkadì dyèndè dibìikidiibwa dyà ku mudimu wà bwambi.

¹⁷⁸ Kulwaye munsantu. Ùvwa wàkula mu myakulu. Cilongelu cyèndè cívwa cilongèshibwe. Wàkalongesha bèndè bantu ànu ne Dìyì dyà Nzambi. Kààkacyùka cívwa Èkèleeziyà wa Kumpàla wa Loomo anyi ní nganyì ní nganyì wa kùdibo mwambe to. Yèyè wàkashààla ànu ne Dìyì dyà Nzambi. Wàkabàlongesha; bààkula mu myakulu, ne bàtentekela babèedi byanza. Bàvwa bàbìisha bafwè. Bàvwa bìipata baadémons. Muntu kampànda, mulunda wèndè, bàvwa bamushipè, kàdi yèyè kuya ne kulàadika mubidi wèndè pambidi pàà yèyè awu, (mwanji kulomba ní ùvwaku mwà kumumòna munda mwà tusunsa tukesè), yèyè ne nyààndè awu kupàtùkabò bènda bènda, pàmwè. Bwà cinyi? Cívwa ncidikà. Cyà bushùwà's, Nzambi ngwàkacyènta.

¹⁷⁹ Mémè ntu ngùtabuuja bidikà. Eyowa's, mukalenge. Ntu ngùtabuuja. Ntu mbùtabuuja, ne mwoyi wànyì wònsò.

¹⁸⁰ Cívwa ncidikà pàvwàbi ne, beena meeji matwè bònsò bàvwa pa buloba, kàdi Nzambi kutèeka nsapi yàà Bukalenge mu byanza byà ewu ùvwabò bangata bu “mupangi ne kayi mulonge kàlaasà awu.” Ncyà bushùwà. Umwe wa ku bantu bàà batàmbe kwikala bàà meeji matwè pa buloba, mu diine ditùkù adi, ùvwa n'Kaayifa, mwakwidi munène; bakwabo bàvwa mbakalenge bàà mamfùmù maalàbàle ne bamfùmù, ne bantu banène bàà pa buloba, bu mùdì bamfùmù bàà matùnga ne bakwàbò, bantu banène bwònsò aba.

¹⁸¹ Nènkù cintu cidì citàmbe kwikala cyà mushinga pa buloba ncinyi? Ng'Èkèleeziyà wa Nzambi! Nzambi ngwàkafùka buloba, Yèyè wàkabùfuka mu kiipàcilà: bwà kupàtùlamù Èkèleeziyà kampànda, Mukàji-musèla. Nènkù awu ki mudimu wùdì mutàmbe kwikala wà mushinga pa buloba.

¹⁸² Nènkù bantu bàvwà batàmbe kwikala bàà meeji matwè bàvwàYe naabò bàvwa mbakalenge bàà mamfùmù maalàbàle ne bamfùmù bàà matùnga, ne balombodi bàà makòokeshi maalàbàle ne bakòokeshi, baakwidi banène ne beena mu èkèleeziyà. Yèyè's uvwa mufwànyine kwikala mwangate umwe wa ku bòbò abu. Kadi cívwa ncidikà mwàkabiikilàYe muntu uvwa kayi mumanyè nànsha mwà kufùnda dìnà dyèndè yèyè mwine, kàdi kwàmba ne: “Nènkupèeshè nsapi yà Bukalenge.

Cyònsò cyúdi wêwè uswikà pa buloba aci, Mémè nênciswikè mu Dyulu. Cyúdi wêwè usùlula pa buloba aci, Mémè nêncisuùlùlè mu Dyulu.”

¹⁸³ Ambà tǔng, ndi mfúma ku dyela meeji ku cikèèná-kumòna aci cyà ne: “Cyúdi wêwè uswikà anyi usùlula aci.”

¹⁸⁴ “Cyúdi wêwè uswika pa buloba aci, Mémè nênciswikè mu Dyulu. Cyúdi wêwè usùlula pa buloba aci, Mémè nêncisuùlùlè mu Dyulu.” Èyowà, Yèyè kààkacipèèsha mwakwidi munène kampànda mulonge kàlaasà, Kaayifà to, kàdi mulòbi wa mishipa mupangi. Cidika cyà bushùwà!

¹⁸⁵ Tudi tumòna Pòlò, keena Yudà kàà dyùlù dikònyàngale kènda kàpwèka ne njila, keena dyambu, kàpwèka kàya bwà kuswika bantu bàvwà bènza mutooyi awu abu, ne beela mbila, ne bikwàbò; ùbeela mu bulòko, unyangakaja Èkèleeziyà; kwasayè Stefano mabwe, mudimwene ne èndè àbìdì, ne mulame binkutu byàbò. Yèyè—yèyè uvwa mwena mifuunu mikolè. Mmuniyè mùdì Nzambì mufwànyinekù kusungula muntu bu nàнку awu?

¹⁸⁶ Kàdi, tàngilaayi, bèèpiskòpò, bàpostòlò bwònsò, kwambabo ne: “Netwènzè disungula, dyà muntu udi mwà kwangata kaaba kàà Yudààsè.” Kàdi bààkasungula nganyi? Bààkasungula Maatiyà. Maatiyà, ngeela meeji ne ki mùdìbo bàmbuikila. Maatiyà, eyowa. Maatiyà, bàakamusungula ku dyela dyà nshòbò, kadi kacya yèyè kaakenzaku kantu nànsha kàmwè to. Ùvwa ùmwèka muntu mwakàne. Kàdi Nzambì wàkasungula ewu uvwa mutàmbe kwikala wa cilunji cibànde awu, muntu uvwa mutàmbe kwikala wa lwonji mu ditunga amu, bwà kwangatayè kaaba kèndè. Cidikà! Kì cìtù Nzambì wènza ncyòci aci. Cidikà!

¹⁸⁷ Cìvwa ncidikà pàvwà mwena Yudà uvwa kàyì ùneemeka Nzambì ewu, wa mutu mwela muulu, wa cilunji cibànde, wa lwonji, wa bàpeetula ùvwa mu njila wènda ùya, ditùkù kampànda, mutàngile ku cimenga kampànda, bwà kuya kaswika beena Kilistò ne kubèèla mu bùlokò, ki dībà adi, dyàkàmwè, kwediibwaye panshì. Kadi pàakabàndùlukàye, ki Dikunji dyà Kapyà adi diimane pàapa, ne Dìyì dilwa, dyàmba ne: “Shawùlà, Shawùlà, udi uNkèngèsha bwà cinyi?” Cìvwa ncidikà pàvwàye yèyè mwà kuDimòna, kàdi bakwàbò abu kabàyikù mwà kuDimòna to. Nwamònu anyi?

¹⁸⁸ Muntu kampànda ùvwa wàmba ne: “Kaa, kacya mémè ncìtukù mumòna Cyòci aci to. Kakùtukù cintu cyà bu nàнку kuntwaku to; eyowa, s’mmwómò. Mbyà mafi.” Pa cyòci ciine eci leelù ewu, bàdi bàmba nùнку ewu: “Mémè ncyèna ngùitabuujà byà nàнку to.” To, ncyà bushùwà ne kwèna witabuujà to. Cyà bushùwà’s. Kàdi, kùdi aba bàdi bàDimòna kwòkò aku. Bushùwà, pawikalà wèwè kuyi mwà kumòna to, udi mpofò, kwèna mwà kuDimòna to.

189 Muntu mmungambile, kùkaadi cikondo kampanda, kukaadi bidimu mulongolongo, wàmba ne: “Mpindyewu, mèmè mwikalè mu webè njila awu. . .” Yèyè ne: “Mpindyewu, Pòlò’s wakavwija muntu kampànda mpofo.” Yèyè ne: “Piikalàbi ne mèmè ndi wa dyabulu,” yèyè ne, “mvwijaaku mpofo tũng.”

190 Mèmè kwamba ne: “Kabyèna bikèngela ànu bwà aci nàнку kwenjiibwaci to. Wèwè’s ukàadi mumanè kwikala mpofo. Wamònu’s, wèwè’s ukàadi mumanè kwikala mpofo. Wèwè’s udi ne bufofo bwà mùshindù wà mutàmbe kwikala mubi, wamònu’s.” Mèmè ne: “Anà, mu ntempèlu, ùvwa mwà kumòna kule kutàmba paùdi wèwè mwà kumòna apu. Kadi yèyè ùvwa mpofo, mu mubidi emu.” Yèyè muntu awu ùvwa mpofo, mu nyumà. Bushùwà. Cìvwa ncidika.

191 Cìvwa ncidika pàakavwija Nzambi cìvwàbo bàbiikila ne ngiitabùùjilu mupambwishi awu. . . Mitooyi yònsò eyi, ne mbila, ne ditùmbisha dyà Nzambi, ne dyakula dyà mu myakulu, ne bantu bàdi bapeetùdiibwe ne babèngiibwe, ne babiikidiibwe ne mbatàtàkane ne baabuludyanganyi; ncidikà pàvwà Nzambi, Taatù wa bwònsò, Taatù wa Mukalenge wetù Yesù Kilistò, Yèyè wakasungula musumbà wà “baabuludyanganyi” bwà kutwàdila Èkèleeziyà Wendè lupàndu, pamutù pàà ndongolwelu mulongesha bîmpè, wa ntendeleelu. S’ncidikà.

192 Ànu àbìdi àdi panshi aa mvwa nsanganyiibwa mu cimenga kampànda mu Washington, anyi, ngeela meeji ne mùvwà mmu Oregon. Nènku kulwaku kàmònakàmba kampànda—kampànda, baakàmònakàmba bàbìdi bàà batekète, biikalè ne micì yà mfwankà ku byanza. Kubwelabo. Bàvwa baswè bwà kufùnda maalu antangila mèmè, nènku, bushuùwà, ànu byà menemene, nudi bamanyè’s. Nènku bàvwa bàtùngunuka, bàmba cintu kampànda ne cintu *kansanga*. Ki yèyè ne: “Nènku—nènku wèwè udi munsantu mubùnguluki wa mu malaba anyi?”

193 Mèmè ne: “To.” Mèmè ne: “Kacya mèmè ncitukù mwanji kubùnguluka mu malaba to. Kàdi,” mèmè ne, “ndi—ndi ngeela meeji ne bu Yèyè mwà kungambila bwà kubùnguluka mu malaba, ndi mufwànyine kubùnguluka.”

194 Ki mèmè kutùngunuka ne kuyiikila mùshindù awu, nudi bamanyè’s. Nènku yèyè nsongaakaji awu kutùngunuka, ki yèyè kwamba ne: “Tss, tss, tss, tss,” kaa, mutùngunuke’s. Mèmè kwamba ne: “Anji itabaku nkwabibile bwalu kampànda, nsongààkàji wetù, funda wèwè ànu cyònsò cyùdi muswè kufùnda aci. Wèwè’s udi mwena Kàtòlikè.”

195 Yèyè ne: “Aci ncyà bushùwà.” Yèyè ne: “Wàfikì ku dimanya ne ndi mwena Kàtòlikè bishi?”

196 Mèmè ne: “Ee, ànu mùshindù wùm wèwùm wè wùm vwà mumany makwàbò maalu pa cibumbà cyà ku cyambilu awu awu, wamònu’s.” Mèmè ne: “Wèwè udi mwena Kàtòlikè. Nènku tùngunuka wèwè ànu ne kubifùnda, kadi nyàwù nkudimwija

mpindyewu mene; mu matùkù makumi àsàtù kuumukila ku mpindyewu, funda bwalu abu, wèwè newikalè ukàadi moolaale kumpenga kwà njila, mwikàle ne muminu webe awu mukosa kùdì lumwènu lutùùke ku kàshinyì kèèbè wèwè mwine, wela mbila mikolè ulòmba luse, ne newùtumè meeji kùndì misangu yàbùngì.”

Yèyè kwamba ne: “Wèwè kwèna mwena Irlandè anyì?”

“Eyo.”

“Beena famiye webè bàvwà beena Kàtòlikè anyì?”

Mémè ne: “Pàmwàpa kumpàla kwànyì mémè’s.”

197 Yèyè ne: “Mamwèbè mmufwànyìnekù kwela meeji kaayi bwà cyòci aci, bwà mùshindù wùdì wèwè. . .”

198 Mémè ne: “Ntu mumubatiize mu Dìna dyà Yesù Kìlistò. Ne yèyè wàkapeta Nyumà Mwìmpè. Uh-huh. Eyowa.”

199 Kì mémè kwamba ne: “Mpindyewu, wèwè muswè kuya mu mùshindù awu, nàнку mémè nèngàngate dìnà dyèbè ne wèwè pèèbè wàngatè dìnà dyànyì. Pashìishe byòbì kabìyì nàнку dìbà adi to, paanyimà pàà matùkù makumi àsàtù, ùfundè bwalu abu mu cibejibeji cyèbè amu ne mémè ndi mupròfetà wa mashimi. Mpindyewu tìngunuka wèwè ànu ne kufùnda bwalu abu.”

200 Yèyè ne: “Èè, ndi mufwànyìne kuumvwa bìngenza bibì bwà kwela meeji ne, pàngààyà mu Dyulu, musùmbà wa binyònga, bu mùdì bàdì mu disangisha adi abu, ne bòbò mbààkòòkeshì mu Dyulu’s.”

201 Mémè kwamba ne: “Kwàkupeta lutàtù lwàbùngì to,” mémè ne, “kwèdiku meeji awu to. Wèwè udi wamba ne: ‘Ncyèna. . .’ Ee, wèwè, kùyì mushintùlùle meeji èbè ne mùshindù wèbè wà dyenza maalu awu to, kwàkwikalaMù to, nànsha byà bìshi, wamònu’s.” Mémè ne: “Bwalu, bòbò abu nebìikalèMu. Nzambì ngudi musungule aci.”

202 Ncidikà’s, mùdì Nzambì mwàngatè bikùtākane, nwamònu’s, bintu abi. Yèyè, Nzambì, wàkasungula bwà kutwàdila bàà pa buloba lupàndu ku musùmbà wà mùshindù ewu, cidikà, bashilangane ànu menemene ne bamanyi bààbò bàà mabàla balongeshiiabwe mu mùshindù mutùmbùke ne bàà kapelu abu, ne beena tèoloji abu ne bikwàbò. Nzambì ùtu ànu ùcinguluka aci, wàngata kaacinyònga kampànda kàdì kukàbàndisha, ne kutèeka Mukenji Wèndè munda mwàkò, ànu mwàkatèèkàYe munda mwà Yone, bàmwè bàà ku bòbò abu, Peetèlò ne bakwàbò, kubàtùma bwà kuyabo kayiisha Èvànjeeliyò, ne kubweja Èkèleeziyà Wèndè; ne kubàsùngila, ne kubaaluja pa buloba, ne ki cyònsò cidiku pa bwalu abu ncyòci aci, nwamònu’s. Kàdì kulekela ànu bintu byònsò binène byà kapelu ebi byùmuka. Kaa, ekèlekèlè, s’ncyà bushùwà ne ncintu kampànda! Mémè ndi mufwànyine. . .

203 Nzambì, pààkasùngulà Nzambì bapangi ne bàvwà kabàyi balonge kàlaasà, pamutù pàà dimanya dyà mukàndà ne

dilonga dyà tùlaasà, bwà Mukaj'Èndè-musèla! Nudiku mwà kudifwànyikijila muntu wetù ewu, ùsungula mukàjèndè wa kusèla, mufwànyine kwangata . . . muntu wetù ewu mwikàle ne makòòkeshi à matàmbidile ne matùmbùke.

²⁰⁴ Ndi ne kaacintu kakesè mwab'ewu kâmvwà muswè kwamba, kadi ncyàkwikala ne dîbà dyà kukàmba to, pa bìdi bitangilà kaalusùmwinù kakesè kâmvwà mumòne musangu kampànda. Kadi ncyàkupeta mùshindù wà kukàmba to. Mvwa mukàfùnde mwab'ewu, kadi ncyèna ne dîbà dyà kukàmba to.

²⁰⁵ Kàdi, Nzambi mmusungule Mukaj'Èndè-musèla mu musùmbà wa bantu bàà mùshindù awu. Mpindyewu, ewu yònsò udi wamba ne kabyèna nàнку awu, nàнку wèwè kwèna witabuuja Bible webè to. Aci's ncyà busùwà menemene. Ikàla ubala Bible webè, ki cyòci aci menemene.

²⁰⁶ Cìvwa ncidikà cyètù cyà bushùwà eci pààkasungulà Nzambi dikùtakana dyà nyiishilu musonsola pamutù pàà tèloji wa mutùmbùke ne wa kapelu. Muntu udi kàyì mumanyè, kàyì mumanyè menemene to, wàmba yèyè bintu byà wenù ngaakwilu byà “hit, hain't, tote, fetch, carry” abi, myaku yònsò yà mùshindù awu ayi, ne—ne wàmba bintu byà—byà mìshindù yònsò byà wèndè mwakulu, biine abi kabiyi bilongolola bilondeshile mùdi mwakulu to, ne bikwàbò byònsò mùshindù awu. Ki Nzambi kusungula aci pamutù pàà kwangata bamanyi banène bàà mabàlà bàà kapelu abu, bàdi cyà bushùwà mwà kushindumuna myàku ne kuyàmba ànu mùdiyi menemene. Kàdi byàkasànkisha Nzambi bwà kwangata dikùtakana dyà nyiishilu musonsola, nsongàalùme kampànda mukèsè wa kale wa ùdima ne ditempu dyà nkasu kayi mumanyè ABC to, kadi kwangata mwine muntu awu ne kupetela misùùkà ku yèyè. Pàdibi ne, baseeswishanganyi, bònsò bàà kapelu, biikàle ànu bàlombola, bampofò bàlombola bampofò naabò. Cidika ànu cyètù cyà bushùwà eci's!

²⁰⁷ Kaa, Dìyì's ndyùle tètè ne byòbi abi. Myaba yàbúngì mwab'ewu, anyi mifùndu, yidì yikèngelà bwà mèmè ku—kutùpika.

²⁰⁸ Ncyà bushùwà ne èkèleeziyà yà minène yidì yikenka ne yibàlakana ne tèlòji wa kapelu awu ayi, pàdi Bukalenge bwikàle bwèla nsèsà ne didipwekesha, bapèlè ne bàdi badipwekèshe. Èvànjeeliyò kàtu ùkenka to, Yèyè ùtu wela nsèsà. Ngòlò wa mukùtakane ùtu yèyè ùkenka; ngòlò mulelèlè ùtu wela nsèsà. Kùdi dishiilangana pankaci pàà dyela dyà nsèsà ne dikenka. Aci's tudi bamanyè. Pàdi èkèleeziyà munène ùbàlakana ne ùkenka ne bamanyi bàà mabàla batùmbùke ne bàà kapelu apu, ne bibàsà bilenga, ne tunkùrusè tulamika ku cimanu cijima, ne nzubu ne bitanda bitàmbe kubàndila ne bitàmbe bulenga, ne bintu binène byà tuleyi, byònsò mùshindù awu, Bukalenge bukesè abu, mu kajila kakesè kampànda, bu mùdi

apa emu, mwaba kampànda, bùdi munkaci mwà kwela nsèsà ne Butùmbi bwà Nzambi, bùle tètè ne bàdi badipwekèshe mu mwoyi, nwamònu's, Nzambi ùkwàta mudimu munda mwàbo, wondopa babèèdi, ùbìisha bafwè, ne wipata baadémons, ne bikwàbò mùshindù awu; mwikàle ànu ùbàshiya bàpìcila ku luseke.

²⁰⁹ Kùvwa kwenzeke cisangilu cinène cyà bambi. Kanùpu eci mwoyi to. Kùvwa kwenzeke cisangilu kampànda cinène cyà bambi muneemu emu kukaadi cikondo kampànda, mu cimenga kampànda, mùvwà bantu bàà mwaba ewu bàsanganyibwa mu ciine cisangilu aci. Nènku bàvwa ne muntu kampànda uvwa ne cyà. . . Kaa, yèyè's uvwa mwena tèoloji, “ùvwa ne mukenji wa ditùkù, bwà bantu.” Nènku ùvwa muwùlonge munda mwà mbingu yibidi anyi yisàtù. Aci's civwa ànu cimpè. Kàdi mmwenzè ànu ùbànda ku cibùmbà cyà ku cyambilu anyi, kàyiku ne kaamufudi nànsha kàmwè ku byèndè bilàmbà to, ekèlekèle, muvwale bintu bilenga byà kacya, nudi bamanyè's, kubàndayè kuntwaku ne kutàdikayè cyàdi ne kwadijaye bya—bya mudimu byende byònsò mwab'awu bwà mukenji wèndè awu. Kì kuyiishaye cyà bushùwà mukenji wa dîbà dijima wùvwà kawuyi wà bàtùùlakù kalèma to, bwà mamanya a mu mutù. Kaa, mùshindù mwine wàkatàdikayè cyàdi's wè, ne kwangata dîna dyà LL. Docteur *Kampànda*, wa ku cilongelu cinène kampànda, uvwa wa kapelu kàà katùmbùke menemene ne mumanyi wa dibàla, mu mùshindù wa ne yèyè kutwàdila bantu bàà maalu à dilonga dyà nsòmbelu, mudimu mwowela byanza wà dikèma, ne bikwàbò, kwambabò ne: “Bìvwa bilenga byà kacya.”

²¹⁰ Kàdi beena Kilistò bàvwà basòmbe mwab'awu, menemene ànu bu ku Nsangilu wa Nicée, cyòci kàdi kubungamijaci Nyumà èyo. Kaa, s'civwa mmudimu mwowela byanza, cyà bushùwà. Èyowà's, mukalenge. Civwa ne kapelu kwònsò pambidi apu, kàvwà mwà kwikala aku. Kàdi bantu bàvwà bulelèlè bùle tètè ne Nyumà abu, kwambabò ànu ne: “Huh?” Kacivwa cikùmbànangana menemene ne. . . Kakùvwakù Nyumà mwab'awu bwà kucitwa nyama ku mikòlò to.

²¹¹ Pa nànkù pààkatùùlukàye kuntwaku, ùkaavwa ne mutù mwinyika panshi, mumòne ne kacyakapitákana bîmpè to. Yèyè uvwa wa mu cilongelu cikwàbò; kàdi ùvwa ne beena mpenta. Nènku pààkatùùlukàye pa cibùmbà cyà ku cyambilu, ùkaavwa mupòòpòke nsala yònsò. Kubangaye wènda upicila munkaci amu, ne bintu byèndè byònsò abi bipayika mu dyàpà, nùnkù ewu, wènda ùpicila munkaci mwà disangisha amu.

²¹² Kùvwa munsantu kampànda wa kale musòmbe lwà ku dyàbalùme aku, kwobokelayè kùvwà muntu mukwàbò, e kwambaye ne: “Bu wikalakù nanshà mubànde mùshindù wùdiye mutùùlùke ewu, nùnkù's mmutùùlùke mùshindù wùvwàye mubànde awu.” S'ki mùdici nànkù. Yèyè wikalakù nànsha mubànde mudipwekèshe, pàmwàpa nùnkù mmutùùlùke mùle

tèntè ne Butùmbì. Yèyè wikalakù nànsha mubànde mùshindù wùvwàye mutùùlùke ewu, nùnkù's mmutùùlùke mùshindù wùvwàye mubànde awu. Ncyà bushùwà. Cidikà!

²¹³ Tèèlejèàyi, bwà kujikija mpindyewu, ànu bwà katanci cyanààna, kumpàla kwà mulongo wà babèèdi. Mvwa muswè kwambaku dikwàbò dīyì, matwè ku àbìdì, pa bìdì bitàngilà cidika.

²¹⁴ Bikeena-kumòna byà baprofeta bàà kale bitu ànu cidikà. Bitu kabiyi byà bànàyila to. Nganyì udi mwà kwambakù ne, muntu wa kukaadi bidimu binunu binaayi, ùvwa mwà kwamba bwà matempu à ènda kàyì ne tubalu ènda afwilakanangana mu njila myalàbale, edi ne edi. Baprofeta bàà Dipungila Dikulukulu, mùshindù wùvwàbo mwà kudyànjila kumòna maalu ne kudyànjila kuàmba, batùntumuna kùdì Bukolè bwà Nzambì, bàvwa bààmwèna kule mu bidimu bìcìvwà bìlwa, ne kudyànjila kuàmba ànu jaajaaja ne bupwàngàne bwònsò. Cyùmvwijaayaaku tǔng! S'ncidika. Kaa!

²¹⁵ Cìkwàbò, ndi muswè kunùpèèsha kàà kakese, kàà kakàyi ne mushinga to. Kàdi dikudimuna dyànyì dyà mucima s'dìvwà ncidikà. Ndi ngamba bwalu ebu ne dinanga ne kaneemu. Baledi bàànyì bàkaadi bamane kufwà. Bàà ku baa mààmù bàvwa bònsò ànu bangènzàmpèkààtù, beedi bàà mateyi, baabilembi, ne bantu bàà ku mikùnà. Bàà ku baa tààtù bàvwa bònsò ànu bakwaciki bàà maala, basùmbishi bàà mu musokoko bàà maala à kapyà, banayi bàà twarta twà mfranga, baashanganyì bàà ku bingoma, bàshipangana muntu ne mukwèndè, pàmwè ne bwònsò mbafwè ne bisàbaatà ku makàsà. Kakùvwakù kantendeleelu nànsha kakese, kaa mùshindù kampànda, kutùdì to. Kàdi mmunyi mùvwà Nzambì. . . cìvwa ncinyì Aci cyàkabwelà mu kazùbu kakesè kàà micì kàka kuntu kwàka mu dindà amu, cinùdì numòna bakwàte fòtò ku cimanu kwàka cyacya? Cinyì? S'ncishiilàngane ànu menemene.

²¹⁶ Wèwè mwele lutete lwà blé mu buloba, nelùkwamè lutete lwà blé. Wèwè mwele ditala mu buloba, nedikwamè ditala. Wèwè mwele mpoopù mu buloba, neàkwame mpoopù.

²¹⁷ Kàdi eci ncidika! Muntu ne muntu wa kunùdì udi mwà kwamba cintu cimwècimwè aci bwèndè yèyè mwine. Twètu bwònsò tudi mwà kuvuluka cidikà cìtù cyenzèke.

²¹⁸ Cidika cìkwàbò ncyòci eci. Mmunyi mùndì mèmè ewu, paanyimà pàà mèmè mumane kuyiisha bidimu bitwè ku makumi àsàtù, mufwànyine ànu kwikala ne bwòwà bwà kuya Dyàmwamwa abu? Mbifwànyine kwenzeka munyi? Paanyimà pàà mèmè muyiishe kacya pàncìvwà mwànà mutekète apu, ne leelù ùnkaadi muntu wa bidimu makumi àtaanu ne bìbìdì ewu, kàdi pashiishe kucinka bwà diikala ne bwòwà. . . Mèmè—mèmè ncìvwa. . . Mvwa mumanyè ne mvwa musùngidìibwe. Kàdi, mvwa ànu ne bwòwà pa kwela meeji. . . Kàdi dinanga dyà

Nzambì, dindà kampànda, dyàkapweka mu cibambalu cyànyì, kuntuntumunadi, ne kumbwejadi mu Mwaba wùvwà bapikula basanganyiibwa. S'ncidikà bushùwà!

²¹⁹ Ndi muswè nnùkonkèku cintu kampànda. Ndi mufwànyine kukosela bwalu ebu kaaba aka mpindyewu. Ndi muswè nnùkonkèku cintu kampànda. [Katupa kàà mukàbà wà méyì munda mutupu—Muf.] Ncinyì cidì mu fòtò wàwa Cyàcya? N'Cifùmìne penyì? Cidì apa bwà cinyì? Maalu à mamanya kaènakù mwà kuCivila to. Ncinyì ciine Cidì mu disangisha, ciimane mwaba wàwa ciikàle cikenketa munda mwà bantu mwònsò, ne cibàmbila ne: “Kale wàwa, ciwàkenza. Wèwè ewu udi kaaba aka mmu kiipacila *kampànda*. Udi kaaba aka mbwà *cikansanga*”? S'ncyà kabàyikù mwà kwitabuuja kùdì meeji à beena maalu à mamanya to.

²²⁰ Mpindyewu, tutu bamanye lubùku. Lubùku lùtu, kwamba cintu kampànda, byenze bu wèwè wamba cintu kampànda ne mèmè paanyì mwà kwamba cintu cimwècimwè aci, nwamònu's, anyì, ndi mbala mu meeji èbè, pààci cyènzeka pa dībà adi mene. Kàdi panùdì nuCimòna cyàmba maalu ikalà mwà kulwa kwenzeka kule kumpàla mu matùkù àcilwalwà, aci's ncipite lubùku ne kule.

²²¹ Ncyà kabàyì mwà kwitabuujaku to bwà Nzambì, mu matùkù à ndekeelu aa, mwàkalayàYe ne Yèyè neénzè, mufwànyine kwenza cintu bu nàнку awu. Kadi's ncilelèlè, s'ncidikà! Nzambì umwèumwè ukààdi mwenzènzè bidikà ne mubileejeleeje awu, Yèyè's n'Nzambì umwèumwè awu leelù ewu, bwalu Yèyè ùdi ùshààla mulamàte ku Diyì Dyèndè. Maalu a mamanya kaènakù mwà kuCivila to, s'ki Cyòci cyàcya mu cyamu cyà fòtò cidì cyenza ne byamu. S'ncidikà's, Nzambì!

²²² Ncinyì Aci? Mu—mu Ekèsòdè, nshapità wa 13, tudi tubala ne Nzambì wàkapèèsha bânà bàà Izàlèlèlè, bàvwà cimfwànyì cyà Èkéleeziyà leelù ewu abu; mùvwàbo mu lwendu lwà mu mubidi ewu amu, twètù tudi mu lwendu lwà mu Nyumà. Mu dyàlumingu dilwalwà edi netwàngate cyòci aci, mpindyewu. Vulùkàayi ne, byònsò mpa cyòci aci, nwamònu's. Mpindyewu, mùshindù wùdibi ne—ne mwaba wùdibo, wùvwàbo bènda bènda pa buloba, mu mubidi ewu, mùshindù *ewu*, ne Nzambì uvwa naabò; Èkéleeziyà mmusòmbe ne Kilstò, mu Myaba yà mu Dyulu, yà bipaapu byà nyumà, twenda tuya biikàle ne makòokeshi ónsò mwìnshì mwà makàsà ètù. Aleluuyah! Eyowa's, mukalenge. Ne bóbò bàvwà ne Dikunji dyà Kapyà, Bukènkè bùvwàbo bènda bàlonda. Kwònsò kùvwà Bukènkè ebu buya aku, bóbò bàvwà bènda balonda Bukènkè abu. Binunu byà bidimu byápici, nkàmà ne nkàmà yà bidimu bikaadi biye, kàdi Dyòdì dicidì ànu ne mwoyi. Cidikà's! Dyòdì dimwedimwe adi makèèlèlè. . . Diikàle dyuja Mifundu, Dìdì mwab'ewu bu bujaadiki; kabiyyì bwètù twètù to, kàdi mbwalu Nzambì wàkaCilaya ne, Yesù Kilstò ùdi umweumwe awu makèèlèlè, leelù, too ne kashidì. Divwa

n'Dyôdi adi divwà Mòsà ùbala, mabanji à Kilistò, anyi bundù bwà Kilistò bu mabanji manène kutàmba bibùcilu byà Ejiipitu. Kàdi Kilistò ùvwa wènda kumpàla kwèndè awu uvwa ncinyi? Bukènkè, Dikunji dyà Kapyà.

²²³ Yèyè wàkamba ne: “Ndi mufùme ku Nzambi ne Ndi ngàalukila ku Nzambi.” Yèyè wàkaalukila. “Katancì kakeseè aka bàà pa buloba kabààkuMmòna kàbìdi to, kàdi nwènù nenùMmòne; bwalu Nèngiikalè neenù, munda mwènù mene, too ne ku nshìikidilu kwà buloba.” Too ne ku nshìikidilu kwà buloba menemene, Yèyè, neikalè kàbìdi kaaba aka. S'ki twètù bàkaadiku aba!

²²⁴ Paanyimà pàà lufù, dijiikiibwa, ne dibiika Dyèndè dyà ku lufù, Pòlò Munsantu wàkatuutakeena Nèndè mu njila wa ku Damàsèkè, Yèyè ùkaavwa mwalùkile ku Dikunji dyà Kapyà adi.

²²⁵ Bidimu bitwè ku binunu bibìdi bikaadi bipite kubangila piine apu, kàdi's n'Yèyè ewu! Kàyì munkaci mwà màngumba to, kàyì munkaci mwà bamanyi bàà mabàlà bàà kapelu bàà ditùkù edi to, kàdi munkaci mwà musumbà wà bantu balanda ne badipwekèshe. Cidìka! Cidìka! Bwà bàdi baMunangè, baMwitàbùùje, bàdi baMwitàbùùje binunu ne binunu pa buloba bujimà abu, mbwà kuuja mulayi Wèndè ne wa Dipungila Dipyadipyà ne wa Dikulukulu. Ncyòci aci. Kàdi ncidìka's.

²²⁶ Cìvwa ncidìka pààkalayà Nzambi bwà kupèèsha kasumbù kakesè kàà mìkòòkò Bukalenge, pamutù pàà èkèleeziyà munène mulongolola. “Kanùciinyi to, nwènù kasumbù kakesè kàà mìkòòkò, ndiswa dyà Taatù wenù bwà kunùpèèsha nwènù Bukalenge.” Neciikalè—Ncidìka. Ncidìka.

²²⁷ Neciikalè cidìka cyà menemene, òmwè dyà ku matùkù àdi panshi aa, pààlwà Yesù; ne bafwè mu Kilistò nebàbiikè. Cyà cifwàkà eci necìvwalè dibenga-kufwà, ne dyambwibwa dyà Èkèleeziyà nedilwe.

²²⁸ Mu bikondo byà Noël ebi, pàtù bantu bàsumba bintu mu makàjiinyi, ne baja maja, ne banwa maala, ne batwa cyanga cyà cintu kampànda cidìbo bòbò kabàyi bamanyè apu, byenze bu mùvwàbo bàtwa cyanga ditùkù dyà mufikilu wà dilediibwa dyà Washington anyi dyà Lincoln amu, kàdi kabàyi bakuukwila ewu. . . Bàcidi bòbò ànu ne Nzambi mu cidìilu cyà nyama.

²²⁹ Pààbi, Nzambi kèna mu cidìilù cyà nyama to. Yèyè ukaadi mubùike ku bafwè, ne mwikàle ne mwoyi bwà kashidi ne kashidi, mwikàle ne mwoyi munkaci mwètù, ùdijaadika Yèyè mwine, bu Nzambi umweumwe uvwa baataatù bàà Nicée bambùle awu, ne utu mulwè munda mwà bikondo kuumukila ku Ditùkù dyà Mpenta awu. Nzambi umwèumwè wàkatuutakeena ne Pòlò mu njila wa ku Damàsèkè awu; yèyè uvwa mpandanjila bwà bàà Bisàmbà byaà bendè, ne musanjeela mutuma kùdi Nzambi, mutumina bàà Bisàmbà byà bendè. Mukenji wà bàà Bisàmbà

byà bendè wàkabanga ne dimwènekelangana dyà Dikunji dyà Kapyà, ne wùdi wùjika mu mùshindù wumwèwumwè awu.

²³⁰ Bukalenge bwà bàà Bisàmbà byà bendè bwàkabanga, bukalenge bwà pa buloba, aci mbuloba, bwàkabanga ne ditàndisha dyà mu mwakulu wa mu Dyulu, mu matùkù a Mfùmù Nebùkàndènèèsà; bùdi bùjika ne cintu cìmwècìmwè aci, pàdi Nyumà Mwímpè wìcikijibwa pa èkèleeziyà wa bàà Bisàmbà byà bendè, wa ku matùkù à ndekeelu, bwà kutàndisha cyàkàbidì matuùnga a Bisaàmbà byà bendè ne mufùndu ku cimanu. Mufùndu ku cimanu awu, bwa ne, Nzambi wàlongòlòlù Èkèleeziyà Wendè, Yèyè wàlongòlòlù cisàmbà Cyèndè, Wàlongòlòlù mwaba Wendè, ne bôbô mbindile bwà kulwaYe.

²³¹ Nènku Dyambwibwa adi! “Pààdilà mpungi wa Nzambi awu, ne pààbiikà bafwè mu Kilistò, twètù bàdi ne mwoyi ne biikalà bashààle katwàkupangisha bàdi balààle to. Bwalu mpungi wa Nzambi neàdile, ne bafwè mu Kilistò nebàbiikè; nènku netwàngaciibwe muulu pàmwè naabò, bwà kutuutakeena ne Mukalenge mu mpeepèlè.” Cidika, dimwè dyà ku maadindà aa, pààbuululukà nkita ne pààpàtukà bafwè bènda bènda; pààshintulukà aba bàdi ne mwoyi, mu katanci, kàà mubùnyi wà dísù, nènku nebàbandè mu mpeepèlè bwà katuutakeena Nendè.

²³² Cintu cyònsò mu kaabujimà neidikà, Nzambi ùkwàta mudimu munkaci mwà bantu Bendè. Nudi nwitabuuja aci anyi? Twinyikààyaaku mitù yètù bwà mwaku wà disambila.

²³³ Nzambi, mpindyewu bwà mukùngùlù mupite pa dîbà dijimà, bu dîbà dijimà ne tusunsa dikumi nànkù awu, tuvwa biimane mwab'ewu twakula pa bìdi bìtàngilà maalu àvwà mapitákane kale ne àdi àpitakanà mpindyewu, mùshindù wùdi Nyumà Mwímpè muàbànye, Mukalenge, mùtù Dîyi dyà Nzambi dibyènzè ne ngàsà yònsò; biikàle bileeja ne Nzambi mene wa mu Dyulu, Yèyè uvwa ne mwoyi mu matùkù à kale, mu mmwèenekelu wumwèwumwè ne mu mùshindù wumwewumwe awu, ùdi ne mwoyi leelù ewu. Maalu àà kukèma àmwèàmwè awu, Bukolè bùmwbùmwbè bývwa pambidi pàà baprófetà bàà kale abu, bìvwà pambidi pàà Èkèleeziyà mu dyà Mpenta abi, bìvwà pambidi pàà, Anà; ne pàà Agàbò abi, baprófetà bàà Dipungila Dipyadìpyà mu diine ditùkù adi, bôbô bààkalongololà too ne Munsantu Pòlò. Ne Munsantu Pòlò kupetayè lutàtu bu mùvwàye mubènge kutèeleja Agàbò, bwalu Agàbò. . . Nànsha mùvwàye mùpostòlò amu, Pòlò awu, kadi Agàbò uvwa ne Dîyi dyà Mukalenge, nènku kumudimwijayè bwà kàbàndi kuntwaku to. Kadi Pòlò yèyè ùkaavwa mukàngè ànu mwoyi bwà kuyaye, ki dîbà adi kupetayè lutàtu. Nènku, Taatù, misangu yònsò tutu ànu tupeta lutàtu twètù babènge kutùmikila Dîyi dyà Nzambi.

²³⁴ Tudi tumòna ne Nzambi mwine uvwa ne bânà bèètù abu kwaka awu, ùdi Nzambi umwèumwè awu leelù ewu. Tudi

tuMumòna mu dimwènèshiibwa dyònsò. Nènku cìdi ncidikà, Mukalenge. Bàà pa buloba bàdi bàtàngila, ne bàdi bàkùpa mitù, bàmba ne: “KaCyèna ne bwà nsongo to.” Mwena kwitabuuja udi ùCìitaba ne ùCyùpukila, ne ùmanya ne Cìdi Nzambì udi ne mwoyi.

²³⁵ Éyi Taatù, nyèwù tulòmba mu dindà emu ne, kwòkò kufwànyine kwikala muntu kampànda munkaci mwètù emu udi kàyì mwanji kwikala mwena kwitabuuja to, edi diikalèku díbà diitabuuja. Éyi Nzambì, enzaku nànu ànu mpindyewu mene mu mwoyi wà muntu ne muntu udi kaaba aka, udi kayi mumanyè Kilistò bu Musungidi wèndè awu ne, edi diikalèku díbà dyènzekàku cidikà kumpàla kwèndè; bwà ngènzàmpèkààtù mubiipe mukwàte ne byà luse (ngènzàmpèkààtù ànu ku cifùkidi kwine, mulela pa buloba apa mu mpèkaatù, mufwimba mu bubì, mulwe pa buloba wàmba mashimi, ku bukooyà) wàpetakù mwà kushintuludiiibwa ne kuvwijiiibwa mu bwakàne bwà Mwànà wa Nzambì. Enzàku, Mukalenge, bwà, bwà—bwà cidikà cinène aci cyènzekèku mu mwoyi ya bwònsò bàdi kaaba aka mu dindà emu bàdi kabàyi baKumanyè bu Musungidi waabò ne bu Mfùmù waabò ulwàlwa, biikàle badìlongolole bwà kutuutakeena Neebè ku mpungi wa ndekeelu awu bu yèyè mwà kudila leelù ewu.

²³⁶ Pashiishe tudi baswè kulòmba kàbìdi, Mukalenge, bwà Wèwè kuvùlukakù bàdi babèedi ne bàdi mu ntàtu kaaba aka. Éyi Nzambì, leelù ewu nyewu tulòmba bwà Wèwè kwondopakù mubèedi yònsò ne mwena lutàtu yònsò. Bàmanyèku ne Nzambì ùcìtu ànu wenzela muntu kanà yònsò bidikà wàswa bwà kwenza ne Dìyi Dyèndè dyènzekè awu.

²³⁷ Tudi bamanyè ne Dìyi Dyèndè ncidikà. PàdiDi dilaya cintu kampànda ciikàle menemene kaciyi cyà bushùwà to, bwà bàà pa buloba, cintu kampànda cyà kabàyiku mwà kwitaba to, cyà—cyà cìpìcila ne dyàbò dimanya ne—ne dyàbò dyumvwa. Kàdi pàdi mwoyi mupwekèle wangata Dìyi adi ne ùDìpwekesha mu ndondo ya buumuntu bwèndè, díbà adi Dìyi adi didi dipàtula byenzedi bidì ne mwoyi byà wòwò mulayi awu.

²³⁸ Kaa, mùshindù mwine wutùdi tuKwela twasàkidila bwà ciine eci, bwà ne kùdi bantu bapwekèle bàdi biitabuuja Mukenji ewu. Twètù katwèna bindile bukalenge mwìkalà bikondo byà bombes ya mùshindà ayi mwà kukòokèsha nànsha, kadi tudi bindile Bukalenge mwìkalà Kilistò mwà kukòokèsha ku bukolè ne ngiikadilu wa ùkèmesha, ditalala ne butùmbi pa buloba; kamuyi mwà ne netushindikile makàsà ètù pa makàsà a dyendesha naawu màshinyi, makàsà a gaz, anyi kubuuka mu mpeepèlè ne ndèkè ya jet to; kadi mutwìkalà basòmbe banyungulukile Nkwasa wa butùmbi wa Nzambì udi ne mwoyi, kaa, ne biikàle tuMubandila, ne tumòna Ewu Uvwa mutàpiibwe mpùtà bwà kushipa kwètù kwà mikenji ne muzaaza bwà bubì bwètù awu, dinyooka bwà ditalala dyètù dimatè pambidi Pèndè, ne Mwena ku mibundabunda kutwàkwondopiibwà. Dijinga dyà

myoyi yètù, Mukalenge, kacya ànu cidikà cinène aci cyàlwa kutùdi, ndyà ne twâfikakù too ne pàdìYe ne twasòmbakù Nèndè mu ditùkù adi. Enzaku nàнку, Mukalenge. Tudi tulòmba nùнку mu Dìnà dyà Yesù.

²³⁹ Nèнку patùcidì ne mitù yètù miinyika apa. Ndi ndikonka, mu batèèleji emu mu dindà emu, ní kùdikù muntu muswè bwà bàmuvùlùkè mu disambila, àmbèku ne: “Mukalenge Nzambi, nyewu mbàndisha cyanza cyanyi Kùdi”? “Nèнку, Mwaneèètù Branham, watàngilakù ne wamònakù cyanza cyànyì, ne wànsambidilakù, bwà cidikà cinène cyàmònakù mwà kwenzeka munda mwà mwoyi wànyì, bwà ngātuutakeenakù ne Kilistò mu dibatiiza dyà Nyumà ne mu bukòlè Bwèndè bwà dibiiika dyà ku bafwè.” Nzambi ànùbènèshè, yònsò wa kunùdi, muntu ne muntu. Abi’s mbilenga. “Bwà ngātuutakeenakù ne Nzambi.” Nèнку Nzambi ìkalè neenù. “Nèнтуutakeenè Nèndè, ne cidikà cinène necyènzekè mu nsòmbelu wanyì, nèнку nèngùùjiibwè tètè ne bukòlè Bwèndè ne butùmbì Bwèndè, ne bwìmpè ne luse byà Ewu udi ne mwoyi kashidi ne kashidi. Ne dìngà ditùkù nèngùikalè mu ciine cidikà cilwalwà aci. Cintu kampànda cyà ne piikalà. . .”

²⁴⁰ Lupwishi lwà bapròfetà abu lùdi lùsanganyibwa mwàmwa mu buloba. Pàvwà lupwishi lwà bàakafwilà diitabuuja bàakadyàbo kùdi nyama yà ntambwe, ne tùmvi twine twà nyama yà ntambwe atu bàvwa bàtùtangalaja mu lupwishi, ne pa buloba pònsò apu, kàdi nànsha nàнку Kilistò neàjuule mubidi awu cyàkàbìdì. Bidi bileeja ne Yèyè udi dibiiika dyà ku lufù.

²⁴¹ PààkangatàYe tuubitoci tukesè ku byanza Byèndè ne kutùlaaba pa mèsù a muntu uvwa kacya kàyikù ne mèsù ètù aa to, s’byàkaleeja ne muntu ùtu mwenjiibwe ne lupwishi lwà buloba, ne yèyè wàkaalukila mwikàle ne tumonyi twà mèsù ne mwikàle mwà kumòna Mufùki uvwa mumwenze awu.

²⁴² Nzambi Yèyè kayi ne meeji a kubiisha bafwè to, kàdi bwà cinyi Wàkalwa mubidi mufwànàngane neetù, kadi kwalukila mu lupwishi, ne kudijuula Yèyè mwine cyàkàbìdì? Bwà cinyi Yèyè wàkaDijuula cyàkàbìdì piikalàku kakùyi dibiiika dyà ku bafwè? Kaa, katwikadikù bânà batekète to, kàdi twikalàayi balùme ne bakàji bakùlumpè mu Nyumà, twitabuujaayi Nzambi ne mwoyi wètù wònsò.

²⁴³ Nkufwànyìnekù kwikala mukwàbò mpindyewu anyì, kumpàla kwa twètù kubanga kusambila? Nzambi àkubènèshè, ne wèwè, mwanèètù wa balùme, ne wèwè. Eyowa.

²⁴⁴ Taatù wetù wa mu Dyulu, mpindyewu nyèwù tuKutwàdila bàdi beele byanza muulu aba. Mu mùshindù kampànda anyì kansanga, Nyumà Mwìmpè mmuDisèbèèle njila too ne mu myoyi yàbò, ubàmbilamù ne: “Kanwèna pànwapa ànu bwà kudya ne kunwà, ne—ne kulààla, ne kujuuka kwenza mudimu; ne

pashiishe kwalukila, kudyà ne kunwà ne kulààla kàbìdì to. Nudi pànwàpa mbwà kwikala bàna bàà balume ne bàà bakàjì bàà Nzambì. Nudi pànwàpa mbwà kwangata kaaba kèènú mu Kilistò. Ne mémè ndi mwab'ewu mu dindà emu mbwà kunùbìikila," mùdì Nyumà Mwimpè mufwànyine kwambila mwoyi wàbò.

²⁴⁵ Taatù, ku disambila, cingoma cimwèpelè cìndìku pàànyì mumanyè aci, nyewu mbàfila Kùdì. Ne ndi—ndi ngeela mwena lukuna udi mufwànyine kubàpangisha bwà kulwa Kùdì awu kadyòmbò. Ndi ntèeka, ku diitabuuja, Mashi à Yesù Kilistò pankacì pààbò ne mwena lukuna, yèyè awu udi mufwànyine kubàpangisha dilabula edi dyà butùmbì dyà cidìka cinène eci, cyà dipeta dyà Nyumà Mwimpè ne dipeta dyà Mwoyi wà Cyendèlèlè. Bwalu tudi tufika ku dyumwà ne cyòci aci ki cintu cimwèpelè—cimwèpelè cidìku, dyandamuna òmwèpelè ditùdì bapèèshìibwe, bwà Mwoyi wa Cyendèlèlè, nkupeta Mwoyi wà Nzambì munda mwètù, díbà adi m'Mwoyi wa Cyendèlèlè munda mwètù. Enzaku nànkù, Mukalenge, bwà cyàmónakù mwà kwenzekela muntu ne muntu udi mwele cyanza muulu awu. Ne pàmwàpa aba bàdì kabàyi bapete bukitù bwà kwela byanza byàbò muulu abu, ubènzèlèci pààbò. Mpindyewu, Taatù, mbèèbè Wèwè. Ndi mbàfila Kùdì, mu Dìna dyà Yesù Kilistò.

²⁴⁶ Nenku mpindyewu bu mùdìbì bikèngela bwà mulongo wa babèèdi kwenjìibwawù, Taatù, ncyèna mumanyè ne nganyì wabànda kuneeku to. Kàdì tùpèèshèku cikwàbò cidikà mu dindà emu, Mukalenge. Swàku bwà Bukole kampànda bwà Nzambì bùdì kabùyì buumvwika bùtuulukè ne bwènzèku cintu kampànda mùshindù wùtù Wèwè mulaye awu. Nenku eci necìikalè musangu wànyì wa kumpàla, Mukalenge, wa kacya ànu ngàtuutakeena Neebe ditùkù adi. Ndi ndòmba mpindyewu bwà Wèwè kufila malòmba a bantu aba, mu Dìna dyà Yesù. Amen.

²⁴⁷ Mpindyewu, ndi njinga ne muntu ne muntu ìkalèku ànu musòmbèle pànshì, panwìkalà ne mùshindù, bwà katanci kakesè cyanààna.

²⁴⁸ Mpindyewu, ewu yònsò udi ne karta kàà disambila. Billy uvwa mulwè mu dindà emu, bu mùvwàye mulaye ne neàlwe, ne mmwabànyine ndambù wa bantu twarta twà disambila mwaba ewu. Úvwa wàmba ne kabàvwakù bààbùngì menemene to. Nudikù mwà kwela byanza muulu anyi? nwènù bàdì ne twarta twà disambila abu. Eyo. Ndi ndikonka ní nudiku bafwànyine kukwàta myaba yènù ne kwimana ànu balonde eku, nwènù bàdì ne twarta twà disambila abu. Mpenyi, Billy, mpenyi pàùdì? Kaa, eyo. Imànaayi ànu balonde eku.

²⁴⁹ Mpindyewu, bantu bònsò mu disambila mpindyewu. Tudi tulwa kumpàla kwà Mukalenge Nzambì wetù. Mpindyewu twìmbàayi musambu awu pàmwè ne mujiki, bu nwènù mwà

kuswà, pàdi Mwanèètù wa bakàji Arnold wimba cisanji kwàka apu. Bónsò cyápámwè mpindyewu, ànu bituùlùbituùlù.

Itabuuja nàka, itabuuja nàka,
Byònsò bìdi mwà kwenzeka, itabuuja nàka;
Itabuuja nàka, itabuuja nàka,
Byònsò bìdi mwà kwenzeka, itabuuja nàka.

[Mwanèètù Branham wàbangi kwimbila mu matàma Itàbùùjà Nàka—Muf.]

Byònsò bìdi mwà kwenzeka, itabuuja nàka;
Itabuuja nàka, itabuuja nàka,
Byònsò bìdi mwà kwenzeka, itàbùùjà nàka.

250 [Mwanèètù Branham ùdi ùbala Maakò 11.21-24—Muf.]

...Peetelo umuvulwija e kumwambilaye ne: Mulongeshi, tangila, mucu wa mfigi wúvwà mwele mulawu awu ngwawu mufubidile.

...Yesù wàkandamuna e kumwambilaye ne: Ikalaayi ne diitabuuja mu Nzambi.

Bwalu bulelèlà ndi nwwambila ne: Ewu yònsò wàmbila mukunà ewu ne: Tentèmùkà, ne edùbwà mu mbù; ne kayi wèla mpatà munda mwa mwoyi wèndè to, kàdi wítabuuja ne bintu byàmbiye abi nebyènzekè; yèyè neàpetè cyònsò cidìye mwambe aci.

Ki bwà cinyi ndi nwwambila, ne: Bintu binùdi nujinga nànsha biikàle binganyi, panùdi nusambila, itabuujaayi ne nudi nubipeta, nenku nwènù nenùbipete.

251 Yesù wàkamba, musangu kampànda, pàvwàbo kabàyi mwà kuumvwa ne Yèyè ùvwa Yèyè uvwaYè awu to, kwambàYè ne: “Nwènù kanùyi mwà kungiitabuuja Mémè to, itabuujaayi byenzedi bìNdi ngèza. Ne Mémè ncìyi ngenza byenzedi byà Taatù Wanyi to, dībà adi kanùNgiitabuuji to. Kàdi Mémè ngenza byenzedi byà Taatù Wanyi, dībà adi itàbùùjaayi byenzedi.”

252 Nyèwù mfùma ku dijikija, mu dindà emu, ditwàla dyà Dyiisha dyà—dyà Cidìka. Cidìka ncintu kampànda cidi, cidi “cicimbè, kàdi ncyà—ncyà kaciyi cyà biitabuujaaku to,” mùdi Webster wàmba, “kàdi pàaci cilelèlà.” Cintu kampànda cyà kabàyi mwà kwitabuujaaku to, ciikalè ne, kwèna mwà kucyùmvwaku to, cidi cyòci ànu bwalu busokoka.

253 Yesù ùvwa wènza byenzedi byà Tatw’Èndè bwalu Taatù ùvwa munda Mwèndè. Ki bwà cinyi byenzedi bìvwa byènzeka, bwalu Taatù ùvwa munda mwà Mwànà. Nudi nwitabuuja nàнку anyi? Bwà ne, munda Mwèndè amu, Yèyè uvwa Nzambi mwandàmùke mubidi. Nudi nwitabuuja nàнку anyi? Bwà ne, Nzambi Taatù, udi Taatù wa Yesù Kilistò awu, Nyumà Munène awu ùvwa musòmbèle (mu kaabujimà kàà Bukolè Bwèndè) munda mwà Yesù Kilistò, uvwa Ntenta wa Nzambi, muvwijiibwe mubidi ne musòmbèle pa buloba, ùleeja Dìyi. Yesù uvwa Dìyi. Ki cidi Bible

mwambe, Yone Munsantu, nshapitá 1. Ne Dìyì òwá kadiyi òm̀wèneká to. Mpindyewu tèèlejàayi ne ntèmà. Dìyì òwá kadiyi òm̀wèneká to too ne paakavwijiibwaDi mubidi apu, ki òbà adi Dìyì kwikaladi dya òm̀wèneká.

²⁵⁴ Nènkú ku lufù Lwèndè lwà òdìlambulá ku Kàlvàriyò, ne ku òbìshìibwa Dyèndè dya ku lufù, kutèèkaye Èkèleeziyà Wèndè pa kaaba mu cipaapu aci, bwà Nzambì umwèumwè udi kayi umwèneká awu kubwelàYe mu muntu-nkàaya awu ne kuvwija Dìyì òlwa òm̀wèneké. Kaa, ekèlekèlè! Ntu—ntu ngàjingakù bwà èkèleeziyà wanyì umvwá cyòci aci. Bu nwènkù mu kumòna, balunda bàanyi, Nzambì udi kayi umwèneká awu muvwijiibwè wa umwèneká!

Mpindyewu tèèlejàayi. Tucìlongàayi cyàkàbìdi mpindyewu.

²⁵⁵ Ntu ànu misangu yàbùngì mujingèjìngè kubwelaku mu èkèleeziyà kampànda, ntu mujingèjìngè kucimòna bikolè be, ngeela meeji, mùndì mwà kubwelela ku ciibi cyà kumfundu, ku ciibi cyà kumpàla, kwònsò kwine kùdìbi mwà kwikala aku, kutùma mèsù àanyi pa batèèleji ne kumòna èkèleeziyà mupwàngàne, yònsò mwikàle mu bulongame. Mpèkaatù kí mmufwànyìneku kushàalamù to; to, Nyumà udi umwela patòòke, nudi numòna's. Kí mmufwànyìneku kushàala to. Bu Ananiya ne Saafila, kwènakú wèwè—wèwè mwà kucyèna to. Kamwàkwikalakù mpèkaatù nànsha umwe mu aku—aku kasumbu to. To, mukalenge. Nwamònu's, Nyumà udi umwela patòòke ne lùkàsà lwònsò mùshindù awu. Nànsha mwikàle wa bishi, nànsha mwikàle mukèsè wa bishi, ùwá wediibwa ànu patòòke. Kumòna bakàji ne balùme basòmbe mwab'awu mwinshì mwà Bukolè bwà Nyumà Mwìmpè, Nyumà wa Nzambì ùkwàta mudimu mu bupwàngàne bwònsò, ùsàka cyòci eci. Muntu kampànda ùwá mwenze bwalu kampànda bùbi mu òsangisha amu, kàyikù mufwànyìne, kàyikù mufwànyìne kwikala. . . Kàvwakù mufwànyìne, ciwá cifwànyìne. . . Bàwá bàlwa lùkàsà, kucitonda kumpàla kwàbò. Nyumà kucyàngata, bwà kucitondabò, bwònsò bàbìdi. Bàwá bàlwa, bàcyàmba, bwalu mbamanye òbà adi mene ne necyèdiibwè patòòke. Aci's ncyà bushùwà. Kì Èkèleeziyà wa Nzambì udi ne mwoyi nyàwù's. Mùshindù mwine wùdi mwoyi wanyì mukùlakàji, wà mukùlakàji mukwàte ne byà luse ewu, patùdi twakulàngana apa wùkaadi wènda wùkùlakàja, mùshindù mwine wùnkàadìku mèmè ewu mujìngèjìngè kwimana ne kumòna èkèleeziyà mu mùshindù awu's we. Nànsha nànkú, ncìdi ànu ne mùshindù's. Ndi ntèkemena nànkú. Byenzi bipwàngàne byà Nzambì, kakùyì mpèkaatù, mpindyewu, mmbafwànyìne kuumvwá.

²⁵⁶ Mpindyewu kí kasumbu kàà bantu nkòkò aka biimane bwà kubàsambidìla. Mpindyewu, tudì tufika ku dyumvwá ne, pìikalàbi ne Mufundu ewu mmulelèlè. . . Ne Nzambì wa mu Dyulu, Yèyè uvwá mwà kufùka nshindì awu, uvwá mwà kufùka cimpàngà cyà mùkòkò awu, uvwá mwa kwimanyika òbà dya

muulu munda mwa ditùkù dijimà, mèbà makumi àbìdì ne ànaayi awu, uvwa mwà kupangisha mudilu bwà kwoshawù bantu mu cikùtù cyà kapyà munda mwà mèbà àsàtù majimà awu, Yèyè uvwa mwà kukànga mukana mwà nyama yà ntambwe, uvwa mwà kubiisha bafwè awu, uvwa mwà kwendela pa màyi awu, uvwa mwà kwangata bisùkwita kudiisha bantu binunu bitaanu awu, awu's n'Nzambi. Aci's n'Diyi divwijiibwe mubidi munda mwà bantu. Mpindiyewu bantu bònsò bàdi bùmvwà aci anyi? Mpindiyewu Nzambi umwèumwè ewu wàkalaya ne mu matùkù à ndekeelu bintu ebi nebyènzekè cyàkàbìdì, kàdi Yèyè kèna mwà kucyènza pàdìku kakùyì muntu kampànda udiYe mwà kwenda nende, ne kwenzela pa yèyè to. Nudi bùmvwè cìndì muswè kwamba aci anyi? Mpindiyewu twitabuuyaaci aci, ne dishindika dyònsò, ne mwoyi wètù wònsò ne, nebyènzekè mùshindù awu.

²⁵⁷ Mpindiyewu ki kasumbu kàà bantu nkòkò aka biimane, ndi mumanye bààbùngì bàà kùdìbo. Ngeela meeji ne... Ncyèna—ncyèna—ncyèna ngeela meeji ne, mukàji wa kumpàla udi mwab'ewu kumpàla kwà mulongo ewu, nsongàakàji ewu, ncyèna ngeela meeji ne ndi mumumanye to. Ndi mumanye Mwanèètù Way; ne mwanèètù wa bakàji, udi ulonda wàwa, mukàji wa Mwanèètù Roberson... anyi wa Mwanèètù Borders. Kàdi ncyèna mumanyè muntu mulùme udi ulonda wàwa to. Bivwa bikèngela bwà mèmè kwikala mumanyè mukàji udi ulonda wàwa; ncyèna mumanyè to, ncyèna ngeela meeji ne ndi mumumanye to. Eyowà, ndi mumumanye. Ne udi ulonda wàwa, muntu mulùme udi mwimane wàwa, mèmè nciyi mutùpàkàne to, mmwànà wa balùme wa Mwanèètù Daulton. Ne mu mulongo mwàmwa, ndi mumanyè pabwìpì ne bwònsò bàdi mwòmò bàba.

²⁵⁸ Ncyèna ne cingenyingenyi nànsha cikesè cyà ne nganyi udi... ne bantu abu mbanganyi, ne mbafùmìne penyì to. Kadi mpindiyewu, cidìbo naaci dijinga bwà mpindiyewu ndisambila. Bàmwè bàà kùdìbo, mu bushùwà bwà bwalu, bàdi bóbò dyàmwàmwa's, kabèèna mwà kuumvwaku ne bwalu menemene bùdi cinyi to.

²⁵⁹ Mpindiyewu, ndi muswè bwà muntu ne muntu wa kunùdì ìkalè mutàngìle mu nùku bwà katanci kakesè, muntu ne muntu wa kunùdì mu mulongo wà babèèdi amu. Bu ne mvwa mwà kunwàmbulwisha, mvwa mwà kucyènza. Nwamònu anyi? Ne ndi mwab'ewu mbwà kunwàmbulwisha. Kàdi mùshindù wùmwèpelè wúngìikalàku mwà kucyènza, bwà kwalujulula cìdì Sàtaanà munwènzèle aci, ngwà nwènù kungìitabuuya mèmè. Bu nwènù ànu mwà kungìitabuujaku, ne mwoyi wènù wònsò, necyènjiibwè.

²⁶⁰ Mpindiyewu bivwa pa ciibidilu ne, mu mudimu wànyì wà bwambi, bivwa mwà kufila bikèèna-kumòna. Bikèèna-kumòna bivwa mwà kubwayika, ne mvwa mwà kwambila bantu cìvwàbo bavwile. Nènku, nwènù, mbanganyi bàkaadiku bamòne cyòci aci cyenzèke? Kaa, s'nnwènù bònsò, nwamònu's. Ncyà bushùwà.

Èyowà, ncìcidi ànu mwà kucyènza. Kaa, cìcidi ànu mwà kwenzeka. Bushùwà. Èyowà. Ncyà bushùwà.

²⁶¹ Kàdi tukàadi twenda tuya ku cintu kampànda cinène kutàmba aci mpindyewu. Tukàadi twenda tubànda kuulu kwà aci nàнку. Nwamònu anyi? Tukàadi twenda tuya ku Dìyi dyakula adi. Kàdi Sàtaanà neikalè ne cyà kucyènza. Necimuwikile mu disoka; bu mémèku ànu mwà kunùfikisha ku diCìitabuuja cyanàànà. Kanwèdikù mpatà to.

²⁶² Mònaayi, nwènù baswè kumanya ne ndi nzwambila bulelèlè, piikalàbi ne Nyumà Mwímpè ùdi kaaba aka. Ndi mumanye cidi, nsongàakàji wàwa, cidi cimutàcishà, nsongàakàji wàwa. Ncitu mumumanyè to, kàdi ndi mumanyè cidi citàcishà. [Mwanèètù wa bakàji kampànda ùdi wàmba ne: “Cyà bushùwà. Mukwàciibwe kùdi démon. Dikwàciibwa dyà kùdi démon.”—Muf.] Ncyà bushùwà menemene. Kàdi mulwishi yèyè ùdi ànu munkaci mwà kundwisha ne mwèndè mwònsò, kàdi neikalè ne cyà kucilekela. Wèwè cìtàbùùjè ànu cyanàànà. Kùcyèdiku wèwè mpatà to, mwanèètù wa bakàji. Kùcyèdiku mpatà to. Mbímpè, mwanèètù wa bakàji. Wèwè, newikalè mwà kuumvwa... Nebiikalè mwà kwenda bímpè.

²⁶³ Ki muntu wa bafiike ewu kacya muntàngile, mwimane mwaba wàwa mu mulongo. Ncyèna mukumanyè to, kàdi Nzambi mmukumanyè. Bu mémè mwà kukwambila lutàtù lùdi naalu, newitabuuje ne ndi mupròfetà Wendè anyi? Newitabuuje anyi? Kwèna mulwè kaaba aka bwèbè wèwè mwine to. Mwànà udi mu lupitàadi awu neúmfwè bímpè bu wèwè mwà kucìitabuuja. Udi witabuuja aci ne mwoyi wèbè wònsò anyi? Nàнку asà lwendu ndaaku, alùkilàku ku mwaba wèbè. Ndi ngàmba ne Bukolè bwà Nzambi bwikalè pa mwànà awu ne dyabulu àmùlekèlèlè.

²⁶⁴ Daulton mwànà nyawu muntàngile, wèwè udi kaaba aka mbwà mwine mwànà wa mu dibòko awu. Mwànà wa mu dibòko awu ùdi ne cintu kampànda cimutàcisha mu mùfù wèndè amu. Kì mmwòmò anyi? Alùkilà ku nkwasà webè, ne ùcìtàbùùjè, nènku yèyè neúmfwè ànu bímpè.

²⁶⁵ Ndi kàbidì munkaci mwà kutàngila mukàji mukwàbò musòmbe mwab'awu, m'Mandamu Stricker. Mandamu Stricker, ncyèna mwakuleku neebè to kùkaadi ndambà wa ngondo. Ncyènakù ne cingenyinyeni cyà bwalu bùdi muvwile kaaba aka to. Udi witabuuja ne Nzambi ùdi mwà kungambila cidi lutàtù lwèbè anyi? Ncifwànyine kufikisha bònsò...?..bàà kunùdi ku diitabuuja anyi? Udi mulwè mwab'ewu mbwà mwànà awu udi ne cintu kampànda cimutàcisha ku mukòlò. Pashiishe, wèwè udi munkaci mwà kusambidila mulunda webè kampànda mu Áfrikè. Ncyà bushùwà menemene. Aci ng'EMU MMÜDÌ MUKALENGÈ WÀMBA. Mpindyewu, piikalàci cyà bushùwà, Mandamu Stricker, ela cyanza cyèbè muulu. Nwamònu anyi?

266 Yêyè udi kaaba aka, nwamònu's. Kadi mudimu wà bwambi awu—awu newikalè ànukù misangu yònsò, kàdi ki mukwàbò wùlwalwà ewu. Itabuujaayi mpindyewu! Kanwèdikù mpatà to. Muntu nànsha umwe wa kunùdi kèèdikù mpatà to. Pàngàànütentekelà byanza, ne ndomba bwà cyôci eci kwenzekaci, s'neçikalè mwà kwenzeka. Cintu cimwepelè, cidi ànu bu mùdi kwangata kwà Dîyi dyà Nzambi cyanàànà. Cintu cimwèpelè cidi ne, wèwè kuyi muCítàbùùje to, kacya kwenzeka to. Wèwè muCítàbùùje anu menemene, cidi ne cyà kwenzeka. Bwalu, cintu kampànda cyàkenzeka dilòòlò kampànda kuntu kwàka, ne mèmè ndi mumanyè ne Nzambi mwine uvwa mwà kufùka awu mmufwànyine kucyèza. Eyo.

267 Ndi muswè bwà bantu bwònsò nwinyikàayi mitù yènù, bantu bwònsò biikalè mu disambila.

Mpindyewu, mwanèètù wa bakàji munanga, démon awu kèna ùfika ku dyumvwa ne...?...

Wèwè démon udi muswike Sharon, mwànà muteketè wa bakàji mulenga ewu!

268 Nzambi mwine, Yêyè uvwa mumpèeshe cikèènà-kumòna dilòòlò kampànda adi awu, cyà dyabùlù muswikiiibwe awu, ùvwa mwambe ne: “Mu meeji matòòke, mmùdi mwà kumuswika.” Nènku ne meeji matòòke mu mwoyi wànyì bwà mwànà ewu, nyewu ndwa, Mukalenge, bwà kulomba luse ne dyanyishiibwa Kùdi, bwà bwalu bwèndè.

269 Sàtaanà, ndi nkuswika. Mu Dìna dyà Yesù Kilstò, shiya mwànà ewu. Meeji èndè ne lungenyi nebimwalùkidilè, ànu mwàbi ne kale. Pa nànkù Dîyi dyàmányi kwambiibwa, pa nànkù necyèzekè mu Dìna dyà Yesù Kilstò.

270 Mukalenge Nzambi, bwà Mwanèètù wa balùme Way, swàku bwà Bukolè bwà Yesù Kilstò bùswikè bukolè bwà dyabùlù bùdi buswike mwanèètù wa balùme ewu. Nènku bùmusuùlùlè, mu Dìna dyà Yesù Kilstò.

271 Nzambi, mukàji mutekète udi mukwàte ne byà luse ewu neikalè bu wa kumpàla awu mwab'ewu, mu mbingu mikesè, cintu kampànda cyôci kaciyi cyènzèke bwèndè yêyè to. Yêyè mmukàji wa mwanèètù wa balùme, Mwanèètù Roy. Mukalenge Yesù, mpèeshèku makànda mpindyewu. Wèwè Uvwa mufile cikeena-kumòna aci awu, kacya Kùtukù mwanji kupangila to. Kacya kaCitukù cyanji kupangila to.

272 Wèwè nyumà wa dyabùlù, udi muswike mwanèètù wa bakàji ewu, ndi nkuswika. Mu Dìna dyà Yesù Kilstò, mulekèlè. Cyàmányi kwambiibwa, nènku cyènzèkè! Cyà bushùwà.

273 Mu Dìna dyà Mukalenge Yesù, sungilaku mwanèètù wa bakàji ku ntàtu yèndè. Mu Dìna dyà Kilstò Wàkalaya, ne wàkafila mulayi ne: “Nwènù bambile mukùnà ewu.” Cyènzèkèku, Mukalenge.

274 Pambidi pàà mukàjì ewu, mwikalè ngumvwa dilaabiibwa dyà Nyumà Mwimpè mu cibambalu emu, ndi ntentekapu byanza byànyì, mu Dîna dyà Yesù Kilistò, bwà dyondopiibwa dyèndè. Mu . . . Swàku cyènzekè, bwalu cyàmanyì kwambiibwa. Amen.

275 Pambidi pàà mwànà wa bakàjì mutekète ewu, JoAnn, Wèwè udi mutèèke mu meeji àànyì cileejilu cyà mwànà wa bakàjì mutekète mwena Kilistò ewu. Ndi mmusungila mu dindà emu, ku cintu cibi eci. Mu Dîna dyà Yesù Kilistò, swàku bwà dilòmbà dyèndè difidiibwè.

276 Mukalenge Nzambi, pambidi pàà ewu, nyàanendè wa mwanèètù wa balùme munanga, Mwanèètù wa bakàjì Thoms, ndi ntentekapu cyanza. Mubì awu udi muswè bwà kumuswika awu, àswikiibwè yèyè. Mu Dîna dyà Yesù Kilistò, swàku bwà àshaale mudishikamine.

277 Pambidi pàà mwanèètù wa bakàjì, ndi ntentekapu cyanza cyànyì. Mu Dîna dyà Yesù Kilistò, Mwànà wa Nzambi, swàku bwà bukolè bwà mwena lukuna bùswikiibwè. Nènku, mwanèètù wa bakàjì, bwà àshaale mudishikamine, kubangila ku ditùkù edi.

278 Pambidi pàà mwanèètù wa balùme, ndi ntentekapu byanza byànyì, bilondèshile Dìyì dyà Nzambi. Swàku bwà démon udi muswè kumwenzela bibì ne kumupangisha ewu, àmushiile kaaba. Mu Dîna dyà Yesù Kilistò. Amen.

279 Bwà dilòmbà dyà mwanèètù wa bakàjì, ndi ndòmba bwà Wèwè kumukumbajilaci, Mukalenge. Pândi mumutentèkele byanza apa, mu Dîna dyà Yesù Kilistò, cyènzekèku. Amen.

280 Bwà mwanèètù wa bakàjì, Taatù, pândi mumutentèkele byanza apa. Mu Dîna dyà Yesù Kilistò, dilòmbà dyèndè difidiibwè. Amen.

281 Ku diitabuuja dipwekèle, Mukalenge, nànsha mùdìbi—mùdìbi ne ncidika, mutentèkele bânà bèètù bàà balùme byanza. Mu Dîna dyà Mukalenge Yesù, dilòmbà dyèndè difidiibwè.

282 Pambidi pàà Mwanèètù wa bakàjì Way ewu, yèyè ùtu mudileejelèèjè mwena luse kùdì bàtù dijinga ne luse awu. Ne byàkafundiibwa ne: “Nebàpetè luse.” Swàku bwà luse lwònsò lùdiye ùlòmba alu, mu dindà emu, luùmwenzèkèlèku, mu Dîna dyà Yesù Kilistò. Amen.

283 Mukalenge, maamù mutekète ewu, ne mwoyi mucibùlùke, bu mùndi mumanyè dilòmbà dyèndè, Éyi Nzambi wa Cyendèlèlèlè, cìmwenzèkèlèku leelù ewu. Mu Dîna dyà Yesù Kilistò. Amen.

284 Taatù Nzambi, bwà mwanèètù wa bakàjì ewu, nyèwù mmutentekela byanza, bu mùndi mutumiibwe ne mudimu kùdì Nyumà Mwimpè, ne ku cikèènà-kumòna cyà dilòlò kampànda adi. Swàku bwà dilòmbà dyèndè difidiibwe, mu Dîna dyà Yesù Kilistò. Amen.

285 Taatù wa mu Dyulu, pàdi mwanèètù wa bakàjì ewu ùbànda kùneeku bwà kwimana pa kaaba kèndè, bwà kumutentekela byanza. Mupèèshèku dilòmbà dyèndè, Éyi Nzambì. Mu Dîna dyà Yesù Kilstò, swàku bwà cyènjiibwè.

286 Taatù wa mu Dyulu, pàndi nkwata cyanza eci apa, cyà mwanèètù wa bakàjì, swàku bwà Bukolè bwà Yesù Kilstò bùfilè dilòmbà dyèndè. Amen.

287 Mukalenge Yesù, pàndi nkwàta cyanza cyà mwanèètù wa bakàjì ewu apa, ne mushwàla wùdiye mukwàte ewu, swàku bwà dilòmbà dyèndè difidiibwè. Mu Dîna dyà Yesù Kilstò, difilèku, Mukalenge. Amen.

288 Taatù Nzambì, mu Dîna dyà Mukalenge Yesù, swàku bwà dilòmbà dyà mwanèètù wa bakàjì difidiibwè kùdiye. Cidiye ùlòmba aci, swàku àcipètè. Mu Dîna dyà Yesù Kilstò.

Itàbùùja nàka, itàbùùja nàka,
Byònsò bìdi mwà kwenzeka, itàbùùja nàka;
Itàbùùja ànu nàka, itàbùùja nàka,
Byònsò bìdi mwà kwenzeka, itàbuujà nàka.

289 Mpindyewu kumpàla menemene kwà ditangalajangana, swàyi ngangateku ànu kasunsa kakwàbò kàmwè, ànyi túbidi, twà díbà dyènù. Cidika, Nzambì ngudi mwenze cyòci aci. Mu bwikadi bwètù mene emu, cidika's ncyenzèke. Bwalu pàncìvwà ànu mbanga bwà kuya ku mulongo wà babèèdi awu apu, Cintu kampànda ncintùntùmùne ànu nàka, ànu menemene mùvwàYe mwambe ne ki mùvwàci mwà kwenza amu. Nwamònu's, cidika! Nwamònu anyi?

290 Nènku pàvwà Nyumà mwikàle pambidi pàanyi mùshindù awu, mvwa mwà kutàngila mu mulongo awu ne kumòna bintu bìvwà bantu abu bajinga, nwamònu's. Pa nàнку, byòbì bikesè bìvwà bisàtù anyi binaayi, anyi cintu kampànda, bwà kwikalaci dishindika, bujaadiki, bwà ne Nzambì kàtukù unyenga dipà didi diikàle dipà dilelèlè to. Yèyè udi ànu ùsàkidilakù, mwikàle ùtùngunuka ànu ne kwibaka wenda ubànda ànu kubànda.

291 Mpindyewu mémè, ndi ngiitabuuja ne mwoyi wànyì wònsò ne, nudi bondòpiibwe. Amen. Ndi nciitabuuja ne byònsò bìdi munda mwànyì. Ndi—ndi nciitabuuja.

292 Mpindyewu, Yesù ùvwà munùbiiikile bwà nwènù kulwa ku lupàndu. Bu nwènù mwà kulwa, nuvwà mwà kuCipeta, bwalu Yèyè ngudi mucilayè. Yèyè ngudi mucilayè, mpindyewu katùcyèdiku mpatà to. Kàdi tucitabùùjaayi ne mwoyi wètù wònsò. Mpindyewu, kanùcilwanganyishì mvità to, manyàayi ànu ne cidi ne cyà kwenzeka. Cidi ne cyà kwenzeka. Yesù mmwàmbe ne: “Amba Díyi edi. Kwèdikù wèwè mpatà to.” Nwamònu anyi? Ne Yèyè ki uvva mwinè Mwena bwalu.

293 Ne biine bikèènà-kumòna abi, bwà ku dyànyì pàanyi dimanya, ne mwoyi wànyì wònsò, kacya musangu nànsha

wùmwè kabituku byânji kupangilaku to, musangu nànsha wùmwè. Nènku Yèyè kwamba, dilòòlò dikwàbò adi, mu byòbì abi. . . cìkèèná-kumòna cìngänùlondèdì aci, kumpàla kwà Nzambì Kùndì ngiimana, ncilelèlè, nwamònu's. Yèyè wàkamòna nyòka awu muswikiibwe. Yèyè kwamba ne: “Nebikengele bwà ùtambè kwikala ne meeji matòòke.”

²⁹⁴ Ki cìndì nditácisha bwà kwenza, mbwà kutàmba kwikala ne meeji matòòke. Nènku muntu ne muntu udi ulwa mu dindà emu, mvwa nteeta bwà kwela meeji ne: “Bu ne ùvwa mmamwànyì mèmè (bwà bakàjì abu), bu ne ùvwa mmwanèètù wa bakàjì musòmbe paanyimà pààpa, bu ne ùvwa mmukàjàányì musòmbe paanyimà pààpa, anyì umwe wa ku bânà bàányì musòmbe paanyimà pààpa, kàdi amba túng bu ne bàvwa mbòbò abu?” Mwikàle nditácisha bwà kuditeeka mèmè mwine pa kaaba kààbò, bwà kwikala ne meeji matòòke. Bu nwènu bamòne, mwine. . .

²⁹⁵ Ndi ànu. . . mbyenzeke ànu ne ncivùlùkè. Dikwàbò ditùkù dyàdya, pàmvwà nsanganyiibwa mu Californie, ne mvwa mwimane kuulu mu didyà dyà Beena Kantu-ku-byanza. Ngeela meeji ne ndi naaci mwab'ewu. Ndi mutwishiibwe ànu byà mememene. Mvwa munkaci mwà kucitàngila kùkaadi katanci, ciprodètè cìvwà cìfidìibwe aci. S'ki cyòci eci, mwab'ewu mene. Eci cyàkafidiibwa, paanyimà pàà mèmè mumane kwimana nyiisha diyiisha dyà dikolè. Ne bantu nyāwu badi kaaba aka mu dindà emu; Mwanèètù Roy Borders, ngumwe, uvwapù, ngeela meeji, Roy ní ùdi penyì, yèyè ùvwa, èyowà, mmusòmbe mwab'ewu; ùvwapù pàvwà cyòci eci cyenzèke, ne bakwàbò bààbúngì bàvwàpu. Pàvwà nsongàalùme kampànda, uvwa wa ba-Baptistes awu, ùvwa mmwàna wa katwèndè mukwàbò wa Jane Russell, mulùmyàna udi mwendè luumu wa mu sèndemà awu; muntu yònsò udi muswè kulwa mu didyà adi ùdi mwà kulwa. Nènku ndi mwenze ànu njikija kuyiisha anyì, nsongàalùme awu kulwayè tamakatamaka ne kungeelaye mabòko kunshingu, ne kucyàmbayè.

²⁹⁶ Ndi mwenze ànu ntuuluka ku cibumba cyà ku cyambilu kampànda, ntuuluka, bwà mèmè kubànda pa cikwàbò, bwà kwakula ne disangisha, piine apu, mbantu nkàmà ne nkàmà bitùulè. Nènku mvwa ngààkwila ku—ku tudyòmbà biikàle biya mu ditùnga dijimà pa dìbà citèemà dyà dilòòlò dìvwà dìlondà. Bìvwa munkaci mwà kukwaciibwa pa mikàbà yà mèyì, piine apu. Kàdi pàvwà cyòci eci. . . Mèmè kutuulukila mu cisàsà cìvwà cìlondà eci, bwà kwakula kàbidì, ne bantu aba *mwab'ewu*. Nènku dimwè dyà ku màngumba à matàmbe bunène dìvwa ne umwe wa ku bantu bààbò banène, uvwa mwimane mwaba awu, kàdi mwikàle ùmvwa Mukenji wumutacisha ku mwoyi, nwamònu's, ku dyamba dyà ne. . .

²⁹⁷ Mvwa ndonda mùmvwà nsanganyiibwa mu Phoenix, ndambù wa matùkù kumpàla kwà cyòci aci, ne mùmvwà

mumòne bimuma byàbúngì bishiilàngàne bikwàme ku mucì ùmwèpelè. Mvwa mumòne ku mucì wà orange, kwikàle bimuma byà mbòmà, madimà à mpùsù, ne ngeela meeji ne tundèleenyi, ne oranges yà mitwile mbidi, ne bintu byònsò bishiilàngàne abi bikwàmekù, bwalu mmucì wà madimà. Kàdi mèmè kwamba ne: “Ku cidimu ne ku cidimu cyònsò wówò wùdi wùsampila ne wùkwàma bimuma bipyabìpyà. Kàdi kùdi ànu matàmbà àà ku cibangidilu awu; pàdi dyòdi adi dikwàm-. . .pàdi mucì mulelèlè wówò mwine wùpàtula ditàmbà dikwàbò, dìdi dikwàma bimuma byà mùshindù wùmwèwùmwè bìdi mu mucì munène awu. Kàdi micì mikwàbò eyi yìdi yìkwàma bimuma byàyì yòyì, nànsha mùdìyi ne mwoyi ku—ku mwoyi wa mwine mucì ewu amu.” Mèmè kwamba ne: “Aci cidi mùdi malongolodi àdi masomeka mu Mwonji wa mvinyò awu. Yesù wàkamba ne: ‘Mèmè ndi Mwonji wà mvinyò.’ Nènku misangu yònsò yìdi Mwonji wà mvinyò awu wupatula ditàmbà, nedìikalè difwànàngàne ànu menemene ne Mwonji wa mvinyò awu. Nwamònu’s, nedìkwamè bimuma ànu bìmwèbìmwè abi.”

298 Èè, mwambi munène wa mu bulongolodi butàmbe bunène bwà beena Mpenta butùdi naabù ebu awu, ùvwa mwimàne mwaba awu, ne kuumvwayè Cìmutàcishe ku mwoyi, nwamònu’s, ki kwambayè ne ncìvwa muswè kucyàmba mùshindù awu to.

299 Kàdi mèmè kwalukila e kwamba ne: “Ncyà bushùwà ne mùshindù awu ngùndi muswè kucyàmba, nwamònu’s. Menemene ànu múngàmbì amu! Ncyèna ngùumusha kantu nànsha kàmwè to.”

300 Ditùkù dikwàbò pàmvwà ngàakula bwà byoshelu abi, nciyi mumanyè to, nciyiku mubimòne mu maalu-malonda to. Kacya ncitukù mwanji kwamba cintu nànsha cìmwè pa cibùmbà cyà ku cyambilu eku, mu disonsodiibwa, cìvwà cìkèngelaku bwà mèmè kuumusha to. Mpindyewu nudi mwà kutèèla aci, *Dimiinu Dya Nyòka*, anyi cyònsò cinùdi baswè kujinga kutèèla aci, cyònsò cìvwà Mayiisha awu aci, anyi, *Ndumbà Munène*, àdìbò bàtamba kutwà misèbà awu. Lwàku ànu cyanààna, ne. . .Bwà cinyi kùyikù ulwa kùndi ne Mifùndu, pa cyòci aci? Nwamònu anyi? Bwa nùmonè ní ncyà bushùwà.

301 Muntu awu kulwayè kùndi mwab’awu, kungeelayè mabòko kunshingù, ne ùkaavwa ànu ne àmbè. . .Kwambaye ne: “Mwanèètù Branham, kabiyi bwà kunyangakaja kwà cijila to, kàdi aci’s ncifwànyine kwikala cyènze nshapità wa 23 wa Bwàkabuulwibwà. Nudi bamanyè’s, Mukàndà mukwàbò musàkidila’s. Mu bushùwà bwà bwalu,” mwàkambàye, “aci kì ncifwànyine kwikala cyà bushùwà to, mu bushùwà bwà bwalu, katwèna ne cyà kusàkidilaKù kantu nànsha kàmwè to.” Kàdi mmwenzè ànu ne àmbè cyòci aci, kubàngayè kwakula mu myakulu. Kàdi pèndè nsongàalùme awu kàvwa mumanyè ne kwakula kwà mu myakulu kwine mbwena kwamba cinyi to.

302 Kàdi mmwenze ànu wenza nàнку, ànu kumpàla kwànyì menemene aku kùvwà kusanganyibwa mukàjì wa beena France, wa mu Louisiane, kwambaye ne: “Aci kacìvwà cìkèngela dyandamuna nànsha. Cìvwà m’Français ànu yètù yà menemene eyi.”

Nènku muntu kampànda lwà mwab’ewu kukàtamukaye e kwambaye ne: “Ncyà bushùwà.”

303 Ne paanyimà lwà mundekeelu mwàmwa mùvwà mwandamunyi wa O.N.U., kufilaye dìnà dyèndè, uvwa kàyìku mwanji kulwa mwab’awu kwònsò aku to. Yèyè kwamba ne: “Menemene. Ncyà bushùwà.”

304 Kàdi mònayì cyàkapetàbo bònsò pàmwè. Ne muntu ne muntu wa kùdìbo uvwa ne cintu ànu cìmwècìmwè aci pàakatwilanganàbo, muntu ne muntu wa ku bàvwà bàfila dyandamuna abu, ànu mu dyòdi menemene.

305 Nènku muntu mulùme mwena France ewu, mwibìdì wa apa ewu, uvwa mucifunde, bwalu yèyè uvwa ufùnda milubu yà disangisha adi. Cyàkafùndaye ncyòci eci:

Mèmè, Victor Le Doux, ndi mwena France, mukùna ku dikàsà, mwena Kilistò mulediibwe cyàkàbìdì, mùle tètè ne Nyumà Mwìmpè. Ntu musòmbèle mu Njila wa North Kings ku nombà 809, Los Angeles 46, ntu ntèndèleela mu Bethel Temple, Arnie Vick ki mpaasàtà wetù. (Mwambi wa beena Mpenta, wa mu èkèleeziyà wa mutàmbe bunène wa beena Mpenta mu Los Angeles amu.) Dyandamuna dyà cipròfetà cyenza pa Mwanèètù Branham, cìfila kùdì Danny Henry mu Français, mu matùkù 11 à ngondo mwibìdì, cidimu cyà 1961, ku didyà dyà Beena Kantu-ku-byanza bàà Èvànjeeliyò mu Kaabujimà, dikudimuna dilelèlè dyà cipròfetà aci.

Bònsò bàsàtù abu bàakamba ne eci ki cyòci:

Bwalu udi musungule kajila kabùmbàkàne . . .

306 Nwamònu’s, bibèngàngane ànu menemene’s, bìvwà bikèngela bwà mèmè kwenda nkààyaanyì, nwamònu’s. Mèmè ndi mwà kuumvwà aci. Byàkakèngela ne, Mòsà ènzè pèndè dyèndè disungula. Nwamònu anyi? Kàvwà mwenzèjiibwe bwà kucyènzayè to, kàdi wàkacyènza. Nwamònu anyi? “Njila mutàmbe kwikala mukolè, wèwè. . .” Nwamònu anyi?

Bwalu udi musungule kajila kabùmbàkàne, njila mutàmbe kwikala mukolè, udi mwenze . . . udi mwendelemu ku disungula dyèbè wèwè mwine . . .

307 Mu ngaakwìlu mukwàbò, ncìvwà mwenzèjiibwe bwà kucyènza to. Ndi mwà kutwà ku cyàbò, ne kwenda naabò bu mèmè mwà kuswà nàнку. Kàdi mèmè ndi mushààle ne. . . ndi muswè kushààla ne Dìyì.

. . . udi mwangàte dipàngadika dijaalame ne diikàle mu dyòdì ne dyòdì adi ki NJILA WANYI.

308 Bu nwènù mwà kumòna bîmpè, cidi ne bimanyinu byà mu difùnda ne basùmìnyinepu. Bu nwènù mwà kumòna bîmpè, ncifùndiibwe mu Français, cyòcì eci, cyakula mu Français, mwákù wà pa mwandà kumpàla kwà mwambikila, nwamònu's.

Bwa dipàngadika edi dyà mushinga mukolè, citùpà cinènaanènàlè cyà Dyulu ncikwindile.

309 Mpindyewu, pa cyòcì aci ki pâmvwà ndikonka ne: “Pàngààfwà, nebyènzekè ne. . . ?” Pashiishe kwenzekabi ne mbanke kudyàmbidila mundamunda ne: “Dyulu kadiyì ne nditùkòsolwela mu bitùpà bishilèshilèshilàngàne muulu mwàmwa, Dyulu pàadi's m'Bukalenge bwà mu Dyulu bùdì munda mwètù emu, bùdì muntu mwindile.” Nwamònu anyi? Mpindyewu tàngilààyaaku:

Dipàngadika kaayi dyà butùmbi dyùdì mwangate's wè!

Eci, mu cyòcì ciine, ki cyàfila, ne cyafikisha ku dyenzeja, bucimunyi bulenga bwà dikèma mu dinanga dyà Nzambi.

310 Hmm! Nwamònu's, twètù tudi bafwànyine kucyàmba ne: “Mu bucimunyi bulenga bwà dikèma mu Dinanga dyà Nzambi,” kàdi mu Français ncifwànyine kwikala ne “Dinanga dyà Nzambi.” Anu bu mùdìbi mu Allemand anyi mu mwakulu mukwabo kanà wònsò ewu's, nwamònu's, bàtu bàngata . . . bàtu bàtèèka mwaku wa pa mwanda kumpàla kwà mwambikila.

311 Mpindyewu nudi numòna cidi kupweka kwà ku Yadènè kùmvwija anyi? Tukàadi kwìnshì eku mpindyewu. Tùsabukààyaaku mpindyewu. Tulekelààyi kunaya. Tùsabukààyi tuye dyàmwàmwa mpindyewu, bwalu cyònsò aci ncyètù twètù. Cyònsò ncyètù twètù. Bikèènà-kumòna abi kacya kabitukù bipangile to. Kabyènakù mwà kupangila to, bwalu bìdì bifùmina kùdì Nzambi. Mèmè ndi ncìitàbuuja ne byònsò bìdì munda mwànyì. Twètù katwèna beena mudimu bàà difutu, bìikalà mwà kunyeema kwalukila mu cipèèlà to. Netùsabukè Yadènè, ditapuluka. Nzambi àtùkòseleku Bitampì bìdì paanyimà pàà Mukàndà abi! Tùbwelààyi mu mwaba munène ewu mpindyewu, bwalu Yoshuwa wàkaabanyina bantu bumpyànyì bwàbò bùvwà Nzambi mubàshiile.

312 Bu nwènù mwà kumòna bîmpè, baamaamù bàà beena Ebelu abu, pàvwàbo mu kudinyenga kwà pa kulela ne pàvwàbo bàlela bankambwà abu. . . (Nèmfikè pa cyòcì aci, dimwè dyà ku matùkù àdì panshì aa, bu Mukalenge mwà kwanyisha.) . . . ne pàvwàbo bàlela bankambwà abu, pàvwà maamù wàmba mènà àbò, dìbà dyà kudinyenga kwà pa kulela adi, ùvwà kàbìdì ùbàteeka pa kaaba kààbò mu myaba mu bukalenge. Kaa, ekèlekèle!

313 Disonsodiibwa dùtu—dùtu ncidikà. Nwamònu's, kwèna—kwèna ànu mwà kucyùmvwakù to. Kàdi ncìsonsola, ne Nzambi

ùdi ùcibweja buludi mu mwaba wàci, ànu—ànu pa díbà dyúdi wèwè kùyiku welela meeji to.

³¹⁴ Mpindyewu, pìikalà kuulu kakùyi kwà nêjè menemene to, ne twètù ne mùshindù, bu Mukalenge mwà kwanyisha, mu dyàlumingu díwalwà edi ndi muswè kwakula pa cyèna-bwalu cyà *Bwena Kilistò Bùbèngangana Nè Dikuukwila Dyà Bampàngaanù*. Nènku wèwè ne mùshindù, ùlwe ne kabèji kèèbè, cyònsò cyúdi muswè aci, bwà Dyiisha adi. Mayiisha neikalèku kàbìdi dílòòlò edi, mwanèètù... bàmwè bàà ku bàna bèètù bàà balùme mwab'ewu, ngeela meeji, nebàyishè. Mvwa nkeba kushààla, kàdi ndi mumanyè ne bantu bààbùngì mbafwànyine kushààla, ne bàkaadi badyànjàle kumanyisha cyàkàbìdi bwà nêjè mu mapingaja emu, bwà ne neàbwikile njila yònsò, kuumukila ànu ku Géorgie ne myaba mishìilèshìilàngàne. Pa nàнку mèmè... Bu Mukalenge mwà kwanyisha, ncifwànyine kwikala mu dyàlumingu díwalwà edi, mvwà ne cyà kuyiisha Dyiisha dímwèdímwè adi dílòòlò edi, kàdi néndítentèmùnè too ne ku dyàlumingu díwalwà. Nènku díbà adi, Nzambì ikalè nèènù.

³¹⁵ Ndi ngiitábuuja ne Yesù Kilistò ùdi Mwànà wa Nzambì udi ne mwoyi, mulela kùdi virgo, mwimita, Nzambì mu dífù dyà mukàji, ntentà ùvwaYè mwà kusòmbèlamu. Ndi ngiitábuuja ne, munda mwà Kilistò, mmùdìYe Nzambì mwandàmùke mubidi. Yèyè n'Nzambì muvwijiiibwe mubidi. Pààkabwelà Taatù Nzambì munda mwà Yesù Kilistò, Yèyè ùvwa kaabujimà kàà Bunzambì mu ciikadilu cyà mubidi, munda Mwèndè ki mùdi kaabujimà kònsò nkòong kasòmbèle. Nzambì Taatù nguvwa wakula Méyi awu. Yesù wákamba ne: “Kí m'Mémè udi wakula to, kàdi n'Taatù Wanyì udi musòmbèle munda Mwànyì, Yèyè ngudi wakula.” Ki bwà cinyì mwimànyìne pa cyòci aci, Yèyè mmuvwijiiibwe mubidi bwà Wàmòna mwà kufwà, Nzambì mwikàle ufuta cibawu bwà bukwàbantu, bwà kupikula ne kwaluja, ne—ne kulwa, kusangisha pàmwè bintu bìvwà bufùki Bwendè Yèyè mwine bujimije mu cibulà abi, Yèyè kubipikula e kubyàluja ne mwoyi Wèndè Yèyè mwine.

³¹⁶ Díbà adi, mu kupikula kwà bantu aba, bwà Èvànjeeliyò Wèndè wàmòna mwà kuya kule menemene ne: “Byenzedi bìndi Mèmè ngèza, nenùbyènzè pèènù. Nenwènzè byàbùngì bipite ebi, bwalu Ndi nya ku Taatù. Katancì kakesè aka, bàà pa buloba kabààkuMmòna kàbìdi to; kadi nwènù nenùMmone: bwalu Nèngiikalè nèènù, munda mwenu mene, too ne kunshiiکیدilu kwà buloba.” Mpindyewu tukàadi ku cikondo cyà nshiiکیدilu. Kilistò mmwalukile mu mmwènèkelu Wèndè wa Nyumà Mwimpè, mu kaabujima kàà Bukolè Bwendè, mubwele mu Èkèleeziyà, bwà kudìmwènesha Yèyè mwine. Mbipeepèle. Mbantu bapwekèle.

³¹⁷ Bu kwòkò mwà kwikala muntu kampànda kaaba aka udi mufwànyineku kwikala ne dyàkalenga dikumbàne bwà

kwikala ne dilonga dîmpè dyà kàlaasà, ne pàmwăpa uyaku ku èkèleeziyà wa munène, bupwekele bwà bantu bàà cipidi cishààdìle eci kabukulendwishiku to. Nwamònu anyi? Kí, kí ng'aci to. “Bantu bàà pàtupù bàvwa baMutèèleja ne disànka.” Nwamònu's, mbantu ànu beètù bàà pàtupù aba.

³¹⁸ Mpindyewu kùdì—kùdì bitùpà byà bantu. Kùdì bàmwè bàdì kabàyi ànu bàcyukaku to, biikàle ne nsòmbelu ànu wa mùshindù wònsò nàka, bàdì pambèlu mu mìsèèsù, ne bikwàbò. Kí mbòbò abu bàvwa bàMutèèleja to. Ne bàà mùshindù wa wùkòka ntema abu, kí mbòbò abu bàvwa bàMutèèleja to. Bàvwa ng'aba bàà—bàà citùpà cyà pankàcìnkaci aci, bantu beètù bàà pàtupù aba, aba bàdì bapèlè kàdì biikàle baswè kwikala ne nsòmbelu mukezuke ne wa kaneemu, ne baswè kwikala ne mwoyi bwà Nzambì, bòbò abu ki bàdì bàMutèèleja.

³¹⁹ Pa nàнку, swàyikù bwà nwênù ne mêmè twìkalè bantu biikalà mwà kuMutèèleja mu ditùkù edi, bwalu mêmè ndi bushùwà ngiitàbuuja ne cimwè cyà ku bintu bìdì bitàmbe bunène bikaadìku bibwayìke pa buloba ncìdì munkaci mwà kubwayika mpindyewu eci. Amen. Nzambì ànùbènèshè.

Mpindyewu nêngààlujè bulombodi bwà disangisha kùdì Mwanèètù Neville.



CIDIKÀ LUA61-1210

(Paradox)

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu dyalumingu mu dinda, mu matuku 10 a ciswà-munène, cidimu cya 1961, mu Branham Tabernacle mu Jeffersonville, Indiana, U.S.A. Ndyumusha pa mukaba wa mêyì ne dituuta ku cyamu mu kaabujima kààdì mu Anglais. Nkudimwinu wa mu Ciluba ewu mmutuuta ku cyamu ne mwabanya kùdì Voice Of God Recordings.

CILUBA

©2020 VGR, ALL RIGHTS RESERVED

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org

Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org